

# 妙法蓮華經科文表解

本科判為美國法界佛教總會·中文網站製作  
節自於藕益大師《妙法蓮華經會義》  
與大義法師《法華經大成》科判之綜合

法華偈

六萬餘言十軸裝  
無邊妙義廣含藏

白玉齒邊流舍利  
紅蓮舌上放豪光

喉中甘露涓涓潤  
口內醍醐滴滴涼

假饒造罪過山嶽  
不須妙法兩三行



釋迦牟尼佛於耆闍崛山宣演《妙法蓮華經》

# 妙法蓮華經弘傳序

唐終南山釋道宣述

妙法蓮華經者，統諸佛降靈之本致也。蘊結大夏，出彼千齡。東傳震旦，三百餘載。西晉惠帝永康年中，長安青門，燉煌菩薩竺法護者，初翻此經，名正法華。東晉安帝隆安年中，後秦弘始龜茲沙門鳩摩羅什，次翻此經，名妙法蓮華。隋氏仁壽大興善寺，北天竺沙門闍那笈多，後所翻者，同名妙法。三經重沓，文旨互陳，時所宗尚，皆弘秦本。自餘支品別偈，不無其流，具如序歷，故所非述。

夫以靈嶽降靈，非大聖無由開化；適化所及，非昔緣無以導心。所以仙苑告成，機分小大之別；金河顧命，道殊半滿之科。豈非教被乘時，無足覈其高會。是知五千退席，為進增慢之儔；五百授記，俱崇密化之跡。所以放光現瑞，開發請之教源；出定揚德，暢佛慧之宏略。朽宅，通入大之文軌；化城，

引昔緣之不墜。繫珠，明理性之常在；鑿井，顯示悟之多方。辭義宛然，喻陳惟遠。自非大哀曠濟，拔滯溺之沉流，一極悲心，拯昏迷之失性。

自漢至唐六百餘載，總歷群籍四千餘軸，受持盛者，無出此經。將非機教相扣，並智勝之遺塵，聞而深敬，俱威王之餘勳。輒於經首，敘而綜之，庶得早淨六根，仰慈尊之嘉會；速成四德，趣樂土之玄猷。弘讚莫窮，永貽諸後云爾。

# 妙法蓮華經科文表解序

孫果秀 文

《妙法蓮華經》是不可思議的大法，是諸如來第一之說；「能令眾生離一切苦、一切病痛，能解一切生死之縛」，能助眾生早成佛果。此妙法經以蓮華為名，因吾人自性雖久沉五濁惡世，終無損壞；譬若蓮華雖出淤泥，終是潔淨不染。自性能生萬法，萬法還歸自性，而自性即是佛性；《妙法蓮華經》可說是一部自性經，也是成佛的源泉。

是故十方三世一切諸佛在世緣將了，必說《法華經》；過去多寶古佛為表擁護，也不憚萬里遠劫，來聽《法華經》。經海浩瀚，若論流通之廣之久，信奉之深之重，當以本經為最；不惟東土諸國普門讀誦，即古今政教亦多奉為護世護國護民寶典。佛稱此經為諸經中王，有能受持是經典者，「於一切眾生中，亦為第一」。確係的論！

然則妙法難思難議，要瞭解此第一之法，殊為不易；欲其信解，更是困難，遑論受持？是以歷年來不乏作家法主，窮其一生為之剖玄釋義，以襄初學；冀其會義之餘，更能進而信解受持。惟本經義理奧妙，其譬喻之往復婉轉，章法之開闔壯碩，易使人入寶山而迷途。是以經教家乃綸本溯跡，分科別目，為作尋寶之圖；俾使通篇脈絡清晰、義理相貫。其中佼佼者，當數明藕益大師之〈法華會義科〉；清大義法師之〈法華經大成科〉，更據此為骨本而增筋脈，堪稱本固枝榮。

先師宣公上人學究三藏，道貫古今；為弘揚光大佛教，拯救眾生故，盛年東渡美國加州，畢其一生，殫精竭慮，宣講無數經典，真可謂「一生辛苦有誰知」！然佛法初傳西方，當時聽經者大多是邊學中文邊聽佛法之美國弟子；因此上人所講諸經，皆以口語析出佛法精髓，深入而淺出，名曰「淺釋」，亦不敢驟增科判。後來上人特別叮囑，再度結集諸經時，務必加上科判條文，使

其更臻完整。弟子們不才，謹遵孔聖「述而不作」古訓，俯拾先賢遺唾，以〈法華會義科〉為主，〈法華經大成科〉為輔，斟酌增刪，縷述經絡法脈，使義理更見分明；庶幾毋忝先師先賢，並方便今人研究閱讀。

今編輯部亦將〈妙法蓮華經科文表解〉定稿；其或尚有未完善處，如能惠蒙各方大德垂教，是所至盼至禱。是為序。

時公元二零零八年八月十五日·佛曆三千零三十五年七月十五佛歡喜日



# 目錄

妙法蓮華經弘傳序	006
序	008
卷一 序品第一	015
卷一 方便品第二	035
卷二 譬喻品第三	063
卷二 信解品第四	099
卷三 藥草喻品第五	119
卷三 授記品第六	129
卷三 化城喻品第七	141
卷四 五百弟子授記品第八	173
卷四 授學無學人記品第九	187
卷四 法師品第十	195

卷四	見寶塔品第十一	205
卷四	提婆達多品第十二	219
卷四	勸持品第十三	229
卷五	安樂行品第十四	235
卷五	從地湧出品第十五	253
卷五	如來壽量品第十六	267
卷五	分別功德品第十七	279
卷六	隨喜功德品第十八	291
卷六	法師功德品第十九	299
卷六	常不輕菩薩品第二十	311
卷六	如來神力品第二十一	319
卷六	囑累品第二十二	325
卷六	藥王菩薩本事品第二十三	329
卷七	妙音菩薩品第二十四	343

卷七 觀世音菩薩普門品第二十五	353
卷七 陀羅尼品第二十六	365
卷七 妙莊嚴王本事品第二十七	371
卷七 普賢菩薩勸發品第二十八	379
附錄一 妙法蓮華經後序	388
附錄二 法界佛教總會簡介	390
附錄三 恭敬經典	393

開經偈

無上甚深微妙法  
百千萬劫難遭遇  
我今見聞得受持  
願解如來真實義

妙法蓮華經 卷一

# 序品第一



釋文(分二)

A 1 序分(分二)

B 1 通序·通敘跡本二門·六種證信序(分三)

C 1 標信與聞 如是我聞。

C 2 時主及處 一時，佛住王舍城耆闍崛山中。

C 3 眾成就(分二)

D 1 列眾(分三)

E 1 聲聞眾(分二)

F 1 比丘眾(分二)

G 1 無學眾 與大比丘眾萬二千人俱。皆是阿羅漢，諸漏已盡，逮得已利，

盡諸有結，心得自在。其名曰：阿若憍陳如、摩訶迦葉、優樓頻螺迦葉、伽耶迦葉、那提迦葉、舍利弗、大目犍連、摩訶迦旃延、阿菴樓駄、劫賓那、憍梵波提、離婆多、畢陵伽婆蹉、薄拘羅、摩訶拘絺羅、難陀、孫陀羅難陀、富樓那彌多羅尼子、須菩提、阿難、羅睺羅，如是眾所知識大阿羅漢等。

G 2 有學眾 復有學、無學二千人。

F 2 比丘尼眾 摩訶波闍波提比丘尼，與眷屬六千人俱。

羅睺羅母耶輸陀羅比丘尼，亦與眷屬俱。

E 2 菩薩眾 菩薩摩訶薩八萬人。皆於阿耨多羅三藐三菩提不退轉，皆得陀羅尼，樂說辯才，轉不退轉法輪，供養無量百千諸佛，於諸佛所植眾德本；常為諸佛之所稱歎。以慈修身，善入佛慧，通達大智，到於彼岸，名稱普聞無量世界，能度無數百千眾生。其名曰：文殊師利菩薩、觀世音菩薩、得大勢菩薩、常精進菩薩、不休息菩薩、寶掌菩薩、藥王菩薩、勇施菩薩、寶月菩薩、月光菩薩、滿月菩薩、大力菩薩、無量力菩薩、越三界菩薩、跋陀婆羅菩薩、彌勒菩薩、寶積菩薩、導師菩薩，如是等菩薩摩訶薩八萬人俱。

E 3 八部眾（分七）

F 1 諸天眾 爾時，釋提桓因與其眷屬二萬天子俱。復有明月天子、普香天子、寶光天子、四大天王，與其眷屬萬天子俱。自在天子、大自在天子，與其眷屬三萬天子俱。娑婆世界主梵天王、尸棄大

梵、光明大梵等，與其眷屬萬二千天子俱。

F 2 龍王眾 有八龍王：難陀龍王、跋難陀龍王、娑伽羅龍王、和修吉龍王、德叉迦龍王、阿那婆達多龍王、摩那斯龍王、優鉢羅龍王等，各與若干百千眷屬俱。

F 3 緊那羅眾 有四緊那羅王：法緊那羅王、妙法緊那羅王、大法緊那羅王、持法緊那羅王，各與若干百千眷屬俱。

F 4 乾闥婆眾 有四乾闥婆王：樂乾闥婆王、樂音乾闥婆王、美乾闥婆王、美音乾闥婆王，各與若干百千眷屬俱。

F 5 阿修羅眾 有四阿修羅王：婆稚阿修羅王、佉羅騫馱阿修羅王、毘摩質多羅阿修羅王、羅睺阿修羅王，各與若干百千眷屬俱。

F 6 迦樓羅眾 有四迦樓羅王：大威德迦樓羅王、大身迦樓羅王、大滿迦樓羅王、如意迦樓羅王，各與若干百千眷屬俱。

F 7 人眾 韋提希子阿闍世王，與若干百千眷屬俱。

D 2 總結眾集 各禮佛足，退坐一面。

B 2 別序·別說跡本二門（分五）



C 1 眾集序 爾時世尊，四眾圍繞，供養恭敬，尊重讚歎。

C 2 現瑞序（分二）

D 1 此土六瑞（分六）

E 1 說法瑞 為諸菩薩說大乘經，名無量義，教菩薩法，佛所護念。

E 2 入定瑞 佛說此經已，結跏趺坐，入於無量義處三昧，身心不動。

E 3 雨華瑞 是時，天雨曼陀羅華、摩訶曼陀羅華、曼殊沙華、摩訶曼殊沙華，而散佛上，及諸大眾。

E 4 地動瑞 普佛世界，六種震動。

E 5 眾喜瑞 爾時，會中比丘、比丘尼，優婆塞、優婆夷，天、龍、夜叉、乾闥婆、阿修羅、迦樓羅、緊那羅、摩睺羅伽、人非人，及諸小王、轉輪聖王，是諸大眾，得未曾有，歡喜合掌，一心觀佛。

E 6 放光瑞 爾時，佛放眉間白毫相光，照東方萬八千世界，靡不周遍。

D 2 他土六瑞（分六）

E 1 見六趣瑞 下至阿鼻地獄，上至阿迦尼吒天。於此世界，盡見彼土六趣眾生。

E 2 見諸佛瑞 又見彼土，現在諸佛；

E 3 聞說法瑞 及聞諸佛所說經法；

E 4 見四眾得道瑞 並見彼諸比丘、比丘尼，優婆塞、優婆夷，諸修行得道者。

E 5 見菩薩行行瑞 復見諸菩薩摩訶薩，種種因緣、種種信解、種種相貌，行菩薩道。

E 6 見諸佛涅槃瑞 復見諸佛般涅槃者；復見諸佛般涅槃後，以佛舍利起七寶塔。

### C 3 疑念序（分二）

D 1 彌勒疑念 爾時，彌勒菩薩作是念：今者世尊現神變相，以何因緣而有此瑞？今佛世尊入於三昧，是不可思議，現稀有事，當以問誰？誰能答者？復作此念：是文殊師利法王之子，已曾親近供養過去無量諸佛，必應見此稀有之相，我今當問。

D 2 大眾疑念 爾時比丘、比丘尼，優婆塞、優婆夷，及諸天龍鬼神等，咸作此念：是佛光明神通之相，今當問誰？

### C 4 發問序（分二）

#### D 1 長行（分二）

E 1 經家述 爾時，彌勒菩薩欲自決疑；又觀四眾比丘、比丘尼，優婆塞、優婆夷，及諸天龍鬼神等，眾會之心。

E 2 正發問 而問文殊師利言：以何因緣而有此瑞，神通之相，放大光明，照於東方萬八千土，悉見彼佛國界莊嚴？

## D 2 重頌（分二）

### E 1 頌上問（分二）

F 1 問此土六瑞 於是彌勒菩薩欲重宣此義，以偈問曰：

文殊師利 導師何故 眉間白毫 大光普照  
雨曼陀羅 曼殊沙華 栴檀香風 悅可眾心  
以是因緣 地皆嚴淨 而此世界 六種震動  
時四部眾 咸皆歡喜 身意快然 得未曾有

### F 2 問他土六瑞（分六）

G 1 問六趣眾生 眉間光明 照於東方 萬八千土 皆如金色  
從阿鼻獄 上至有頂 諸世界中 六道眾生  
生死所趣 善惡業緣 受報好醜 於此悉見

G 2 問見諸佛及聞說法 又睹諸佛 聖主師子 演說經典 微妙第一

其聲清淨 出柔軟音 教諸菩薩 無數億萬

梵音深妙 令人樂聞 各於世界 講說正法

種種因緣 以無量喻 照明佛法 開悟眾生

G 3 問他土四眾 若人遭苦 厭老病死 為說涅槃 盡諸苦際

若人有福 曾供養佛 志求勝法 為說緣覺

若有佛子 修種種行 求無上慧 為說淨道

G 4 結前啟後 文殊師利 我住於此 見聞若斯 及千億事

如是眾多 今當略說

G 5 問他土修菩薩行(分三)

H 1 總問 我見彼土 恆沙菩薩 種種因緣 而求佛道

H 2 次第問(分六)

I 1 問布施 或有行施 金銀珊瑚 真珠摩尼 磲磔瑪瑙

金剛諸珍 奴婢車乘 寶飾輦輿 歡喜布施

回向佛道 願得是乘 三界第一 諸佛所歎

- 或有菩薩 駟馬寶車 欄楯華蓋 軒飾布施  
復見菩薩 身肉手足 及妻子施 求無上道  
又見菩薩 頭目身體 欣樂施與 求佛智慧
- I 2 問持戒 文殊師利 我見諸王 往詣佛所 問無上道  
便捨樂土 宮殿臣妾 剃除鬚髮 而被法服
- I 3 問忍辱 或見菩薩 而作比丘 獨處閒靜 樂誦經典
- I 4 問精進 又見菩薩 勇猛精進 入於深山 思惟佛道
- I 5 問禪定 又見離欲 常處空閒 深修禪定 得五神通  
又見菩薩 安禪合掌 以千萬偈 讚諸法王
- I 6 問般若 復見菩薩 智深志固 能問諸佛 聞悉受持  
又見佛子 定慧具足 以無量喻 為眾講法  
欣樂說法 化諸菩薩 破魔兵眾 而擊法鼓
- H 3 不次第問 (分七)
- I 1 問禪定 又見菩薩 寂然宴默 天龍恭敬 不以為喜  
又見菩薩 處林放光 濟地獄苦 令人佛道

I 2 問精進 又見佛子 未嘗睡眠 經行林中 勤求佛道

I 3 問持戒 又見具戒 威儀無缺 淨如寶珠 以求佛道

I 4 問忍辱 又見佛子 住忍辱力 增上慢人 惡罵捶打  
皆悉能忍 以求佛道

I 5 問禪定 又見菩薩 離諸戲笑 及癡眷屬 親近智者

一心除亂 攝念山林 億千萬歲 以求佛道

I 6 問布施 或見菩薩 餽膳飲食 百種湯藥 施佛及僧

名衣上服 價值千萬 或無價衣 施佛及僧

千萬億種 栴檀寶舍 眾妙臥具 施佛及僧

清淨園林 華果茂盛 流泉浴池 施佛及僧

如是等施 種種微妙 歡喜無厭 求無上道

I 7 問般若 或有菩薩 說寂滅法 種種教詔 無數眾生

或見菩薩 觀諸法性 無有二相 猶如虛空

又見佛子 心無所著 以此妙慧 求無上道

G 6 問他土供養舍利 文殊師利 又有菩薩 佛滅度後 供養舍利

E 2 頌請答（分二）

F 1 舉疑述請 佛放一光 我及眾會 見此國界 種種殊妙

諸佛神力 智慧稀有 放一淨光 照無量國  
我等見此 得未曾有 佛子文殊 願決眾疑

F 2 釋四伏難 四眾欣仰 瞻仁及我 世尊何故 放斯光明

佛子時答 決疑令喜 何所饒益 演斯光明  
佛坐道場 所得妙法 為欲說此 為當授記  
示諸佛土 眾寶嚴淨 及見諸佛 此非小緣  
文殊當知 四眾龍神 瞻察仁者 為說何等

C 5 答問序 (分二)

D 1 長行 (分四)

E 1 惟忖答 爾時，文殊師利語彌勒菩薩摩訶薩，及諸大士：善男子等！如我惟忖，今佛世尊欲說大法，雨大法雨，吹大法螺，擊大法鼓，演大法義。

E 2 略舉曾見以答 諸善男子！我於過去諸佛，曾見此瑞，放斯光已，即說大法。是故當知今佛現光，亦復如是；欲令眾生，咸得聞知一切世間難信之法，故現斯瑞。

E 3 廣舉曾見以答 (分三)

F 1 引一佛同 (分三)

G 1 時節 諸善男子！如過去無量無邊不可思議阿僧祇劫，

G 2 標名 爾時有佛，號日月燈明如來、應供、正遍知、明行足、善逝、世間解、無上士、調御丈夫、天人師、佛、世尊。

G 3 說法 演說正法，初善、中善、後善，其義深遠，其語巧妙，純一無雜，具足清白梵行之相。為求聲聞者，說應四諦法；度生老病



死，究竟涅槃。為求辟支佛者，說應十二因緣法。為諸菩薩，說應六波羅蜜；令得阿耨多羅三藐三菩提，成一切種智。

F<sub>2</sub> 引二萬佛同 次復有佛，亦名日月燈明。次復有佛，亦名日月燈明。如是二萬佛皆同一字，號日月燈明，又同一姓，姓頗羅墮。彌勒當知！初佛後佛，皆同一字，名日月燈明；十號具足，所可說法，初中後善。

F<sub>3</sub> 引最後佛同（分三）

G<sub>1</sub> 曾見事與今已同 其最後佛未出家時，有八王子：一名有意，二名善意，三名無量意，四名寶意，五名增意，六名除疑意，七名響意，八名法意；是八王子，威德自在，各領四天下。是諸王子，聞父出家，得阿耨多羅三藐三菩提；悉捨王位，亦隨出家，發大乘意，常修梵行，皆為法師，已於千萬佛所，植諸善本。

G<sub>2</sub> 曾見事與今現同（分二）

H<sub>1</sub> 現瑞同 是時，日月燈明佛說大乘經，名無量義，教菩薩法，佛所

護念。說是經已，即於大眾中結跏趺坐，入於無量義處三昧，身心不動。是時，天雨曼陀羅華、摩訶曼陀羅華、曼殊沙華、摩訶曼殊沙華，而散佛上，及諸大眾；普佛世界，六種震動。爾時會中，比丘、比丘尼，優婆塞、優婆夷，天、龍、夜叉、乾闥婆、阿修羅、迦樓羅、緊那羅、摩睺羅伽、人非人，及諸小王、轉輪聖王等，是諸大眾得未曾有，歡喜合掌，一心觀佛。爾時，如來放眉間白毫相光，照東方萬八千佛土，靡不周遍；如今所見，是諸佛土。

H<sub>2</sub> 疑念同 彌勒當知！爾時會中有二十億菩薩樂欲聽法，是諸菩薩見此光明普照佛土，得未曾有，欲知此光所為因緣？

G<sub>3</sub> 曾見事與今當同（分五）

H<sub>1</sub> 因人說法同 時有菩薩名曰妙光，有八百弟子。是時日月燈明佛從三昧起；因妙光菩薩說大乘經，名妙法蓮華，教菩薩法，佛所護念。

H<sub>2</sub> 時節同 六十小劫，不起於座。時會聽者，亦坐一處，六十小劫，身

心不動，聽佛所說，謂如食頃；是時眾中，無有一人，若身若心而生懈倦。

H<sub>3</sub> 唱滅同 日月燈明佛於六十小劫，說是經已；即於梵、魔、沙門、婆羅門，及天、人、阿修羅眾中，而宣此言：如來於今日中夜，當入無餘涅槃。

H<sub>4</sub> 授記同 時有菩薩名曰德藏，日月燈明佛即授其記，告諸比丘：是德藏菩薩次當作佛，號曰淨身，多陀阿伽度阿羅訶三藐三佛陀。

H<sub>5</sub> 滅後通經同（分三）

I<sub>1</sub> 正明入滅 佛授記已，便於中夜，入無餘涅槃。

I<sub>2</sub> 明滅後通經利益 佛滅度後，妙光菩薩持妙法蓮華經，滿八十小劫，為人演說。日月燈明佛八子，皆師妙光；妙光教化，令其堅固阿耨多羅三藐三菩提。是諸王子，供養無量百千萬億佛已，皆成佛道；其最後成佛者，名曰然燈。八百弟子中有一

人，號曰求名，貪著利養；雖復讀誦眾經而不利，多所忘失，故號求名。是人亦以種諸善根因緣故，得值無量百千萬億諸佛，供養恭敬，尊重讚歎。

I 3 結會古今 彌勒當知！爾時妙光菩薩豈異人乎？我身是也。求名菩薩，汝身是也。

E 4 分明判答 今見此瑞與本無異，是故惟忖：今日如來當說大乘經，名妙法蓮華，教菩薩法，佛所護念。

D 2 重頌（分二）

E 1 頌廣舉曾見以答（分二）

F 1 頌一佛同 爾時，文殊師利於大眾中，欲重宣此義，而說偈言：

我念過去世 無量無數劫 有佛人中尊 號日月燈明  
世尊演說法 度無量眾生 無數億菩薩 令人佛智慧

F 2 頌最後佛同（分三）

G 1 頌曾見事與今已同 佛未出家時 所生八王子 見大聖出家 亦隨修梵行

G 2 頌曾見事與今現同（分二）

H 1 頌現瑞同（分二）

I 1 頌此土六瑞同

時佛說大乘經名無量義於諸大眾中而為廣分別  
佛說此經已即於法座上跏趺坐三昧名無量義處  
天雨曼陀華天鼓自然鳴諸天龍鬼神供養人中尊  
一切諸佛土即時大震動佛放眉間光現諸稀有事

I 2 頌他土六瑞同

此光照東方萬八千佛土示一切眾生生死業報處  
有見諸佛土以眾寶莊嚴琉璃玻瓈色斯由佛光照  
及見諸天人龍神夜叉眾乾闥緊那羅各供養其佛  
又見諸如來自然成佛道身色如金山端嚴甚微妙  
如淨琉璃中內現真金像世尊在大眾敷演深法義  
一一諸佛土聲聞眾無數因佛光所照悉見彼大眾  
或有諸比丘在於山林中精進持淨戒猶如護明珠  
又見諸菩薩行施忍辱等其數如恆沙斯由佛光照  
又見諸菩薩深入諸禪定身心寂不動以求無上道

又見諸菩薩 知法寂滅相 各於其國土 說法求佛道

H 2 頌疑念同 爾時四部眾 見日月燈佛 現大神通力 其心皆歡喜

各各自相問 是事何因緣

G 3 頌曾見事與今當同（分五）

H 1 頌因人說法同 天人所奉尊 適從三昧起 讚妙光菩薩 汝為世間眼

一切所歸信 能奉持法藏 如我所說法 唯汝能證知

世尊既讚歎 令妙光歡喜 說是法華經

H 2 頌時節同 滿六十小劫 不起於此座 所說上妙法

是妙光法師 悉皆能受持

H 3 頌唱滅同 佛說是法華 令眾歡喜已 尋即於是日 告於天人眾

諸法實相義 已為汝等說 我今於中夜 當入於涅槃

汝一心精進 當離於放逸 諸佛甚難值 億劫時一遇

世尊諸子等 聞佛入涅槃 各各懷悲惱 佛滅一何速

聖主法之王 安慰無量眾 我若滅度時 汝等勿憂怖

H 4 頌授記同 是德藏菩薩 於無漏實相 心已得通達

其次當作佛 號曰為淨身 亦度無量眾

H 5 頌滅後通經同（分三）

I 1 頌示滅後通經 佛此夜滅度 如薪盡火滅 分布諸舍利 而起無量塔

比丘比丘尼 其數如恆沙 倍復加精進 以求無上道

是妙光法師 奉持佛法藏 八十小劫中 廣宣法華經

I 2 頌教化弟子 是諸八王子 妙光所開化 堅固無上道 當見無數佛

供養諸佛已 隨順行大道 相繼得成佛 轉次而授記

最後天中天 號曰燃燈佛 諸仙之導師 度脫無量眾

是妙光法師 時有一弟子 心常懷懈怠 貪著於名利

求名利無厭 多遊族姓家 棄捨所習誦 廢忘不通利

以是因緣故 號之為求名 亦行眾善業 得見無數佛

供養於諸佛 隨順行大道 具六波羅蜜 今見釋師子

其後當作佛 號名曰彌勒 廣度諸眾生 其數無有量

I 3 頌結會古今 彼佛滅度後 懈怠者汝是 妙光法師者 今則我身是

E 2 頌分明判答 我見燈明佛 本光瑞如此 以是知今佛 欲說法華經

今相如本瑞 是諸佛方便 今佛放光明 助發實相義  
諸人今當知 合掌一心待 佛當雨法雨 充足求道者  
諸求三乘人 若有疑悔者 佛當為除斷 令盡無有餘



妙法蓮華經 卷一

# 方便品第二



A 2 正宗分（分四）

B 1 開佛知見（方便品至法師品）（分二）

C 1 入品說三周法授三根記（分二）

D 1 略開三顯一動執生疑（分二）

E 1 略開顯（分二）

F 1 長行重頌歎佛二智（分二）

G 1 長行（分二）

H 1 寄言歎二智（分二）

I 1 明諸佛權實 爾時，世尊從三昧安詳而起，告舍利弗：諸佛智慧甚深無量，其智慧門，難解難入，一切聲聞、辟支佛所不能知。所以者何？佛曾親近百千萬億無數諸佛，盡行諸佛無量道法，勇猛精進，名稱普聞；成就甚深未曾有法，隨宜所說，意趣難解。

I 2 明釋迦權實 舍利弗！吾從成佛以來，種種因緣，種種譬喻，廣演言教，無數方便引導眾生，令離諸著。所以者何？

如來方便知見波羅蜜，皆已具足。

舍利弗！如來知見，廣大深遠。無量無礙，力無所畏；禪定解脫三昧，深入無際，成就一切未曾有法。

## H 2 絕言歎二智（分二）

I 1 舉絕歎之由 舍利弗！如來能種種分別，巧說諸法，言辭柔軟，悅可眾心。舍利弗！取要言之，無量無邊未曾有法，佛悉成就。

I 2 正絕言歎 止！舍利弗！不須復說。所以者何？佛所成就第一稀有難解之法，唯佛與佛乃能究盡諸法實相；所謂諸法，如是相、如是性、如是體、如是力、如是作、如是因、如是緣、如是果、如是報、如是本末究竟等。

## G 2 重頌（分二）

### H 1 頌寄言歎二智（分二）

I 1 合頌歎二佛二智 爾時，世尊欲重宣此義，而說偈言：

世雄不可量 諸天及世人 一切眾生類 無能知佛者

佛力無所畏 解脫諸三昧 及佛諸餘法 無能測量者

I 2 合頌二佛釋歎結歎

本從無數佛 具足行諸道 甚深微妙法 難見難可了  
於無量億劫 行此諸道已 道場得成果 我已悉知見

H 2 頌絕言歎二智(分三)

I 1 頌釋止歎意 如是大果報 種種性相義 我及十方佛 乃能知是事

I 2 正頌絕言歎(分七)

J 1 許信力能解

是法不可示 言辭相寂滅 諸餘眾生類 無有能得解  
除諸菩薩眾 信力堅固者

J 2 揀二乘不知

諸佛弟子眾 曾供養諸佛 一切漏已盡 住是最後身  
如是諸人等 其力所不堪

J 3 揀身子不知

假使滿世間 皆如舍利弗 盡思共度量 不能測佛智

J 4 揀大弟子不知

正使滿十方 皆如舍利弗 及餘諸弟子 亦滿十方剎  
盡思共度量 亦復不能知

J 5 揀辟支佛不知

辟支佛利智 無漏最後身 亦滿十方界 其數如竹林  
斯等共一心 於億無量劫 欲思佛實智 莫能知少分

J 6 揀發心菩薩不知

新發意菩薩 供養無數佛 了達諸義趣 又能善說法  
如稻蔴竹葦 充滿十方剎 一心以妙智 於恆河沙劫  
咸皆共思量 不能知佛智

J 7 揀不退菩薩不知

不退諸菩薩 其數如恆沙 一心共思求 亦復不能知

I 3 追頌絕言境 又告舍利弗 無漏不思議 甚深微妙法 我今已具得

唯我知是相 十方佛亦然

F 2 偈頌正略開顯動執生疑（分二）

G 1 明諸佛顯實 舍利弗當知 諸佛語無異 於佛所說法 當生大信力

世尊法久後 要當說真實

G 2 明釋迦開三 告諸聲聞眾 及求緣覺乘 我令脫苦縛 速得涅槃者

佛以方便力 示以三乘教 眾生處處著 引之令得出

E 2 騰疑致請(分二)

F 1 經家敘疑 爾時，大眾中有諸聲聞、漏盡阿羅漢，阿若憍陳如等千二百人；及發聲聞辟支佛心，比丘、比丘尼、優婆塞、優婆夷，各作是念：今者世尊，何故殷勤稱歎方便，而作是言。佛所得法，甚深難解，有所言說，意趣難知，一切聲聞、辟支佛所不能及。佛說一解脫義，我等亦得此法到於涅槃，而今不知是義所趣。

F 2 當機請決(分五)

G 1 初請(分二)

H 1 長行(分二)

I 1 陳疑 爾時，舍利弗知四眾心疑，自亦未了，而白佛言：世尊！

何因何緣，殷勤稱歎諸佛第一方便，甚深微妙難解之法？

I 2 陳請 我自昔來，未曾從佛聞如是說；今者，四眾咸皆有疑。惟願世尊，敷演斯事。世尊何故，殷勤稱歎甚深微妙難解之法？

### H 1 重頌（分五）

I 1 頌疑二智 爾時，舍利弗欲重宣此義，而說偈言：

慧曰大聖尊 久乃說是法

自說得如是 力無畏三昧 禪定解脫等 不可思議法

道場所得法 無能發問者 我意難可測 亦無能問者

無問而自說 稱歎所行道 智慧甚微妙 諸佛之所得

I 2 頌三乘四眾疑 無漏諸羅漢 及求涅槃者 今皆墮疑網 佛何故說是

其求緣覺者 比丘比丘尼 諸天龍鬼神 及乾闥婆等

相視懷猶豫 瞻仰兩足尊 是事為云何 願佛為解說

I 3 頌自疑 於諸聲聞眾 佛說我第一 我今自於智 疑惑不能了

為是究竟法 為是所行道

I 4 頌佛子疑 佛口所生子 合掌瞻仰待 願出微妙音 時為如實說

I<sub>5</sub> 總明同疑致請 諸天龍神等 其數如恆沙 求佛諸菩薩 大數有八萬

又諸萬億國 轉輪聖王至 合掌以敬心 欲聞具足道

G<sub>2</sub> 二止 爾時，佛告舍利弗：止！止！不須復說；若說是事，一切世間

諸天及人，皆當驚疑。

G<sub>3</sub> 二請 舍利弗重白佛言：世尊！惟願說之！惟願說之！所以者何？是

會無數百千萬億阿僧祇眾生，曾見諸佛，諸根猛利，智慧明了，

聞佛所說，則能敬信。

爾時，舍利弗欲重宣此義，而說偈言：

法王無上尊 惟說願勿慮 是會無量眾 有能敬信者

G<sub>4</sub> 三止 佛復止舍利弗：若說是事，一切世間天人阿修羅，皆當驚疑；

增上慢比丘，將墜於大坑。爾時，世尊重說偈言：

止止不須說 我法妙難思 諸增上慢者 聞必不敬信

G<sub>5</sub> 三請 爾時，舍利弗重白佛言：世尊！惟願說之！惟願說之！今此會

中，如我等比，百千萬億，世世已曾從佛受化；如此人等必能

敬信，長夜安隱，多所饒益。



爾時，舍利弗欲重宣此義，而說偈言：

無上兩足尊 願說第一法 我為佛長子 惟垂分別說  
是會無量眾 能敬信此法 佛已曾世世 教化如是等  
皆一心合掌 欲聽受佛語 我等千二百 及餘求佛者  
願為此眾故 惟垂分別說 是等聞此法 則生大歡喜

D<sub>2</sub> 廣開三顯一斷疑生信（分三）

E<sub>1</sub> 法說周（分五）

F<sub>1</sub> 正法說（分二）

G<sub>1</sub> 長行（分三）

H<sub>1</sub> 許 爾時，世尊告舍利弗：汝已殷勤三請，豈得不說。汝今諦聽，善思念之，吾當為汝分別解說。

說此語時，會中有比丘、比丘尼、優婆塞、優婆夷五千人等，即從座起，禮佛而退。所以者何？

此輩罪根深重，及增上慢，未得謂得，未證謂證，有如此失，是以不住。世尊默然而不制止。

爾時，佛告舍利弗：我今此眾，無復枝葉，純有真實。舍利弗！如是增上慢人，退亦佳矣！汝今善聽，當為汝說。

H 2 受旨 舍利弗言：唯然，世尊！願樂欲聞。

H 3 正說（分二）

I 1 明四佛章廣上諸佛權實二智（分二）

J 1 總明諸佛（分四）

K 1 歎法稀有 佛告舍利弗：如是妙法，諸佛如來時乃說之；如優曇鉢華，時一現耳。

K 2 說無虛妄 舍利弗！汝等當信佛之所說，言不虛妄。

K 3 開方便 舍利弗！諸佛隨宜說法，意趣難解。所以者何？我以無數方便、種種因緣、譬喻言辭，演說諸法；是法，非思量分別之所能解，唯有諸佛乃能知之。

K 4 示真實（分四）

L 1 標出世意 所以者何？諸佛世尊，唯以一大事因緣故，出現於世。

L 2 重徵出世意 舍利弗！云何名諸佛世尊，唯以一大事因緣故，出現於世？

L 3 正明出世意（分二）

M 1 明大事因緣 諸佛世尊，欲令眾生開佛知見，使得清淨故，出現於世；欲示眾生佛之知見故，出現於世；欲令眾生悟佛知見故，出現於世；欲令眾生入佛知見道故，出現於世。舍利弗！是為諸佛以一大事因緣故，出現於世。

M 2 明會權歸實 佛告舍利弗！諸佛如來，但教化菩薩，諸有所作，常為一事，唯以佛之知見，示悟眾生。

舍利弗！如來但以一佛乘故，為眾生說法，無有餘乘，若二若三。

L 4 總結出世意 舍利弗！一切十方諸佛，法亦如是。

J 2 別列三世佛（分二）

K 1 別明三佛開權顯實（分三）

L 1 明過去佛 舍利弗！過去諸佛，以無量無數方便、種種因緣、譬喻言辭，而為眾生演說諸法，是法皆為一佛乘故。是諸眾生，從諸佛聞法，究竟皆得一切種智。

L 2 明未來佛 舍利弗！未來諸佛當出於世，亦以無量無數方便、種種因緣、譬喻言辭，而為眾生演說諸法，是法皆為一佛乘故。是諸眾生，從佛聞法，究竟皆得一切種智。

L 3 明現在佛 舍利弗！現在十方無量百千萬億佛土中，諸佛世尊，多所饒益，安樂眾生；是諸佛，亦以無量無數方便、種種因緣、譬喻言辭，而為眾生演說諸法，是法皆為一佛乘故。是諸眾生，從佛聞法，究竟皆得一切種智。

K 2 總結諸佛出現大事 舍利弗！是諸佛但教化菩薩，欲以佛之

知見示眾生故，欲以佛之知見悟眾生  
故，欲令眾生入佛之知見故。

I 2 明釋迦章廣前釋迦權實二智（分五）

J 1 開方便 舍利弗！我今亦復如是，知諸眾生有種種欲，深心所  
著；隨其本性，以種種因緣、譬喻言辭、方便力，而  
為說法。

J 2 顯真實 舍利弗！如此，皆為得一佛乘、一切種智故。

舍利弗！十方世界中，尚無二乘，何況有三。

J 3 舉五濁釋權 舍利弗！諸佛出於五濁惡世，所謂劫濁、煩惱濁、  
眾生濁、見濁、命濁。

如是，舍利弗！劫濁亂時，眾生垢重，慳貪嫉  
妬，成就諸不善根故，諸佛以方便力，於一佛  
乘，分別說三。

J 4 揀偽敦信（分二）

K 1 揀別真偽（分二）

L 1 若不聞不知非真弟子 舍利弗！若我弟子，自謂阿羅漢、辟支佛者，不聞不知諸佛如來但教化菩薩事，此非佛弟子、非阿羅漢、非辟支佛。

L 2 若聞不信受成增上慢 又舍利弗！是諸比丘、比丘尼，自謂已得阿羅漢，是最後身，究竟涅槃，便不復志求阿耨多羅三藐三菩提，當知此輩皆是增上慢人。所以者何？若有比丘實得阿羅漢，若不信此法，無有是處。

K 2 開除釋疑 除佛滅度後，現前無佛。所以者何？佛滅度後，如是等經，受持讀誦解義者，是人難得；若遇餘佛，於此法中，便得決了。

J 5 說無虛妄 舍利弗！汝等當一心信解、受持佛語。諸佛如來，

言無虛妄；無有餘乘，唯一佛乘。

G 2 重頌（分二）

H 1 頌上許答 爾時，世尊欲重宣此義，而說偈言：

比丘比丘尼 有懷增上慢 優婆塞我慢 優婆夷不信  
如是四眾等 其數有五千 不自見其過 於戒有缺漏  
護惜其瑕疵 是小智已出 眾中之糟糠 佛威德故去  
斯人尠福德 不堪受是法 此眾無枝葉 唯有諸真實

H 2 頌上正說（分二）

I 1 頌四佛章（分四）

J 1 頌諸佛（分五）

K 1 頌諸佛施權

舍利弗善聽 諸佛所得法 無量方便力 而為眾生說  
眾生心所念 種種所行道 若干諸欲性 先世善惡業  
佛悉知是已 以諸緣譬喻 言辭方便力 令一切歡喜  
或說修多羅 伽陀及本事 本生未曾有 亦說於因緣

譬喻並祇夜 優波提舍經 鈍根樂小法 貪著於生死  
於諸無量佛 不行深妙道 眾苦所惱亂 為是說涅槃

K<sub>2</sub> 頌諸佛顯實(分二)

L<sub>1</sub> 頌大事因緣

我設是方便 令得人佛慧 未曾說汝等 當得成佛道  
所以未曾說 說時未至故 今正是其時 決定說大乘  
我此九部法 隨順眾生說 入大乘為本 以故說是經

L<sub>2</sub> 頌會權歸實

有佛子心淨 柔軟亦利根 無量諸佛所 而行深妙道  
為此諸佛子 說是大乘經 我記如是人 來世成佛道  
以深心念佛 修持淨戒故 此等聞得佛 大喜充遍身  
佛知彼心行 故為說大乘 聲聞若菩薩 聞我所說法  
乃至於一偈 皆成佛無疑  
十方佛土中 唯有一乘法 無二亦無三 除佛方便說  
但以假名字 引導於眾生 說佛智慧故 諸佛出於世



唯此一事實 餘二則非真 終不以小乘 濟度於眾生  
佛自住大乘 如其所得法 定慧力莊嚴 以此度眾生  
自證無上道 大乘平等法 若以小乘化 乃至於一人  
我則墮慳貪 此事為不可

K<sub>3</sub> 頌諸佛勸信（分二）

L<sub>1</sub> 舉果勸信

若人信歸佛 如來不欺誑 亦無貪嫉意 斷諸法中惡  
故佛於十方 而獨無所畏 我以相嚴身 光明照世間  
無量所眾尊 為說實相印

L<sub>2</sub> 舉因勸信

舍利弗當知 我本立誓願 欲令一切眾 如我等無異  
如我昔所願 今者已滿足 化一切眾生 皆令人佛道

K<sub>4</sub> 頌諸佛五濁開（分四）

L<sub>1</sub> 總明五濁障大

若我遇眾生 盡教以佛道 無智者錯亂 迷惑不受教

L<sub>2</sub> 別明五濁障大（分五）

M<sub>1</sub> 明眾生濁

我知此眾生 未曾修善本 堅著於五欲 癡愛故生惱  
以諸欲因緣 墜墮三惡道 輪迴六趣中 備受諸苦毒

M<sub>2</sub> 明命濁

受胎之微形 世世常增長 薄德少福人 眾苦所逼迫

M<sub>3</sub> 明見濁

入邪見稠林 若有若無等 依止此諸見 具足六十二

M<sub>4</sub> 明煩惱濁

深著虛妄法 堅受不可捨 我慢自矜高 諂曲心不實

M<sub>5</sub> 明劫濁

於千萬億劫 不聞佛名字 亦不聞正法 如是人難度

L<sub>3</sub> 明為五濁故說小

是故舍利弗 我為設方便 說諸盡苦道 示之以涅槃

L<sub>4</sub> 明為大故施小

我雖說涅槃 是亦非真滅 諸法從本來 常自寂滅相  
佛子行道已 來世得作佛

K<sub>5</sub> 頌諸佛不虛

我有方便力 開示三乘法 一切諸世尊 皆說一乘道  
今此諸大眾 皆應除疑惑 諸佛語無異 唯一無二乘

J<sub>2</sub> 頌過去佛（分二）

K<sub>1</sub> 略頌開顯

過去無數劫 無量滅度佛 百千萬億種 其數不可量  
如是諸世尊 種種緣譬喻 無數方便力 演說諸法相  
是諸世尊等 皆說一乘法 化無量眾生 令人於佛道

K<sub>2</sub> 廣頌開顯（分二）

L<sub>1</sub> 總明方便助顯

又諸大聖主 知一切世間 天人群生類 深心之所欲  
更以異方便 助顯第一義

L<sub>2</sub> 別示開顯之相（分二）

M 1 約眾善顯緣因功德 (分七)

N 1 約六度明開顯

若有眾生類 值諸過去佛 若聞法布施 或持戒忍辱  
精進禪智等 種種修福慧 如是諸人等 皆已成佛道

N 2 約悲戀心明開顯

諸佛滅度後 若人善慳心 如是諸眾生 皆已成佛道

N 3 約供舍利明開顯

諸佛滅度已 供養舍利者 起萬億種塔 金銀及玻瓈  
碑磔與瑪瑙 玫瑰琉璃珠 清淨廣嚴飾 莊校於諸塔  
或有起石廟 栴檀及沉水 木檀並餘材 磚瓦泥土等  
若於曠野中 積土成佛廟 乃至童子戲 聚沙為佛塔  
如是諸人等 皆已成佛道

N 4 約造佛像明開顯

若人為佛故 建立諸形像 刻雕成眾相 皆已成佛道  
或以七寶成 鍮鈿赤白銅 白鐵及鉛錫 鐵木及與泥

或以膠漆布 嚴飾作佛像 如是諸人等 皆已成佛道

N 5 約畫佛像明開顯

彩畫作佛像 百福莊嚴相 自作若使人 皆已成佛道  
乃至童子戲 若草木及筆 或以指爪甲 而畫作佛像  
如是諸人等 漸漸積功德 具足大悲心 皆已成佛道  
但化諸菩薩 度脫無量眾

N 6 約供塔像明開顯

若人於塔廟 寶像及畫像 以華香幡蓋 敬心而供養  
若使人作樂 擊鼓吹角貝 簫笛琴箏篪 琵琶鐃銅鈸  
如是眾妙音 盡持以供養  
或以歡喜心 歌唄頌佛德 乃至一小音 皆已成佛道  
若人散亂心 乃至以一華 供養於畫像 漸見無數佛  
或有人禮拜 或復但合掌 乃至舉一手 或復小低頭  
以此供養像 漸見無量佛 自成無上道 廣度無數眾  
人無餘涅槃 如薪盡火滅

N<sub>7</sub> 約稱佛名明開顯

若人散亂心 入於塔廟中 一稱南無佛 皆已成佛道

M<sub>2</sub> 約聞經顯了因功德

於諸過去佛 在世或滅後 若有聞是法 皆已成佛道

J<sub>3</sub> 頌未來佛(分二)

K<sub>1</sub> 頌施權 未來諸世尊 其數無有量 是諸如來等 亦方便說法

K<sub>2</sub> 頌顯實(分三)

L<sub>1</sub> 正明顯一

一切諸如來 以無量方便 度脫諸眾生 入佛無漏智  
若有聞法者 無一不成佛

L<sub>2</sub> 明佛本願

諸佛本誓願 我所行佛道 普欲令眾生 亦同得此道

L<sub>3</sub> 重明開顯

未來世諸佛 雖說百千億 無數諸法門 其實為一乘  
諸佛兩足尊 知法常無性 佛種從緣起 是故說一乘

是法住法位 世間相常住 於道場知己 導師方便說

J 4 頌現在佛（分三）

K 1 標出世意 天人所供養 現在十方佛 其數如恆沙 出現於世間  
安隱眾生故 亦說如是法

K 2 頌顯實 知第一寂滅 以方便力故 雖示種種道 其實為佛乘  
K 3 頌開權 知眾生諸行 深心之所念 過去所習業 欲性精進力  
及諸根利鈍 以種種因緣 譬喻亦言辭 隨應方便說

I 1 頌釋迦佛章（分二）

J 1 總頌開權顯實（分二）

K 1 頌顯實 今我亦如是 安隱眾生故 以種種法門 宣示於佛道  
K 2 頌開權 我以智慧力 知眾生性欲 方便說諸法 皆令得歡喜  
J 2 別頌開顯六義（分六）

K 1 頌五濁 舍利佛當知 我以佛眼觀 見六道眾生 貧窮無福慧  
人生死險道 相續苦不斷 深著於五欲 如犛牛愛尾  
以貪愛自蔽 盲暝無所見

不求大勢佛 及與斷苦法 深入諸邪見 以苦欲捨苦  
為是眾生故 而起大悲心

K<sub>2</sub> 頌施權 (分二)

L<sub>1</sub> 念用大乘擬宜不得 (分三)

M<sub>1</sub> 明用大擬宜

我始坐道場 觀樹亦經行 於三七日中 思惟如是事  
我所得智慧 微妙最第一

M<sub>2</sub> 明眾生無機 (分二)

N<sub>1</sub> 明障重不堪聞大

眾生諸根鈍 著樂癡所盲 如斯之等類 云何而可度

N<sub>2</sub> 明梵王請佛說法

爾時諸梵王 及諸天帝釋 護世四天王 及大自在天  
並餘諸天眾 眷屬百千萬 恭敬合掌禮 請我轉法輪

M<sub>3</sub> 明念欲息化

我即自思惟 若但讚佛乘 眾生沒在苦 不能信是法



破法不信故 墜於三惡道 我寧不說法 疾入於涅槃

L<sub>2</sub> 念同諸佛三乘隨宜(分二)

M<sub>1</sub> 明化得(分四)

N<sub>1</sub> 明三乘擬宜

尋念過去佛 所行方便力 我今所得道 亦應說三乘

N<sub>2</sub> 明有小機(分二)

○<sub>1</sub> 明諸佛讚善

作是思惟時 十方佛皆現 梵音慰喻我 善哉釋迦文  
第一之導師 得是無上法 隨諸一切佛 而用方便力  
我等亦皆得 最妙第一法 為諸眾生類 分別說三乘  
少智樂小法 不自信作佛 是故以方便 分別說諸果  
雖復說三乘 但為教菩薩

○<sub>2</sub> 明釋迦酬順

舍利弗當知 我聞聖師子 深淨微妙音 稱南無諸佛  
復作如是念 我出濁惡世 如諸佛所說 我亦隨順行

N<sub>3</sub> 正明施化

思惟是事已 即趣波羅奈 諸法寂滅相 不可以言宣  
以方便力故 為五比丘說

N<sub>4</sub> 明受行悟入

是名轉法輪 便有涅槃音 及以阿羅漢 法僧差別名  
M<sub>2</sub> 釋疑 從久遠劫來 讚示涅槃法 生死苦永盡 我常如是說

K<sub>3</sub> 頌顯實（分四）

L<sub>1</sub> 大乘機動

舍利弗當知 我見佛子等 志求佛道者 無量千萬億  
咸以恭敬心 皆來至佛所 曾從諸佛聞 方便所說法

L<sub>2</sub> 明佛歡喜

我即作是念 如來所以出 為說佛慧故 今正是其時  
舍利弗當知 鈍根小智人 著相憍慢者 不能信是法  
今我喜無畏

L<sub>3</sub> 正明顯實 於諸菩薩中 正直捨方便 但說無上道

L 4 受行悟入

菩薩聞是法 疑網皆已除 千二百羅漢 悉亦當作佛

K 4 頌歎法稀有

如三世諸佛 說法之儀式 我今亦如是 說無分別法  
諸佛興出世 懸遠值遇難 正使出於世 說是法復難  
無量無數劫 聞是法亦難 能聽是法者 斯人亦復難  
譬如優曇華 一切皆愛樂 天人所稀有 時時乃一出  
聞法歡喜讚 乃至發一言 則為已供養 一切三世佛  
是人甚稀有 過於優曇華

K 5 頌不虛 汝等勿有疑 我為諸法王 普告諸大眾 但以一乘道

教化諸菩薩 無聲聞弟子

汝等舍利弗 聲聞及菩薩 當知是妙法 諸佛之秘要

K 6 頌揀偽敦信 (分二)

L 1 頌揀偽 以五濁惡世 但樂著諸欲 如是等眾生 終不求佛道  
當來世惡人 聞佛說一乘 迷惑不信受 破法墮惡道

L<sub>2</sub> 頌敦信

有慚愧清淨 志求佛道者 當為如是等 廣讚一乘道  
舍利弗當知 諸佛法如是 以萬億方便 隨宜而說法  
其不習學者 不能曉了此  
汝等既已知 諸佛世之師 隨宜方便事 無復諸疑惑  
心生大歡喜 自知當作佛

妙法蓮華經 卷二

# 譬喻品第三



F 2 身子領解（分二）

G 1 經家敘置 爾時，舍利弗踊躍歡喜，即起合掌，瞻仰尊顏，而白佛言。

G 2 身子自陳（分二）

H 1 長行（分五）

I 1 總標聞法得解 今從世尊聞此法音，心懷踊躍，得未曾有。

I 2 明昔日之失，顯今日之得

所以者何？我昔從佛聞如是法，見諸菩薩受記作佛，而我等不預斯事，甚自感傷。失於如來無量知見。

I 3 明昔日之疑，顯今日之解

世尊！我常獨處山林樹下，若坐若行，每作是念：我等同入法性，云何如來以小乘法而見濟度？是我等咎，非世尊也。所以者何？若我等待說所因，成就阿耨多羅三藐三菩提者，必以大乘而得度脫。然我等不解方便隨宜所說，初聞佛法，遇便信受，思惟取證。

I 4 明昔日之疑悔，今日疑悔斷盡

世尊！我從昔來，終日竟夜，每自剋責。而今從佛聞所未聞未曾有法，斷諸疑悔，身意泰然，快得安隱。

I 5 結成領解，自肯承當

今日乃知真是佛子，從佛口生，從法化生，得佛法分。

H 2 重頌（分二）

I 1 頌上長行（分四）

J 1 頌總標聞法得解 爾時，舍利弗欲重宣此義，而說偈言：

我聞是法音 得所未曾有 心懷大歡喜 疑網皆已除  
J 2 頌昔失今得 昔來蒙佛教 不失於大乘 佛音甚稀有 能除眾生惱  
我已得漏盡 聞亦除憂惱

J 3 頌昔疑今解 我處於山谷 或在林樹下 若坐若經行 常思惟是事  
嗚呼深自責 云何而自欺

我等亦佛子 同人無漏法 不能於未來 演說無上道  
金色三十二 十力諸解脫 同共一法中 而不得此事  
八十種妙好 十八不共法 如是等功德 而我皆已失

我獨經行時 見佛在大眾 名聞滿十方 廣饒益眾生  
自惟失此利 我為自欺誑

J 4 頌昔悔今斷

我常於日夜 每思惟是事 欲以問世尊 為失為不失  
我常見世尊 稱讚諸菩薩 以是於日夜 籌量如是事  
今聞佛音聲 隨宜而說法 無漏難思議 令眾至道場  
我本著邪見 為諸梵志師 世尊知我心 拔邪說涅槃  
我悉除邪見 於空法得證 爾時心自謂 得至於滅度  
而今乃自覺 非是實滅度 若得作佛時 具三十二相  
天人夜叉眾 龍神等恭敬 是時乃可謂 永盡滅無餘  
佛於大眾中 說我當作佛 聞如是法音 疑悔悉已除

I 2 行頌領前廣略開顯之文(分二)

J 1 追敘疑悔

初聞佛所說 心中大驚疑 將非魔作佛 惱亂我心耶

J 2 敘今領解

佛以種種緣 譬喻巧言說 其心安如海 我聞疑網斷

佛說過去世 無量滅度佛 安住方便中 亦皆說是法  
現在未來佛 其數無有量 亦以諸方便 演說如是法



如今者世尊 從生及出家 得道轉法輪 亦以方便說  
世尊說實道 波旬無此事 以是我定知 非是魔作佛  
我墮疑網故 謂是魔所為 聞佛柔軟音 深遠甚微妙  
演暢清淨法 我心大歡喜 疑悔永已盡 安住實智中  
我定當作佛 為天人所敬 轉無上法輪 教化諸菩薩

F<sub>3</sub> 如來述成（分三）

G<sub>1</sub> 昔曾教大 爾時，佛告舍利弗：吾今於天、人、沙門、婆羅門等大眾  
中說，我昔曾於二萬億佛所，為無上道故，常教化汝，汝  
亦長夜隨我受學。我以方便引導汝故，生我法中。

G<sub>2</sub> 中忘取小 舍利弗！我昔教汝志願佛道，汝今悉忘，而便自謂已得滅  
度。

G<sub>3</sub> 還為說大 我今還欲令汝憶念本願所行道故，為諸聲聞說是大乘經，  
名妙法蓮華，教菩薩法，佛所護念。

F<sub>4</sub> 與之授記（分二）

G<sub>1</sub> 長行（分八）

H 1 明時節因行並得果 舍利弗！汝於未來世過無量無邊不可思議劫，供養若干千萬億佛，奉持正法，具足菩薩所行之道，當得作佛，號曰華光如來、應供、正遍知、明行足、善逝、世間解、無上士、調御丈夫、天人師、佛、世尊。

H 2 明國土 國名離垢，其土平正，清淨嚴飾，安隱豐樂，天人熾盛。琉璃為地，有八交道，黃金為繩，以界其側。其旁各有七寶行樹，常有華果。

H 3 明說法 華光如來，亦以三乘教化眾生。舍利弗！彼佛出時，雖非惡世，以本願故，說三乘法。

H 4 明劫號 其劫名大寶莊嚴。何故名曰大寶莊嚴？其國中以菩薩為大寶故。

H 5 明眾數 彼諸菩薩無量無邊，不可思議，算數譬喻所不能及，非佛智力，無能知者。若欲行時，寶華承足。此諸菩薩非初發意，皆久植德本，於無量百千萬億佛所，淨修梵行，恆為

諸佛之所稱歎。常修佛慧，具大神通，善知一切諸法之門，質直無偽，志念堅固。如是菩薩，充滿其國。

H 6 明壽量 舍利弗！華光佛壽十二小劫，除為王子未作佛時。其國人  
民，壽八小劫。

H 7 轉記補處 華光如來，過十二小劫，授堅滿菩薩阿耨多羅三藐三菩提記。告諸比丘，是堅滿菩薩，次當作佛，號曰華足安行，多陀阿伽度阿羅訶三藐三佛陀，其佛國土，亦復如是。

H 8 法住久近 舍利弗！是華光佛滅度之後，正法住世，三十二小劫；  
像法住世，亦三十二小劫。

### G 2 重頌（分二）

H 1 頌上長行（分五）

I 1 頌得果並因行 爾時，世尊欲重宣此義，而說偈言：

舍利弗來世 成佛普智尊 號名曰華光 當度無量眾  
供養無數佛 具足菩薩行 十力等功德 證於無上道

I 2 頌時節並劫名與國土

過無量劫已 劫名大寶嚴 世界名離垢 清淨無瑕穢  
以琉璃為地 金繩界其道 七寶雜色樹 常有華果實  
I 3 頌眾數並說法 彼國諸菩薩 志念常堅固 神通波羅蜜 皆已悉具足  
於無數佛所 善學菩薩道 如是等大士 華光佛所化

I 4 頌壽量 佛為王子時 棄國捨世榮 於最末後身 出家成佛道

華光佛住世 壽十二小劫 其國人民眾 壽命八小劫

I 5 頌法住久近 佛滅度之後 正法住於世 三十二小劫 廣度諸眾生

正法滅盡已 像法三十二 舍利廣流布 天人普供養

H 2 結歎 華光佛所為 其事皆如是 其兩足聖尊 最勝無倫匹

彼即是汝身 宜應自欣慶

F 5 四眾歡喜(分二)

G 1 長行(分二)

H 1 經家敘置(分二)

I 1 敘眾喜 爾時，四部眾比丘、比丘尼、優婆塞、優婆夷、天、龍、

夜叉、乾闥婆、阿修羅、迦樓羅、緊那羅、摩睺羅伽等大衆，見舍利弗於佛前受阿耨多羅三藐三菩提記，心大歡喜，踊躍無量。

I 2 敘供養 各各脫身所著上衣，以供養佛。釋提桓因、梵天王等，與無數天子，亦以天妙衣、天曼陀羅華、摩訶曼陀羅華等，供養於佛。所散天衣，住虛空中，而自迴轉。諸天伎樂，百千萬種，於虛空中，一時俱作，雨衆天華，

H 2 眾領解 而作是言：佛昔於波羅奈，初轉法輪，今乃復轉無上最大法輪。

### G 2 重頌（分二）

H 1 頌上長行開權顯實 爾時，諸天子欲重宣此義，而說偈言：

昔於波羅奈 轉四諦法輪 分別說諸法 五眾之生滅  
今復轉最妙 無上大法輪 是法甚深奧 少有能信者  
H 2 自述得解隨喜迴向

我等從昔來 數聞世尊說 未曾聞如是 深妙之上法

世尊說是法 我等皆隨喜

大智舍利弗 今得受尊記 我等亦如是 必當得作佛  
於一切世間 最尊無有上 佛道叵思議 方便隨宜說  
我所有福業 今世若過世 及見佛功德 盡迴向佛道

E 2 譬說周（分四）

F 1 正譬開三顯一（分二）

G 1 身子代請（分三）

H 1 自述得記無疑 爾時，舍利弗白佛言：世尊！我今無復疑悔，親於佛前，得受阿耨多羅三藐三菩提記。

H 2 兼述同輩有惑 是諸千二百心自在者，昔住學地，佛常教化言：我法能離生老病死，究竟涅槃。是學無學人，亦各自以離我見及有無見等，謂得涅槃。而今於世尊前，聞所未聞，皆墮疑惑。

H 2 普為四眾代請 善哉！世尊！願為四眾說其因緣，令離疑悔。

G 2 如來垂答（分三）

H 1 抑揚發起 爾時，佛告舍利弗：我先不言，諸佛世尊以種種因緣、譬喻言辭、方便說法，皆為阿耨多羅三藐三菩提耶？是諸所說，皆為化菩薩故。然舍利弗！今當復以譬喻更明此義，諸有智者，以譬喻得解。

## H 2 正說譬喻（分二）

### I 1 長行（分二）

#### J 1 喻說（分二）

#### K 1 總喻（分五）

L 1 長者喻 舍利弗！若國邑聚落有大長者，其年衰邁，財富無量，多有田宅及諸僮僕。

L 2 舍宅並一門喻 其家廣大，唯有一門。

L 3 五百人喻 多諸人眾，一百、二百，乃至五百人，止住其中。

L 4 火起喻 堂閣朽故，牆壁隕落，柱根腐敗，梁棟傾危，周匝俱時欻然火起，焚燒舍宅。

L 5 十子喻 長者諸子，若十、二十，或至三十，在此宅中。

K<sub>2</sub> 別喻（分四）

L<sub>1</sub> 長者見火喻 長者見是大火，從四面起，即大驚怖，而作是念：我雖能於此所燒之門，安穩得出；而諸子等，於火宅內，樂著嬉戲，不覺不知，不驚不怖，火來逼身，苦痛切己，心不厭患，無求出意。

L<sub>2</sub> 捨几用車喻（分二）

M<sub>1</sub> 捨几喻（分二）

N<sub>1</sub> 勸門擬宜不得 舍利弗！是長者作是思惟：我身手有力，當以衣裓，若以几案，從舍出之。復更思惟：是舍唯有一門，而復陋小。諸子幼稚，未有所識，戀著戲處，或當墮落，為火所燒。

N<sub>2</sub> 誠門擬宜不得 我當為說怖畏之事，此舍已燒，宜時疾出，無令為火之所燒害。作是念



已，如所思惟，具告諸子，汝等速出。

父雖憐愍，善言誘喻，而諸子等樂著嬉戲，不肯信受，不驚不畏，了無出心。亦復不知何者是火，何者為舍，云何為失，但東西走，戲視父而已。

#### M<sub>2</sub> 用車喻（分四）

N<sub>1</sub> 擬宜三車喻 爾時，長者即作是念：此舍已為大火所燒，我及諸子若不時出，必為所焚，我今當設方便，令諸子等得免斯害。

N<sub>2</sub> 知子先心所好喻 父知諸子，先心各有所好種種珍玩奇異之物，情必樂著，

N<sub>3</sub> 歎三車稀有喻 而告之言：汝等所可玩好，稀有難得，汝若不取，後必憂悔。如此種種羊車、鹿車、牛車，今在門外，可以遊戲。汝等於此火宅，宜速出來，隨汝

所欲，皆當與汝。

N<sub>4</sub> 適子所願喻 爾時，諸子聞父所說珍玩之物，適其願故，心各勇銳，互相推排，競共馳走，爭出火宅。

L<sub>3</sub> 等賜大車喻（分四）

M<sub>1</sub> 父見諸子免難歡喜喻 是時，長者見諸子等安穩得出，皆於四衢道中，露地而坐，無復障礙，其心泰然，歡喜踊躍。

M<sub>2</sub> 諸子索車喻 時諸子等各白父言：父先所許玩好之具，羊車、鹿車、牛車，願時賜與。

M<sub>3</sub> 等賜諸子大車喻（分三）

N<sub>1</sub> 標章 舍利弗！爾時長者，各賜諸子，等一大車。

N<sub>2</sub> 廣明車等（分二）

O<sub>1</sub> 明車之體相 其車高廣，眾寶莊校，周匝欄楯，四面懸鈴，又於其上張設幟蓋，亦以

珍奇雜寶而嚴飾之，寶繩交絡，垂諸華纓，重敷婉筵，安置丹枕。駕以白牛，膚色充潔，形體姝好，有大筋力，行步平正，其疾如風。又多僕從而侍衛之。

O<sub>2</sub> 釋有車之由 所以者何？是大長者財富無量，種種諸藏，悉皆充溢。

N<sub>3</sub> 廣明心等 而作是念：我財物無極，不應以下劣小車與諸子等，今此幼童皆是吾子，愛無偏黨，我有如是七寶大車，其數無量，應當等心，各各與之，不宜差別。所以者何？以我此物，周給一國，猶尚不匱，何況諸子。

M<sub>4</sub> 諸子得車歡喜喻 是時諸子各乘大車，得未曾有，非本所望。

L<sub>4</sub> 無須妄喻（分三）

M<sub>1</sub> 如來垂問 舍利弗！於汝意云何？是長者等與諸子珍寶大車，寧有虛妄不？

M<sub>2</sub> 舍利弗答 舍利弗言：不也，世尊！是長者但令諸子得免火難，全其軀命，非為虛妄。何以故？若全身命，便為已得玩好之具，況復方便，於彼火宅而拔濟之。世尊！若是長者乃至不與最小一車，猶不虛妄。何以故？是長者先作是意，我以方便令子得出，以是因緣，無虛妄也。何況長者自知財富無量，欲饒益諸子，等與大車。

M<sub>3</sub> 如來述歎 佛告舍利弗：善哉！善哉！如汝所言。

### J<sub>2</sub> 法合（分二）

K<sub>1</sub> 合總喻 舍利弗！如來亦復如是，則為一切世間之父。於諸怖畏、衰惱、憂患、無明闇蔽，永盡無餘，而悉成就無量知見，力無所畏，有大神力及智慧力，具

足方便智慧波羅蜜，大慈大悲，常無懈倦，恆求善事，利益一切。而生三界朽故火宅，為度眾生，生老病死，憂悲苦惱，愚癡闇蔽，三毒之火，教化令得阿耨多羅三藐三菩提。

K<sub>2</sub> 合別喻（分四）

L<sub>1</sub> 合長者見火喻 見諸眾生，為生老病死憂悲苦惱之所燒煮；亦以五欲財利故，受種種苦；又以貪著追求故，現受眾苦，後受地獄、畜生、餓鬼之苦，若生天上及在人間，貧窮困苦、愛別離苦、怨憎會苦，如是等種種諸苦，眾生沒在其中，歡喜遊戲，不覺不知，不驚不怖，亦不生厭，不求解脫。於此三界火宅，東西馳走，雖遭大苦。不以為患。舍利弗！佛見此已，便作是念：我為眾生之父，應拔其苦難，與無量無邊佛

智慧樂，令其遊戲。

L<sub>2</sub> 合捨几用車喻（分二）

M<sub>1</sub> 合捨几（分二）

N<sub>1</sub> 合長者念救 舍利弗！如來復作是念：若我但以神力及智慧力，捨於方便，為諸眾生讚如來知見、力無所畏者，眾生不能以是得度。

N<sub>2</sub> 合諸子不聽 所以者何？是諸眾生，未免生老病死憂悲苦惱，而為三界火宅所燒，何由能解佛之智慧。

M<sub>2</sub> 合用車喻（分二）

N<sub>1</sub> 牒前三喻 舍利弗！如彼長者，雖復身手有力而不用之，但以殷勤方便，勉濟諸子火宅之難，然後各與珍寶大車。

N<sub>2</sub> 正合用車（分三）

○ 1 合擬宜三車並知子先心

如來亦復如是，雖有力無所畏而不用之，但以智慧方便，於三界火宅拔濟眾生，為說三乘，聲聞、辟支佛、佛乘，

○ 2 合歎三車稀有（分三）

P 1 合示相轉 而作是言：汝等莫得樂住三界火宅，勿貪羸弊色聲香味觸也。若貪著生愛，則為所燒。汝速出三界，當得三乘，聲聞、辟支佛、佛乘，

P 2 合作證轉 我今為汝保任此事，終不虛也。

P 3 合勸修轉 汝等但當勤修精進。如來以是方便，誘進眾生，復作是言：汝等當知此三乘法，皆是聖所稱歎，自在無繫，無所依求。乘是三乘，以無漏根、力、覺、道、禪定、解脫、三昧等，而自

娛樂，便得無量安隱快樂。

○3 合適子所願（分三）

P 1 合羊車 舍利弗！若有眾生，內有智性，從佛世尊聞法信受，殷勤精進，欲速出三界，自求涅槃，是名聲聞乘；如彼諸子，為求羊車出於火宅。

P 2 合鹿車 若有眾生，從佛世尊聞法信受，殷勤精進，求自然慧，樂獨善寂，深知諸法因緣，是名辟支佛乘；如彼諸子，為求鹿車出於火宅。

P 3 合牛車 若有眾生，從佛世尊聞法信受，勤修精進，求一切智，佛智、自然智、無師智、如來知見、力、無所畏，愍念安樂無量眾生，利益天人，度脫一切，是名大乘菩薩。求此乘故，名為摩訶薩；如



彼諸子，為求牛車出於火宅。

L<sub>3</sub> 合等賜大車喻（分二）

M<sub>1</sub> 牒前二喻 舍利弗！如彼長者，見諸子等安隱得出火宅，到無畏處，自惟財富無量，等以大車而賜諸子。

M<sub>2</sub> 合二喻（分二）

N<sub>1</sub> 合諸子免難 如來亦復如是，為一切眾生之父，若見無量億千眾生，以佛教門，出三界苦怖畏險道，得涅槃樂。

N<sub>2</sub> 合等賜大車 如來爾時，便作是念：我有無量無邊智慧、力、無畏等諸佛法藏，是諸眾生皆是我子，等與大乘，不令人獨得滅度，皆以如來滅度而滅度之。是諸眾生脫三界者，悉與諸佛禪定解脫等娛樂之具，皆是一相一種，聖所稱歎，能生淨

妙第一之樂。

L<sub>4</sub> 合長者無虛喻（分二）

M<sub>1</sub> 牒前喻 舍利弗！如彼長者，初以三車誘引諸子，然後但與大車，寶物莊嚴，安隱第一，然彼長者無虛妄之咎。

M<sub>2</sub> 正合不虛 如來亦復如是，無有虛妄。初說三乘引導眾生，然後但以大乘而度脫之。何以故？如來有無量智慧、力、無所畏諸法之藏，能與一切眾生大乘之法，但不盡能受。舍利弗！以是因緣，當知諸佛方便力故，於一佛乘，分別說三。

I<sub>2</sub> 重頌（分二）

J<sub>1</sub> 頌喻說（分二）

K<sub>1</sub> 頌總喻（分三）

L<sub>1</sub> 頌長者並家宅喻 佛欲重宣此義，而說偈言：

譬如長者有一大宅 其宅久故 而復頓弊  
堂舍高危 柱根摧朽 梁棟傾斜 基陛隕毀  
牆壁圯坼 泥塗陴落 覆苫亂墜 椽栝差脫  
周障屈曲 雜穢充遍

L<sub>2</sub> 頌五百人喻 有五百人 止住其中

L<sub>3</sub> 頌火起喻 (分四)

M<sub>1</sub> 頌明地上事喻欲界火起 (分四)

N<sub>1</sub> 明所燒之類 鴟梟鷂鷲 烏鵲鳩鴿 蜃蛇蝮蠍 蜈蚣蚰蜒  
守宮百足 鼪狸鼯鼠 諸惡蟲輩 交橫馳走  
屎尿臭處 不淨流溢 蜚螂諸蟲 而集其上  
狐狼野干 咀嚼踐踏 齧嚙死屍 骨肉狼藉  
由是群狗 競來搏撮 飢羸惴惶 處處求食  
鬥諍擅掣 嗥噪嗥吠 其舍恐怖 變狀如是  
處處皆有 魑魅魍魎 夜叉惡鬼 食噉人肉  
毒蟲之屬 諸惡禽獸 孚乳產生 各自藏護

夜叉競來 爭取食之 食之既飽 惡心轉熾  
鬥諍之聲 甚可怖畏 鳩槃荼鬼 蹲踞土埭  
或時離地 一尺二尺 往返遊行 縱逸嬉戲  
捉狗兩足 撲令失聲 以腳加頸 怖狗自樂  
復有諸鬼 其身長大 裸形黑瘦 常住其中  
發大惡聲 叫呼求食 復有諸鬼 其咽如針  
復有諸鬼 首如牛頭 或食人肉 或復噉狗  
頭髮鬢亂 殘害兇險 饑渴所逼 叫喚馳走  
夜叉餓鬼 諸惡鳥獸 饑急四向 窺看窗牖  
如是諸難 恐懼無量

N<sub>2</sub> 明火起之由 是朽故宅 屬於一人 其人近出 未久之間

於後宅舍 忽然火起

N<sub>3</sub> 明火起之勢 四面一時 其燄俱熾 棟梁椽柱 爆聲震裂

摧折墮落 牆壁崩倒

N<sub>4</sub> 明被燒之相 諸鬼神等 揚聲大叫 鷗鷺諸鳥 鳩槃荼等

周樟惶怖 不能自出

M<sub>2</sub> 頌明穴中事喻色界火起（分三）

N<sub>1</sub> 喻所燒之類 惡獸毒蟲 藏竄孔穴 毘舍闍鬼 亦住其中

N<sub>2</sub> 明火起之由並火起之勢

薄福德故 為火所逼 共相殘害 飲血噉肉

N<sub>3</sub> 明被燒之相 野干之屬 並已前死 諸大惡獸 競來食噉

臭煙燄勃 四面充塞

M<sub>3</sub> 頌明穴外事喻無色界火起（分二）

N<sub>1</sub> 明所燒之類 蜈蚣蚰蜒 毒蛇之類 為火所燒 爭走出穴

鳩槃荼鬼 隨取而食

N<sub>2</sub> 明被燒之相 又諸餓鬼 頭上火燃 飢渴熱惱 周樟悶走

M<sub>4</sub> 總結眾難非一 其宅如是 甚可怖畏 毒害火災 眾難非一

K<sub>2</sub> 頌別喻（分三）

L<sub>1</sub> 頌長者見火喻 是時宅主 在門外立 聞有人言 汝諸子等

先因遊戲 來入此宅 稚小無知 歡娛樂著

長者聞已 驚入火宅

L<sub>2</sub> 頌捨几用車喻(分二)

M<sub>1</sub> 頌捨几 方宜救濟 令無燒害 告喻諸子 說眾患難

惡鬼毒蟲 災火蔓延 眾苦次第 相續不絕

毒蛇虻蝮 及諸夜叉 鳩槃荼鬼 野干狐狗

鷓鴣鴟梟 百足之屬 飢渴惱急 甚可怖畏

此苦難處 況復大火

諸子無知 雖聞父誨 猶故樂著 嬉戲不已

M<sub>2</sub> 頌用車(分三)

N<sub>1</sub> 頌擬宜三車 是時長者 而作是念 諸子如此 益我愁惱

今此舍宅 無一可樂 而諸子等 耽湎嬉戲

不受我教 將為火害 即便思惟 設諸方便

N<sub>2</sub> 頌歎三車稀有

告諸子等 我有種種 珍玩之具 妙寶好車

羊車鹿車 大牛之車 今在門外 汝等出來

吾為汝等 造作此車 隨意所樂 可以遊戲  
N<sup>3</sup> 頌適子所願 諸子聞說 如此諸車 即時奔競 馳走而出  
到於空地 離諸苦難

L<sup>3</sup> 頌等賜大車喻（分四）

M<sup>1</sup> 頌父見諸子免難歡喜喻

長者見子 得出火宅 住於四衢 坐師子座  
而自慶言 我今快樂 此諸子等 生育甚難  
愚小無知 而入險宅 多諸毒蟲 魑魅可畏  
大火猛燄 四面俱起 而此諸子 貪著嬉戲  
我已救之 令得脫難 是故諸人 我今快樂

M<sup>2</sup> 頌諸子索車喻

爾時諸子 知父安坐 皆詣父所 而白父言  
願賜我等 三種寶車 如前所許 諸子出來  
當以三車 隨汝所欲 今正是時 惟垂給與

M<sub>3</sub> 頌等賜諸子大車喻

長者大富 庫藏眾多 金銀琉璃 碑磔瑪瑙  
以眾寶物 造諸大車 莊校嚴飾 周匝欄楯  
四面懸鈴 金繩交絡 真珠羅網 張施其上  
金華諸瓔 處處垂下 眾綵雜飾 周匝圍繞  
柔軟繒纈 以為茵蓐 上妙細氎 價值千億  
鮮白淨潔 以覆其上 有大白牛 肥壯多力  
形體姝好 以駕寶車 多諸僮從 而侍衛之  
以是妙車 等賜諸子

M<sub>4</sub> 頌諸子得車歡喜喻

諸子是時 歡喜踊躍 乘是寶車 遊於四方  
嬉戲快樂 自在無礙

J<sub>2</sub> 頌法合（分二）

K<sub>1</sub> 頌合總喻 告舍利弗 我亦如是 眾聖中尊 世間之父  
一切眾生 皆是吾子 深著世樂 無有慧心



三界無安 猶如火宅 眾苦充滿 甚可怖畏  
常有生老 病死憂患 如是等火 熾然不息

K<sub>2</sub> 頌合別喻（分四）

L<sub>1</sub> 頌合長者見火喻

如來已離 三界火宅 寂然閒居 安處林野  
今此三界 皆是我有 其中眾生 悉是吾子  
而今此處 多諸患難 唯我一人 能為救護

L<sub>2</sub> 頌合捨几用車喻（分二）

M<sub>1</sub> 頌合捨几 雖復教詔 而不信受 於諸欲染 貪著深故  
M<sub>2</sub> 頌合用車 以是方便 為說三乘 令諸眾生 知三界苦  
開示演說 出世間道 是諸子等 若心決定  
具足三明 及六神通 有得緣覺 不退菩薩

L<sub>3</sub> 頌合等賜大車喻（分二）

M<sub>1</sub> 頌合等賜 汝舍利弗 我為眾生 以此譬喻 說一佛乘  
汝等若能 信受是語 一切皆當 成得佛道

是乘微妙 清淨第一 於諸世間 為無有上  
佛所悅可 一切眾生 所應稱讚 供養禮拜  
無量億千 諸力解脫 禪定智慧 及佛餘法  
M<sub>2</sub>頌合歡喜 得如是乘 令諸子等 日夜劫數 常得遊戲  
與諸菩薩 及聲聞眾 乘此寶乘 直至道場  
以是因緣 十方諦求 更無餘乘 除佛方便

L<sub>4</sub>頌合無虛妄喻(分二)

M<sub>1</sub>頌合不虛章門 告舍利弗 汝諸人等 皆是吾子 我則是父  
汝等累劫 眾苦所燒 我皆濟拔 令出三界  
我雖先說 汝等滅度 但盡生死 而實不滅  
今所應作 唯佛智慧

M<sub>2</sub>頌合不虛(分三)

N<sub>1</sub>釋同皆是子理應平等  
若有菩薩 於是眾中 能一心聽 諸佛實法  
諸佛世尊 雖以方便 所化眾生 皆是菩薩

N<sub>2</sub> 釋不能受大乃說三乘

若人小智 深著愛欲 為此等故 說於苦諦  
眾生心喜 得未曾有 佛說苦諦 真實無異  
若有眾生 不知苦本 深著苦困 不能暫捨  
為是等故 方便說道 諸苦所因 貪欲為本  
若滅貪欲 無所依止 滅盡諸苦 名第三諦  
為滅諦故 修行於道 離諸苦縛 名得解脫  
是人於何 而得解脫

N<sub>3</sub> 明後若堪能還與其大

但離虛妄 名為解脫 其實未得 一切解脫  
佛說是人 未實滅度  
斯人未得 無上道故 我意不欲 今至滅度  
我為法王 於法自在 安隱眾生 故現於世

H<sub>3</sub> 勸信流通（分二）

I<sub>1</sub> 標兩章 汝舍利弗 我此法印 為欲利益 世間故說

在所遊方 勿妄宣傳

I 2 釋 (分二)

J 1 釋可說不可說 若有聞者 隨喜頂受 當知是人 阿惟越致 若有信受 此經法者 是人已曾 見過去佛 恭敬供養 亦聞是法 若人有能 信汝所說 則為見我 亦見於汝 及比丘僧 並諸菩薩 斯法華經 為深智說 淺識聞之 迷惑不解 一切聲聞 及辟支佛 於此經中 力所不及 汝舍利弗 尚於此經 以信得人 況餘聲聞 其餘聲聞 信佛語故 隨順此經 非己智分

J 2 釋可通不可通 (分二)

K 1 約大悲門莫為惡人說 (分四)

L 1 囑其非機莫說 又舍利佛 憍慢懈怠 計我見者 莫說此經 凡夫淺識 深著五欲 聞不能解 亦勿為說  
L 2 明其謗毀罪因 若人不信 毀謗此經 則斷一切 世間佛種

或復鬻蹙 而懷疑惑 汝當聽說 此人罪報  
若佛在世 若滅度後 其有誹謗 如斯經典  
見有讀誦 書持經者 輕賤憎嫉 而懷結恨  
此人罪報 汝今復聽

L<sub>3</sub> 示其謗毀罪報 (分三)

M<sub>1</sub> 明地獄報 其人命終 入阿鼻獄 具足一劫 劫盡更生  
如是展轉 至無數劫

M<sub>2</sub> 明畜生報 從地獄出 當墮畜生 若狗野干 其形頹瘦  
鰲黷疥癩 人所觸燒 又復為人之所惡賤  
常困飢渴 骨肉枯竭 生受楚毒 死被瓦石  
斷佛種故 受斯罪報 若作駱駝 或生驢中  
身常負重 加諸杖捶 但念水草 餘無所知  
謗斯經故 獲罪如是 有作野干 來入聚落  
身體疥癩 又無一目 為諸童子 之所打擲  
受諸苦痛 或時致死 於此死已 更受蟒身

其形長大 五百由旬 聾駘無足 宛轉腹行  
為諸小蟲 之所啞食 晝夜受苦 無有休息  
謗斯經故 獲罪如是

M<sub>3</sub> 明人報

若得為人 諸根闇鈍 矬陋癡癡 盲聾背偻  
有所言說 人不信受 口氣常臭 鬼魅所著  
貧窮下賤 為人所使 多病瘠瘦 無所依怙  
雖親附人 人不在意 若有所得 尋復忘失  
若修醫道 順方治病 更增他疾 或復致死  
若自有病 無人救療 設服良藥 而復增劇  
若他反逆 抄劫竊盜 如是等罪 橫罹其殃  
如斯罪人 永不見佛 眾聖之王 說法教化  
如斯罪人 常生難處 狂聾心亂 永不聞法  
於無數劫 如恆河沙 生輒聾瘖 諸根不具  
常處地獄 如遊園觀 在餘惡道 如己舍宅  
駝驢豬狗 是其行處 謗斯經故 獲罪如是

若得為人 聾盲瘖瘂 貧窮諸衰 以自莊嚴

水腫乾癆 疥癩癰疽 如是等病 以為衣服

身常臭處 垢穢不淨 深著我見 增益瞋恚

姪欲熾盛 不擇禽獸 謗斯經故 獲罪如是

L<sub>4</sub> 結其大悲莫說 告舍利弗 謗斯經者 若說其罪 窮劫不盡

以是因緣 我故語汝 無智人中 莫說此經

K<sub>2</sub> 約大慈門應為善人說（分二）

L<sub>1</sub> 明五雙善人之相可為宣說（分五）

M<sub>1</sub> 過現一對 若有利根 智慧明了 多聞強識 求佛道者

如是之人 乃可為說 若人曾見 億百千佛

植諸善本 深心堅固 如是之人 乃可為說

M<sub>2</sub> 上下一對 若人精進 常修慈心 不惜身命 乃可為說

若人恭敬 無有異心 離諸凡愚 獨處山澤

如是之人 乃可為說

M<sub>3</sub> 內外一對 又舍利弗 若見有人 捨惡知識 親近善友

如是之人 乃可為說 若見佛子 持戒清潔  
如淨明珠 求大乘經 如是之人 乃可為說  
M<sub>4</sub> 自他一對 若人無瞋 質直柔軟 常愍一切 恭敬諸佛

如是之人 乃可為說 復有佛子 於大眾中  
以清淨心 種種因緣 譬喻言辭 說法無礙  
如是之人 乃可為說

M<sub>5</sub> 始終一對 若有比丘 為一切智 四方求法 合掌頂受  
但樂受持 大乘經典 乃至不受 餘經一偈  
如是之人 乃可為說 如人至心 求佛舍利  
如是求經 得已頂受 其人不復 志求餘經  
亦未曾念 外道典籍 如是之人 乃可為說  
L<sub>2</sub> 總結可說 告舍利弗 我說是相 求佛道者 窮劫不盡  
如是等人 則能信解 汝當為說 妙法華經



妙法蓮華經 卷二

# 信解品第四



F 2 明中根領解（分二）

G 1 經家敘喜 爾時，慧命須菩提、摩訶迦旃延、摩訶迦葉、摩訶目犍連，從佛所聞未曾有法，世尊授舍利弗阿耨多羅三藐三菩提記，發稀有心，歡喜踊躍；即從座起，整衣服，偏袒右肩，右膝著地，一心合掌，曲躬恭敬，瞻仰尊顏，而白佛言：

G 2 自陳領解（分二）

H 1 正陳得解（分二）

I 1 長行（分二）

J 1 法中略說（分二）

K 1 明昔日不求（分三）

L 1 標正明不求 我等居僧之首，年並朽邁，自謂已得涅槃，無所堪任，不復進求阿耨多羅三藐三菩提。

L 2 釋不求之意 世尊往昔說法既久，我時在座，身體疲懈，但念空、無相、無作，於菩薩法，遊戲神通，淨佛國土，成就眾生，心不喜樂。

L<sub>3</sub> 徵不樂之意 所以者何？世尊令我等，出於三界，得涅槃證。又今我等，年已朽邁，於佛教化菩薩阿耨多羅三藐三菩提，不生一念好樂之心。

K<sub>2</sub> 明今日慶得 我等今於佛前，聞授聲聞阿耨多羅三藐三菩提記，心甚歡喜，得未曾有；不謂於今，忽然得聞稀有之法，深自慶幸，獲大善利，無量珍寶，不求自得。

#### J<sub>2</sub> 喻中廣明（分二）

##### K<sub>1</sub> 喻說（分二）

L<sub>1</sub> 咨發 世尊！我等今者，樂說譬喻，以明斯義。

##### L<sub>2</sub> 正立喻（分四）

###### M<sub>1</sub> 父子相失喻（分四）

###### N<sub>1</sub> 子背父而逃（分二）

O<sub>1</sub> 背父而去 譬若有人，年既幼稚，捨父逃逝，久住他國，或十、二十，至五十歲。

○<sub>2</sub> 向本而還 年既長大，加復窮困，馳騁四方，以求衣食；漸漸遊行，遇向本國。

N<sub>2</sub> 父求子中止 其父先來，求子不得，中止一城。其家大富，財寶無量，金、銀、琉璃、珊瑚、琥珀、玻璃珠等，其諸倉庫，悉皆盈溢；多有僮僕，臣佐吏民，象馬車乘，牛羊無數，出入息利，乃遍他國；商估賈客亦甚眾多。

N<sub>3</sub> 子遂到父城 時貧窮子，遊諸聚落，經歷國邑，遂到其父所止之城。

N<sub>4</sub> 父憂家業無傳 父每念子，與子離別五十餘年，而未曾向人說如此事。但自思惟，心懷悔恨，自念老朽，多有財物，金銀珍寶，倉庫盈溢，無有子息；一旦終歿，財物散失，無所委付，是以慙

勲，每憶其子。復作是念：我若得子，委付財物，坦然快樂，無復憂慮。

M<sub>2</sub> 父子相見喻（分二）

N<sub>1</sub> 子見父（分二）

○<sub>1</sub> 見父之相 世尊！爾時，窮子傭賃展轉，遇到父舍，住立門側，遙見其父踞師子床，寶几承足。諸婆羅門、刹利、居士，皆恭敬圍繞；以真珠瓔珞，價值千萬，莊嚴其身；吏民僮僕，手執白拂，侍立左右；覆以寶帳，垂諸華旛，香水灑地，散眾名華，羅列寶物，出內取與，有如是等種種嚴飾，威德特尊。

○<sub>2</sub> 見父避去 窮子見父有大力勢，即懷恐怖，悔來至此，竊作是念：此或是王，或是王等，

非我傭力得物之處，不如往至貧里，肆力有地，衣食易得；若久住此，或見逼迫，強使我作。作是念已，疾走而去。

N<sub>2</sub> 父見子 時富長者，於師子座，見子便識，心大歡喜，即作是念：我財物庫藏，今有所付；我常思念此子，無由見之，而忽自來，甚適我願；我雖年朽，猶故貪惜。

M<sub>3</sub> 遣使追誘喻（分二）

N<sub>1</sub> 即遣旁人追（分四）

O<sub>1</sub> 強迫將還 即遣傍人，急迫將還。爾時，使者疾走往捉，窮子驚愕，稱怨大喚：我不相犯，何為見捉？使者執之逾急，強牽將還。

O<sub>2</sub> 執急悶絕 於時窮子自念無罪，而被囚執，此必定死，轉更惶怖，悶絕躄地。

O<sub>3</sub> 暫放得喜 父遙見之，而語使言：不須此人，勿強

將來，以冷水灑面，令得醒悟，莫復與語。所以者何？父知其子，志意下劣，自知豪貴，為子所難；審知是子，而以方便，不語他人，云是我子。使者語之，我今放汝，隨意所趣。

○ 4 喜往貧里 窮子歡喜，得未曾有，從地而起，往至貧里，以求衣食。

N<sub>2</sub> 密遣二人誘 (分四)

○ 1 誘雇除糞 爾時，長者將欲誘引其子，而設方便；密遣二人，形色憔悴，無威德者，汝可詣彼，徐語窮子，此有作處，倍與汝直。窮子若許，將來使作。若言欲何所作，便可語之，雇汝除糞，我等二人，亦共汝作。時二使人，即求窮子；既已得之，具陳上事。爾時，窮子先取其

價，尋與除糞。其父見子，愍而怪之。

○2 知子先心

又以他日，於窗牖中，遙見子身，羸瘦憔悴，糞土塵坩，污穢不淨。即脫瓔珞、細軟上服、嚴飾之具，更著麤弊垢膩之衣；塵土坩身，右手執持除糞之器，狀有所畏。

○3 親勸安意

語諸作人，汝等勤作，勿得懈怠，以方便故，得近其子。後復告言：咄！男子，汝常此作，勿復餘去，當加汝價。諸有所須，盆器米麵鹽醋之屬，莫自疑難，亦有老弊使人，須者相給，好自安意；我如汝父，勿復憂慮。所以者何？我年老大，而汝少壯，汝常作時，無有欺怠、瞋恨、怨言，都不見汝有此諸惡，如餘作人；自今已後，如所生子。



即時長者更與作字，名之為兒。

○4 欣遇久住 爾時，窮子雖欣此遇，猶故自謂客作賤人。由是之故，於二十年中，常令除糞。

M 4 領付家業喻（分二）

N 1 領家業（分二）

○1 心相體信 過是已後，心相體信，入出無難，然其所止，猶在本處。

○2 命領家業（分二）

P 1 命知家事 世尊！爾時長者有疾，自知將死不久，語窮子言：我今多有金銀珍寶，倉庫盈溢，其中多少，所應取與，汝悉知之，我心如是，當體此意。所以者何？今我與汝，便為不異，宜加用心，無令漏失。

P 1 受命領知 爾時，窮子即受教敕，領知眾物，金

銀珍寶，及諸庫藏，而無希取一餐之意，然其所止，故在本處，下劣之心，亦未能捨。

N<sub>2</sub> 付家業（分二）

○1 正付家業 復經少時，父知子意漸以通泰，成就大志，自鄙先心。臨欲終時，而命其子，並會親族、國王、大臣、刹利、居士，皆悉已集，即自宣言：諸君當知，此是我子，我之所生，於某城中，捨吾逃走，踰嶺辛苦五十餘年，其本字某，我名某甲，昔在本城懷憂推覓，忽於此間遇會得之，此實我子，我實其父，今我所有一切財物，皆是子有，先所出內是子所知。

○2 得付歡喜 世尊！是時窮子聞父此言，即大歡喜，

得未曾有，而作是念：我本無心有所希求，今此寶藏自然而至。

### K 2 法合（分三）

L 1 合父子相失相見 世尊！大富長者則是如來，我等皆似佛子；如來常說，我等為子。

L 2 合追誘齊教取意 世尊！我等以三苦故，於生死中，受諸熱惱，迷惑無知，樂著小法。今日，世尊令我等思惟，蠲除諸法戲論之糞，我等於中，勤加精進，得至涅槃一日之價；既得此已，心大歡喜，自以為足，便自謂言，於佛法中勤精進故，所得弘多。然世尊先知我等，心著弊欲，樂於小法，便見縱捨，不為分別，汝等當有如來知見寶藏之分。

### L 3 合領付家業歡喜（分二）

M1 合領家業 世尊以方便力，說如來智慧，我等從佛得涅

槃一日之價，以為大得；於此大乘，無有志求。我等又因如來智慧，為諸菩薩開示演說，而自於此無有志願。所以者何？佛知我等心樂小法，以方便力，隨我等說，而我等不知真是佛子。

M2 合付家業 今我等方知，世尊於佛智慧，無所吝惜。所以者何？我等昔來真是佛子，而但樂小法，若我等有樂大之心，佛則為我說大乘法，於此經中，唯說一乘，而昔於菩薩前，毀訾聲聞樂小法者，然佛實以大乘教化；是故我等，說本無心有所希求。今法王大寶自然而至，如佛子所應得者皆已得之。

I 2 重頌（分二）

J 1 頌法說 爾時，摩訶迦葉欲重宣此義，而說偈言：

我等今日 聞佛音教 歡喜踊躍 得未曾有  
佛說聲聞 當得作佛 無上寶聚 不求自得

J 2 頌喻說 (分二)

K 1 頌立喻 (分四)

L 1 頌父子相失 (分四)

M 1 頌子背父去 譬如童子 幼稚無識 捨父逃逝 遠到他土  
周流諸國 五十餘年

M 2 頌求子中止 其父憂念 四方推求 求之既疲 頓止一城  
造立舍宅 五欲自娛 其家巨富 多諸金銀  
碑礫瑪瑙 真珠琉璃 象馬牛羊 輦輿車乘  
田業僮僕 人民眾多 出入息利 乃遍他國  
商估賈人 無處不有 千萬億眾 圍繞恭敬  
常為王者 之所愛念 群臣豪族 皆共宗重  
以諸緣故 往來者眾 豪富如是 有大力勢

M 3 超頌其父憂念 而年朽邁 益憂念子 夙夜惟念 死時將至

M<sub>4</sub> 追頌遇到父城 癡子捨我 五十餘年 庫藏諸物 當如之何  
爾時窮子 求索衣食 從邑至邑 從國至國  
或有所得 或無所得 飢餓羸瘦 體生瘡癬  
漸次經歷 到父住城 傭賃展轉 遂至父舍

L<sub>2</sub> 頌父子相見（分二）

M<sub>1</sub> 頌子見父 爾時長者 於其門內 施大寶帳 處師子座  
眷屬圍繞 諸人侍衛 或有計算 金銀寶物  
出內財產 注記券疏 窮子見父 豪貴尊嚴  
謂是國王 若國王等 驚怖自怪 何故至此  
覆自念言 我若久住 或見逼迫 強驅使作  
思惟是已 馳走而去 借問貧里 欲往傭作  
M<sub>2</sub> 頌父見子 長者是時 在師子座 遙見其子 默而識之

L<sub>3</sub> 頌追誘催作（分二）

M<sub>1</sub> 頌即遣旁人追 即敕使者 追捉將來 窮子驚喚 迷悶躓地  
是人執我 必當見殺 何用衣食 使我至此

長者知子 愚癡狹劣 不信我言 不信是父

M<sub>2</sub> 頌密遣二人誘 (分二)

N<sub>1</sub> 頌催作 即以方便 更遣餘人 眇目矧陋 無威德者

汝可語之 云當相顧 除諸糞穢 倍與汝價

窮子聞之 歡喜隨來 為除糞穢 淨諸房舍

N<sub>2</sub> 頌教作 長者於牖 常見其子 念子愚劣 樂為鄙事

於是長者 著弊垢衣 執除糞器 往到子所

方便附近 語令勤作 既益汝價 並塗足油

飲食充足 薦席厚煖 如是苦言 汝當勤作

又以軟語 若如我子

L<sub>4</sub> 頌領付家業 (分二)

M<sub>1</sub> 頌領業 長者有智 漸令人出 經二十年 執作家事

示其金銀 真珠玻瓈 諸物出入 皆使令知

猶處門外 止宿草庵 自念貧事 我無此物

M<sub>2</sub> 頌付業 (分二)

N<sub>1</sub> 頌正付家業 父知子心 漸已廣大 欲與財物 即聚親族  
國王大臣 剎利居士 於此大眾 說是我子  
捨我他行 經五十歲 自見子來 已二十年  
昔於某城 而失是子 周行求索 遂來至此  
凡我所有 舍宅人民 悉以付之 恣其所用  
N<sub>2</sub> 頌得付歡喜 子念昔貧 志意下劣 今於父所 大獲珍寶  
並及舍宅 一切財物 甚大歡喜 得未曾有

K<sub>2</sub> 頌法合（分二）

L<sub>1</sub> 頌合相失相見並追誘

佛亦如是 知我樂小 未曾說言 汝等作佛  
而說我等 得諸無漏 成就小乘 聲聞弟子

L<sub>2</sub> 頌合領付家業（分二）

M<sub>1</sub> 頌合領家業（分二）

N<sub>1</sub> 頌合受命領知

佛敕我等 說最上道 修習此者 當得成佛



我承佛教 為大菩薩 以諸因緣 種種譬喻  
若干言辭 說無上道 諸佛子等 從我聞法  
日夜思惟 精勤修習 是時諸佛 即授其記  
汝於來世 當得作佛 一切諸佛 秘藏之法  
但為菩薩 演其實事 而不為我 說斯真要

N<sub>2</sub> 頌合心無希取（分三）

○ 1 正明無希取

如彼窮子 得近其父 雖知諸物 心不希取  
我等雖說 佛法寶藏 自無志願 亦復如是

○ 2 釋無希取意

我等內滅 自謂為足 唯了此事 更無餘事  
我等若聞 淨佛國土 教化眾生 都無欣樂  
所以者何 一切諸法 皆悉空寂 無生無滅  
無大無小 無漏無為 如是思惟 不生喜樂  
我等長夜 於佛智慧 無貪無著 無復志願

而自於法 謂是究竟 我等長夜 修習空法  
得脫三界 苦惱之患 住最後身 有餘涅槃  
佛所教化 得道不虛 則為已得 報佛之恩

○<sub>3</sub> 結無希取

我等雖為 諸佛子等 說菩薩法 以求佛道  
而於是法 永無願樂 導師見捨 觀我心故  
初不勸進 說有實利

M<sub>2</sub> 頌合付家業（分二）

N<sub>1</sub> 合付家業 如富長者 知子志劣 以方便力 柔伏其心  
然後乃付 一切財物 佛亦如是 現稀有事  
知樂小者 以方便力 調伏其心 乃教大智  
N<sub>2</sub> 合付歡喜 我等今日 得未曾有 非先所望 而今自得  
如彼窮子 得無量寶 世尊我今 得道得果  
於無漏法 得清淨眼 我等長夜 持佛淨戒  
始於今日 得其果報 法王法中 久修梵行

今得無漏 無上大果 我等今者 真是聲聞  
以佛道聲 令一切聞 我等今者 真阿羅漢  
於諸世間 天人魔梵 普於其中 應受供養


## H 2 歎佛深恩（分三）

- I 1 歎佛大恩莫能報  
世尊大恩 以稀有事 憐愍教化 利益我等  
無量億劫 誰能報者 手足供給 頭頂禮敬  
一切供養 皆不能報 若以頂戴 兩肩荷負  
於恆沙劫 盡心恭敬 又以美膳 無量寶衣  
及諸臥具 種種湯藥 牛頭栴檀 及諸珍寶  
以起塔廟 寶衣布地 如斯等事 以用供養  
於恆沙劫 亦不能報
- I 2 歎佛實智不思議  
諸佛稀有 無量無邊 不可思議 大神通力  
無漏無為 諸法之王 能為下劣 忍於斯事  
取相凡夫 隨宜為說
- I 3 歎佛權智度眾生  
諸佛於法 得最自在 知諸眾生 種種欲樂

及其志力 隨所堪任 以無量喻 而為說法  
隨諸眾生 宿世善根 又知成熟 未成熟者  
種種籌量 分別知己 於一乘道 隨宜說三

妙法蓮華經 卷三

# 藥草喻品第五



F 3 如來述成 (分二)

G 1 略述成 爾時，世尊告摩訶迦葉及諸大弟子：善哉！善哉！迦葉善說如來真實功德。誠如所言，如來復有無量無邊阿僧祇功德；汝等若於無量億劫，說不能盡。

G 2 廣述成 (分二)

H 1 長行 (分二)

I 1 正明權實不可思議 (分三)

J 1 法說 (分二)

K 1 明權實教不可思議 迦葉當知！如來是諸法之王，若有所說，皆不虛也。於一切法，以智方便而演說之；其所說法，皆悉到於一切智地。

K 2 明權實智不可思議 如來觀知一切諸法之所歸趣，亦知一切眾生深心所行通達無礙；又於諸法究盡明了，示諸眾生一切智慧。

J 2 喻說 (分二)

K<sub>1</sub> 明無差而差喻即實而權（分二）

L<sub>1</sub> 約能所生明無差而差

迦葉！譬如三千大千世界、山川谿谷土地，所生卉木叢林及諸藥草，種類若干，名色各異。

L<sub>2</sub> 約能所潤明無差而差

密雲彌布，遍覆三千大千世界，一時等澍，其澤普洽卉木叢林及諸藥草；小根小莖、小枝小葉，中根中莖、中枝中葉，大根大莖、大枝大葉，諸樹大小，隨上中下，各有所受；一雲所雨，稱其種性而得生長華果敷實。

K<sub>2</sub> 明差而無差喻即權而實

雖一地所生，一雨所潤，而諸草木各有差別。

J<sub>3</sub> 法合（分二）

K<sub>1</sub> 合無差而差（分二）

L<sub>1</sub> 正合（分三）

M<sub>1</sub> 合能潤 迦葉當知！如來亦復如是！出現於世，如大雲

起，以大音聲，普遍世界天、人、阿修羅，如彼大雲遍覆三千大千國土。於大眾中，而唱是言：我是如來、應供、正遍知、明行足、善逝、世間解、無上士、調御丈夫、天人師、佛、世尊。未度者令度，未解者令解，未安者令安，未涅槃者令得涅槃，今世後世，如實知之。我是一切知者、一切見者、知道者、開道者、說道者，汝等天人阿修羅眾皆應到此，為聽法故。

M<sub>2</sub> 追合能生所生 爾時，無數千萬億種眾生，來至佛所而聽法。

M<sub>3</sub> 復合能潤所潤 如來於時，觀是眾生諸根利鈍、精進懈怠，隨其所堪，而為說法；種種無量，皆令歡喜，快得善利。是諸眾生聞是法已，現世安隱，後生善處，以道受樂，



亦得聞法。既聞法已，離諸障礙，於諸法中，任力所能，漸得入道。

L<sub>2</sub> 提喻帖合 如彼大雲，雨於一切卉木叢林及諸藥草，如其種性，具足蒙潤，各得生長。

K<sub>2</sub> 合差而無差（分二）

L<sub>1</sub> 正合（分二）

M<sub>1</sub> 合一地所生一雨所潤

如來說法，一相一味，所謂解脫相、離相、滅相，究竟至於一切種智。

M<sub>2</sub> 合草木各有差別

其有眾生，聞如來法，若持讀誦，如說修行，所得功德，不自覺知。所以者何？唯有如來，知此眾生種相體性，念何事、思何事、修何事，云何念、云何思、云何修，以何法念、以何法思、以何法修、以何法得何法。眾生住於種種之地，唯有如來如實見之，明了

無礙；如彼卉木叢林諸藥草等，而不自知上中下性。

L<sub>2</sub> 結釋 如來知是一相一味之法，所謂解脫相、離相、滅相，究竟涅槃，常寂滅相，終歸於空。佛知是已，觀眾生心欲而將護之，是故不即為說一切種智。

I<sub>2</sub> 結歎述成 汝等迦葉，甚為稀有，能知如來隨宜說法，能信能受。所以者何？諸佛世尊隨宜說法，難解難知。

### H<sub>2</sub> 重頌（分三）

I<sub>1</sub> 頌法說 爾時，世尊欲重宣此義，而說偈言：

破有法王 出現世間 隨眾生欲 種種說法  
如來尊重 智慧深遠 久默斯要 不務速說  
有智若聞 則能信解 無智疑悔 則為永失  
是故迦葉 隨力為說 以種種緣 令得正見

### I<sub>2</sub> 頌立喻（分二）

#### J<sub>1</sub> 頌無差而差（分二）

K<sub>1</sub> 超頌能潤無差 迦葉當知 譬如大雲 起於世間 遍覆一切

慧雲含潤 電光晃曜 雷聲遠震 令眾悅豫  
日光揜蔽 地上清涼 鬣鬣垂布 如可承攬  
其雨普等 四方俱下 流澍無量 率土充洽  
K 2 追頌能生所生受潤差別

山川險谷 幽邃所生 卉木藥草 大小諸樹  
百穀苗稼 甘蔗葡萄 雨之所潤 無不豐足  
乾地普洽 藥木並茂 其雲所出 一味之水  
草木叢林 隨分受潤

一切諸樹 上中下等 稱其大小 各得生長  
根莖枝葉 華果光色 一雨所及 皆得鮮澤  
J 2 頌差而無差 如其體相 性分大小 所潤是一 而各滋茂

I 3 頌法合 (分二)

J 1 頌合無差而差 (分三)

K 1 頌合能潤 佛亦如是 出現於世 譬如大雲 普覆一切  
既出於世 為諸眾生 分別演說 諸法之實

大聖世尊 於諸天人 一切眾中 而宣是言  
我為如來 兩足之尊 出於世間 猶如大雲  
充潤一切 枯槁眾生 皆令離苦 得安隱樂  
世間之樂 及涅槃樂 諸天人眾 一心善聽  
皆應到此 觀無上尊

我為世尊 無能及者 安隱眾生 故現於世  
為大眾說 甘露淨法 其法一味 解脫涅槃  
以一妙音 演暢斯義 常為大乘 而作因緣

K<sub>2</sub> 頌合能生所生 我觀一切 普皆平等 無有彼此 愛憎之心  
我無貪著 亦無限礙 恆為一切 平等說法  
如為一人 眾多亦然 常演說法 曾無他事  
去來坐立 終不疲厭 充足世間 如雨普潤

K<sub>3</sub> 頌復合能潤所潤 (分二)

L<sub>1</sub> 頌合能潤 貴賤上下 持戒毀戒 威儀具足 及不具足  
正見邪見 利根鈍根 等雨法雨 而無懈怠

L 2 頌合所潤（分二）

M 1 頌歡喜喜利現世安隱合普洽喻

一切眾生聞我法者隨力所受住於諸地  
或處人天轉輪聖王釋梵諸王是小藥草  
知無漏法能得涅槃起六神通及得三明  
獨處山林常行禪定得緣覺證是中藥草  
求世尊處我當作佛行精進定是上藥草  
又諸佛子專心佛道常行慈悲自知作佛  
決定無疑是名小樹安住神通轉不退輪  
度無量億百千眾生如是菩薩名為大樹  
佛平等說如一味雨隨眾生性所受不同  
如彼草木所稟各異佛以此喻方便開示  
種種言辭演說一法於佛智慧如海一滴  
M 2 頌後生善處乃至漸得入道合生長敷實喻

我雨法雨充滿世間一味之法隨力修行

如彼叢林 藥草諸樹 隨其大小 漸增茂好

諸佛之法 常以一味 令諸世間 普得具足

漸次修行 皆得道果

聲聞緣覺 處於山林 住最後身 聞法得果

是名藥草 各得增長

若諸菩薩 智慧堅固 了達三界 求最上乘

是名小樹 而得增長

復有住禪 得神通力 聞諸法空 心大歡喜

放無數光 度諸眾生 是名大樹 而得增長

J 2 頌合差而無差 如是迦葉 佛所說法 譬如大雲 以一味雨

潤於人華 各得成實 迦葉當知 以諸因緣


種種譬喻 開示佛道 是我方便 諸佛亦然

今為汝等 說最實事 諸聲聞眾 皆非滅度

汝等所行 是菩薩道 漸漸修學 悉當成佛

妙法蓮華經 卷三

# 授記品第六



F 4 與授記 (分二)

G 1 正與中根授劫國莊嚴記 (分二)

H 1 授大迦葉記 (分二)

I 1 長行 (分四)

J 1 行因 爾時，世尊說是偈已，告諸大眾，唱如是言：我此弟子摩訶迦葉，於未來世，當得奉覲三百萬億諸佛世尊，供養恭敬，尊重讚歎，廣宣諸佛無量大法；

J 2 得果 於最後身，得成為佛，名曰光明如來、應供、正遍知、明行足、善逝、世間解、無上士、調御丈夫、天人師、佛、世尊。

J 3 劫國並佛壽兼正像久近 國名光德，劫名大莊嚴，佛壽十二小劫，正法住世二十小劫，像法亦住二十小劫。

J 4 國淨眷屬 國界嚴飾，無諸穢惡、瓦礫荆棘、便利不淨；其土平正，無有高下坑坎堆阜。琉璃為地，寶樹行列，



黃金為繩，以界道側，散諸寶華，周遍清淨。其國菩薩無量千億，諸聲聞眾亦復無數，無有魔事，雖有魔及魔民，皆護佛法。

I 2 重頌（分四）

J 1 頌行因得果 爾時，世尊欲重宣此義，而說偈言：

告諸比丘 我以佛眼 見是迦葉 於未來世  
過無數劫 當得作佛 而於來世 供養奉觀  
三百萬億 諸佛世尊 為佛智慧 淨修梵行  
供養最上 二足尊已 修習一切 無上之慧  
於最後身 得成為佛

J 2 頌國淨眷屬

其土清淨 琉璃為地 多諸寶樹 行列道側  
金繩界道 見者歡喜 常出好香 散眾名華  
種種奇妙 以為莊嚴 其地平正 無有丘坑  
諸菩薩眾 不可稱計 其心調柔 逮大神通  
奉持諸佛 大乘經典 諸聲聞眾 無漏後身

法王之子 亦不可計 乃以天眼 不能數知

J 3 頌壽命正像 其佛當壽 十二小劫 正法住世 二十小劫

像法亦住 二十小劫

J 4 總結 光明世尊 其事如是

H 2 授三人記 (分二)

I 1 請記 (分四)

J 1 正請 爾時，大目犍連、須菩提、摩訶迦旃延等，皆悉悚慄，一心合掌，瞻仰尊顏，目不暫捨，即共同聲而說偈言：

大雄猛世尊 諸釋之法王 哀愍我等故 而賜佛音聲

若知我深心 見為授記者 如以甘露灑 除熱得清涼

J 2 立喻 如從饑國來 忽遇大王膳 心猶懷疑懼 未敢即便食

若復得王教 然後乃敢食

J 3 法合 我等亦如是 每惟小乘過 不知當云何 得佛無上慧

雖聞佛音聲 言我等作佛 心尚懷憂懼 如未敢便食

若蒙佛授記 爾乃快安樂

J 4 結請 大雄猛世尊 常欲安世間 願賜我等記 如飢須教食

I 2 與記 (分三)

J 1 授須菩提記 (分二)

K 1 長行 (分四)

L 1 行因 爾時，世尊知諸大弟子心之所念，告諸比丘：是須菩提，於當來世，奉覲三百萬億那由他佛，供養恭敬，尊重讚歎，常修梵行，具菩薩道。

L 2 得果 於最後身，得成為佛，號曰名相如來、應供、正遍知、明行足、善逝、世間解、無上士、調御丈夫、天人師、佛、世尊。

L 3 劫國嚴淨 劫名有寶，國名寶生，其土平正，玻瓈為地，寶樹莊嚴，無諸丘坑、沙礫、荊棘、便利之穢，寶華覆地，周遍清淨。其土人民，皆處寶臺珍妙樓閣。聲聞弟子，無量無邊，算數譬喻所不能知。諸菩薩眾，無數千萬億那由他。

L<sub>4</sub> 壽命正像 佛壽十二小劫，正法住世二十小劫，像法亦住二十小劫。其佛常處虛空，為眾說法，度脫無量菩薩及聲聞眾。

K<sub>2</sub> 重頌（分四）

L<sub>1</sub> 誠聽 爾時，世尊欲重宣此義，而說偈言：

諸比丘眾 今告汝等 皆當一心 聽我所說

L<sub>2</sub> 頌行因得果 我大弟子 須菩提者 當得作佛 號曰名相  
當供無數 萬億諸佛 隨佛所行 漸具大道  
最後身得 三十二相 端正殊妙 猶如寶山

L<sub>3</sub> 頌劫國嚴淨 其佛國土 嚴淨第一 眾生見者 無不愛樂  
佛於其中 度無量眾 其佛法中 多諸菩薩  
皆悉利根 轉不退輪 彼國常以 菩薩莊嚴  
諸聲聞眾 不可稱數 皆得三明 具六神通  
住八解脫 有大威德  
其佛說法 現於無量 神通變化 不可思議

諸天人民 數如恆沙 皆共合掌 聽受佛語

L 4 頌壽命正像 其佛當壽 十二小劫 正法住世 二十小劫

像法亦住 二十小劫

J 2 授迦旃延記 (分二)

K 1 長行 (分四)

L 1 行因 爾時，世尊復告諸比丘眾：我今語汝，是大迦旃延，於當來世，以諸供具，供養奉事八千億佛，恭敬尊重。諸佛滅後，各起塔廟，高千由旬，縱廣正等五百由旬，以金、銀、琉璃、碑磬、瑪瑙、真珠、玫瑰，七寶合成；眾華、瓔珞、塗香、末香、燒香、繒蓋、幢幡，供養塔廟。過是已後，當復供養二萬億佛，亦復如是。供養是諸佛已，具菩薩道。

L 2 得果 當得作佛，號曰閻浮那提金光如來、應供、正遍知、明行足、善逝、世間解、無上士、調御丈夫、天人師、佛、世尊。

L<sub>3</sub> 國淨眷屬 其土平正，玻瓈為地，寶樹莊嚴，黃金為繩，以界道側，妙華覆地，周遍清淨，見者歡喜。無四惡道，地獄、餓鬼、畜生、阿修羅道。多有天人，諸聲聞眾，及諸菩薩，無量萬億，莊嚴其國。

L<sub>4</sub> 壽命正像 佛壽十二小劫，正法住世二十小劫，像法亦住二十小劫。

K<sub>2</sub> 重頌（分三）

L<sub>1</sub> 誠聽 爾時，世尊欲重宣此義，而說偈言：

諸比丘眾 皆一心聽 如我所說 真實無異

L<sub>2</sub> 頌行因得果 是迦旃延 當以種種 妙好供具 供養諸佛 諸佛滅後 起七寶塔 亦以華香 供養舍利 其最後身 得佛智慧 成等正覺

L<sub>3</sub> 頌國淨眷屬 國土清淨 度脫無量 萬億眾生 皆為十方 之所供養 佛之光明 無能勝者 其佛號曰

閻浮金光 菩薩聲聞 斷一切有 無量無數  
莊嚴其國

J 3 授目犍連記（分二）

K 1 長行（分四）

L 1 行因 爾時，世尊復告大眾：我今語汝，是大目犍連，當以種種供具，供養八千諸佛，恭敬尊重。諸佛滅後，各起塔廟，高千由旬，縱廣正等五百由旬，以金、銀、琉璃、磲磔、瑪瑙、真珠、玫瑰，七寶合成；眾華、瓔珞、塗香、末香、燒香、繒蓋、幢旛，以用供養。過是已後，當復供養，二百萬億諸佛，亦復如是。

L 2 得果 當得成佛，號曰多摩羅跋栴檀香如來、應供、正遍知、明行足、善逝、世間解、無上士、調御丈夫、天人師、佛、世尊。

L 3 劫國嚴淨 劫名喜滿，國名意樂，其土平正，玻瓈為地，

寶樹莊嚴，散真珠華，周遍清淨，見者歡喜。多諸天人，菩薩聲聞其數無量。

L<sub>4</sub> 壽命正像 佛壽二十四小劫，正法住世四十小劫，像法亦住四十小劫。

K<sub>2</sub> 重頌（分四）

L<sub>1</sub> 頌行因 爾時，世尊欲重宣此義，而說偈言：

我此弟子 大目犍連 捨是身已 得見八千  
二百萬億 諸佛世尊 為佛道故 供養恭敬  
於諸佛所 常修梵行 於無量劫 奉持佛法  
諸佛滅後 起七寶塔 長表金剎 華香伎樂  
而以供養 諸佛塔廟

L<sub>2</sub> 頌得果兼壽命 漸漸具足 菩薩道已 於意樂國 而得作佛  
號多摩羅 旃檀之香 其佛壽命 二十四劫

L<sub>3</sub> 頌眷屬眾多 常為天人 演說佛道 聲聞無量 如恆河沙  
三明六通 有大威德 菩薩無數 志固精進



於佛智慧 皆不退轉

L 4 頌正像 佛滅度後 正法當住 四十小劫 像法亦爾

G 2 許為下根作宿世因緣說 我諸弟子 威德具足 其數五百 皆當授記

於未來世 咸得成佛 我及汝等 宿世因緣

吾今當說 汝等善聽



妙法蓮華經 卷三

# 化城喻品第七



E 3 因緣說周（分二）

F 1 正說因緣（分二）

G 1 先明知見久遠（分二）

H 1 長行（分二）

I 1 明所見事 佛告諸比丘，乃往過去無量無邊不可思議阿僧祇劫，爾時有佛，名大通智勝如來、應供、正遍知、明行足、善逝、世間解、無上士、調御丈夫、天人師、佛、世尊，其國名好城，劫名大相。諸比丘！彼佛滅度已來，甚大久遠；

I 2 喻明久遠 譬如三千大千世界所有地種，假使有人磨以為墨，過於東方千國土，乃下一點，大如微塵；又過千國土，復下一點；如是展轉盡地種墨，於汝等意云何，是諸國土，若算師，若算師弟子，能得邊際，知其數不？不也，世尊！諸比丘！是人所經國土，若點不點，盡抹為塵，一塵一劫，彼佛滅度已來，復過是數無量無

邊百千萬億阿僧祇劫，我以如來知見力故，觀彼久遠，猶若今日。

## H 2 重頌（分二）

I 1 頌明所見事 爾時，世尊欲重宣此義，而說偈言：

我念過去世 無量無邊劫 有佛兩足尊 名大通智勝  
如人以力磨 三千大千土 盡此諸地種 皆悉以為墨  
過於千國土 乃下一塵點 如是展轉點 盡此諸塵墨  
如是諸國土 點與不點等 復盡抹為塵 一塵為一劫  
此諸微塵數 其劫復過是 彼佛滅度來 如是無量劫  
如來無礙智 知彼佛滅度 及聲聞菩薩 如見今滅度  
諸比丘當知 佛智淨微妙 無漏無所礙 通達無量劫

## G 2 正明宿世因緣（分二）

### H 1 長行（分二）

I 1 明結緣之由（分二）

J 1 遠由（分二）

K<sub>1</sub> 明大通智勝成道（分五）

L<sub>1</sub> 佛壽長遠 佛告諸比丘：大通智勝佛，壽五百四十萬億那由他劫。

L<sub>2</sub> 成道前事（分二）

M<sub>1</sub> 明所經時節 其佛本坐道場，破魔軍已，垂得阿耨多羅三藐三菩提，而諸佛法不現在前。如是一小劫，乃至十小劫，結跏趺坐，身心不動，而諸佛法猶不在前。

M<sub>2</sub> 明諸天供養 爾時忉利諸天，先為彼佛，於菩提樹下敷師子座，高一由旬，佛於此座，當得阿耨多羅三藐三菩提。適坐此座時，諸梵天王，雨眾天華，面百由旬，香風時來，吹去萎華，更雨新者，如是不絕，滿十小劫，供養於佛，乃至滅度，常雨此華。四王諸天，為供養佛，常擊天鼓，其餘諸

天，作天伎樂，滿十小劫，至於滅度，亦復如是。

L<sub>3</sub> 正明成道 諸比丘，大通智勝佛過十小劫，諸佛之法，乃現在前，成阿耨多羅三藐三菩提。

L<sub>4</sub> 眷屬供養（分二）

M<sub>1</sub> 明親近供養 其佛未出家時，有十六子，其第一者，名日智積。諸子各有種種珍異玩好之具，聞父得成阿耨多羅三藐三菩提，皆捨所珍，往詣佛所，諸母涕泣而隨送之。其祖轉輪聖王，與一百大臣，及餘百千萬億人民，皆共圍繞，隨至道場。咸欲親近大通智聖如來，供養恭敬，尊重讚歎。

M<sub>2</sub> 頌歎慶德（分二）

N<sub>1</sub> 頌歎佛因果 到已，頭面禮足，繞佛畢已，一心合掌，瞻仰世尊，以偈頌曰：

大威德世尊 為度眾生故 於無量億歲 爾乃得成佛  
諸願已具足 善哉吉無上

世尊甚稀有 一坐十小劫 身體及手足 寂然安不動  
其心常澹泊 未曾有散亂 究竟永寂滅 安住無漏法

### N<sub>2</sub> 頌慶已所遇

今者見世尊 安隱成佛道 我等得善利 稱慶大歡喜  
眾生常苦惱 盲瞶無導師 不識苦盡道 不知求解脫  
長夜增惡趣 減損諸天眾 從冥入於冥 永不聞佛名  
今佛得最上 安隱無漏道 我等及天人 為得最大利  
是故咸稽首 歸命無上尊

L<sub>5</sub> 請轉法輪 爾時，十六王子偈讚佛已，勸請世尊轉於法輪，  
咸作是言：世尊說法，多所安隱，憐愍饒益諸天  
人民。重說偈言：

世雄無等倫 百福自莊嚴 得無上智慧 願為世間說  
度脫於我等 及諸眾生類 為分別顯示 令得是智慧



若我等得佛 眾生亦復然 世尊知眾生 深心之所念  
亦知所行道 又知智慧力 欲樂及修福 宿命所行業  
世尊悉知已 當轉無上輪

K<sub>2</sub> 明十方梵王請法（分二）

L<sub>1</sub> 威光照動 佛告諸比丘：大通智勝佛得阿耨多羅三藐三菩

提時，十方各五百萬億諸佛世界，六種震動，  
其國中間幽冥之處，日月威光所不能照，而皆  
大明。其中眾生，各得相見，咸作是言：此中  
云何忽生眾生？又其國界，諸天宮殿，乃至梵  
宮，六種震動，大光普照，遍滿世界，勝諸天  
光。

L<sub>2</sub> 梵王來請（分五）

M<sub>1</sub> 東方雲集（分四）

N<sub>1</sub> 睹瑞相問

爾時，東方五百萬億諸國土中，梵天宮殿，光明照

曜，倍於常明。諸梵天王各作是念：今者宮殿光明，昔所未有；以何因緣，而現此相？是時諸梵天王，即各相詣，共議此事；時彼眾中，有一大梵天王，名救一切，為諸梵眾而說偈言：

我等諸宮殿 光明昔未有 此是何因緣 宜各共求之  
為大德天生 為佛出世間 而此大光明 遍照於十方

### N<sub>2</sub> 尋光見佛

爾時，五百萬億國土諸梵天王，與宮殿俱，各以衣祴盛諸天華，共詣西方，推尋是相。見大通智勝如來，處於道場菩提樹下，坐師子座，諸天、龍王、乾闥婆、緊那羅、摩睺羅伽、人非人等，恭敬圍繞，及見十六王子，請佛轉法輪。

### N<sub>3</sub> 廣陳供養

即時，諸梵天王頭面禮佛，繞百千匝，即以天華而散佛上。其所散華，如須彌山，並以供養佛菩提

樹，其菩提樹，高十由旬。華供養已，各以宮殿，奉上彼佛，而作是言：

惟見哀愍，饒益我等，所獻宮殿，願垂納處。

時諸梵天王，即於佛前，一心同聲，以偈頌曰：

世尊甚稀有 難可得值遇 具無量功德 能救護一切  
天人之大師 哀愍於世間 十方諸眾生 普皆蒙饒益  
我等所從來 五百萬億國 捨深禪定樂 為供養佛故  
我等先世福 宮殿甚嚴飾 今以奉世尊 惟願哀納受

#### N<sub>4</sub> 請轉法輪

爾時，諸梵天王偈讚佛已，各作是言：惟願世尊轉於法輪，度脫眾生，開涅槃道。

時諸梵天王，一心同聲，而說偈言：

世雄兩足尊 惟願演說法 以大慈悲力 度苦惱眾生  
爾時，大通智勝如來默然許之。

#### M<sub>2</sub> 東南方雲集（分四）

### N<sub>1</sub> 睹瑞相問

又諸比丘，東南方五百萬億國土，諸大梵王，各自見宮殿光明照耀，昔所未有；歡喜踊躍，生稀有心。即各相詣，共議此事；時彼眾中，有一大梵天王，名曰大悲，為諸梵眾而說偈言：

是事何因緣 而現如此相 我等諸宮殿 光明昔未有  
為大德天生 為佛出世間 未曾見此相 當共一心求  
過千萬億土 尋光共推之 多是佛出世 度脫苦眾生

### N<sub>2</sub> 尋光見佛

爾時，五百萬億諸梵天王與宮殿俱，各以衣祴盛諸天華，共詣西北方，推尋是相。見大通智勝如來，處於道場菩提樹下，坐師子座，諸天、龍王、乾闥婆、緊那羅、摩睺羅伽、人非人等，恭敬圍繞，及見十六王子，請佛轉法輪。

### N<sub>3</sub> 廣陳供養

時諸梵天王頭面禮佛，繞百千匝，即以天華，而散佛上。所散之華，如須彌山，並以供養佛菩提樹。華供養已，各以宮殿，奉上彼佛，而作是言：惟見哀愍，饒益我等，所獻宮殿，願垂納受。

爾時，諸梵天王即於佛前，一心同聲，以偈頌曰：  
聖主天中王 迦陵頻伽聲 哀愍眾生者 我等今敬禮  
世尊甚稀有 久遠乃一現 一百八十劫 空過無有佛  
三惡道充滿 諸天眾減少

今佛出於世 為眾生作眼 世間所歸趣 救護於一切  
為眾生之父 哀愍饒益者 我等宿福慶 今得值世尊

#### N<sub>4</sub> 請轉法輪

爾時，諸梵天王偈讚佛已，各作是言：惟願世尊哀愍一切，轉於法輪，度脫眾生。

時諸梵天王，一心同聲，而說偈言：

大聖轉法輪 顯示諸法相 度苦惱眾生 令得大歡喜

眾生聞此法 得道若生天 諸惡道減少 忍善者增益  
爾時，大通智勝如來默然許之。

M<sub>3</sub> 南方雲集（分四）

N<sub>1</sub> 睹瑞相問

又諸比丘，南方五百萬億國土，諸大梵王，各自見  
宮殿光明照耀，昔所未有；歡喜踊躍，生稀有心。  
即各相詣，共議此事；以何因緣，我等宮殿，有此  
光曜？而彼眾中，有一大梵天王，名曰妙法，為諸  
梵眾而說偈言：

我等諸宮殿 光明甚威曜 此非無因緣 是相宜求之  
過於百千劫 未曾見是相 為大德天生 為佛出世間

N<sub>2</sub> 尋光見佛

爾時，五百萬億諸梵天王，與宮殿俱，各以衣祴盛  
諸天華，共詣北方，推尋是相。見大通智勝如來，  
處於道場菩提樹下，坐師子座，諸天、龍王、乾闥

婆、緊那羅、摩睺羅伽、人非人等，恭敬圍繞，及見十六王子請佛轉法輪。

### N<sub>3</sub> 廣陳供養

時諸梵天王頭面禮佛，繞百千匝，即以天華而散佛上。所散之華，如須彌山，並以供養佛菩提樹。華供養已，各以宮殿，奉上彼佛，而作是言：惟見哀愍，饒益我等，所獻宮殿，願垂納受。

爾時，諸梵天王即於佛前，一心同聲，以偈頌曰：世尊甚難見 破諸煩惱者 過百三十劫 今乃得一見 諸飢渴眾生 以法雨充滿 昔所未曾睹 無量智慧者 如優曇鉢華 今日乃值遇

我等諸宮殿 蒙光故嚴飾 世尊大慈愍 惟願垂納受

### N<sub>4</sub> 請轉法輪

爾時，諸梵天王偈讚佛已，各作是言：惟願世尊轉於法輪，令一切世間、諸天、魔、梵、沙門、婆羅

門，皆獲安隱，而得度脫。

時諸梵天王，一心同聲，以偈頌曰：

惟願天人尊 轉無上法輪 擊於大法鼓 而吹大法螺  
普雨大法雨 度無量眾生 我等咸歸請 當演深遠音  
爾時，大通智勝如來默然許之。

M<sub>4</sub> 總舉餘六方雲集 西南方，乃至下方，亦復如是。

M<sub>5</sub> 上方雲集（分四）

N<sub>1</sub> 睹瑞相問

爾時，上方五百萬億國土，諸大梵王，皆悉自睹所  
止宮殿，光明威曜，昔所未有；歡喜踊躍，生稀有  
心。即各相詣，共議此事；以何因緣，我等宮殿，  
有斯光明？時彼眾中，有一大梵天王，名曰尸棄，  
為諸梵眾而說偈言：

今以何因緣 我等諸宮殿 威德光明曜 嚴飾未曾有  
如是之妙相 昔所未聞見 為大德天生 為佛出世間



## N<sub>2</sub> 尋光見佛

爾時，五百萬億諸梵天王，與宮殿俱，各以衣祴盛諸天華，共詣下方，推尋是相。見大通智勝如來，處於道場菩提樹下，坐師子座，諸天、龍王、乾闥婆、緊那羅、摩睺羅伽、人非人等，恭敬圍繞，及見十六王子請佛轉法輪。

## N<sub>3</sub> 廣陳供養

時諸梵天王頭面禮佛，繞百千匝，即以天華而散佛上。所散之華，如須爾山，並以供養佛菩提樹。華供養已，各以宮殿，奉上彼佛，而作是言：惟見哀愍，饒益我等，所獻宮殿，願垂納處。

時諸梵天王即於佛前，一心同聲，以偈頌曰：

善哉見諸佛 救世之聖尊 能於三界獄 勉出諸眾生  
普智天人尊 哀愍群萌類 能開甘露門 廣度於一切  
於昔無量劫 空過無有佛 世尊未出時 十方常闇暝

三惡道增長 阿修羅亦盛 諸天眾轉減 死多墮惡道  
不從佛聞法 常行不善事 色力及智慧 斯等皆減少  
罪業因緣故 失樂及樂想 住於邪見法 不識善儀則  
不蒙佛所化 常墮於惡道

佛為世間眼 久遠時乃出 哀愍諸眾生 故現於世間  
超出成正覺 我等甚欣慶 及餘一切眾 喜歎未曾有  
我等諸宮殿 蒙光故嚴飾 今以奉世尊 惟垂哀納受  
願以此功德 普及於一切 我等與眾生 皆共成佛道

#### N<sub>4</sub> 請轉法輪

爾時，五百萬億諸梵天王，偈讚佛已，各白佛言：  
惟願世尊轉於法輪，多所安隱，多所度脫。

時諸梵天王，而說偈言：

世尊轉法輪 擊甘露法鼓 度苦惱眾生 開示涅槃道  
惟願受我請 以大微妙音 哀愍而敷演 無量劫習法

K 1 轉半字教（分二）

L 1 正轉教法（分二）

M 1 先說四諦法 爾時大通智勝如來，受十方諸梵天王及十六王子請。即時三轉十二行法輪，若沙門、婆羅門，若天、魔、梵，及餘世間所不能轉，謂是苦，是苦集，是苦滅，是苦滅道。

M 2 次說因緣法 及廣說十二因緣法，無明緣行，行緣識，識緣名色，名色緣六入，六入緣觸，觸緣受，受緣愛，愛緣取，取緣有，有緣生，生緣老死憂悲苦惱。無明滅則行滅，行滅則識滅，識滅則名色滅，名色滅則六入滅，六入滅則觸滅，觸滅則受滅，受滅則愛滅，愛滅則取滅，取滅則有滅，有滅則生滅，生滅則老死憂悲苦惱滅。

L<sub>2</sub> 聞法得道 佛於天人大眾之中，說是法時，六百萬億那由他人，以不受一切法故，而於諸漏，心得解脫，皆得深妙禪定、三明六通，具八解脫，第二、第三、第四說法時，千萬億恆河沙那由他等眾生，亦以不受一切法故，而於諸漏，心得解脫。從是已後，諸聲聞眾無量無邊，不可稱數。

K<sub>2</sub> 轉滿字教（分六）

L<sub>1</sub> 王子出家 爾時，十六王子皆以童子出家，而為沙彌，諸根通利，智慧明了，已曾供養百千萬億諸佛，淨修梵行，求阿耨多羅三藐三菩提。

L<sub>2</sub> 請轉法輪 俱白佛言：世尊！是諸無量千萬億大德聲聞，皆已成就。世尊！亦當為我等說阿耨多羅三藐三菩提法，我等聞已，皆共修學。世尊！我等志願，如來知見，深心所念，佛自證知。

L<sub>3</sub> 所將人眾亦出家 爾時，轉輪聖王所將眾中八萬億人，見十六王子出家，亦求出家，王即聽許。

L<sub>4</sub> 受請說經 爾時，彼佛受沙彌請，過二萬劫已，乃於四眾之中，說是大乘經，名妙法蓮華，教菩薩法，佛所護念。說是經已，十六沙彌為阿耨多羅三藐三菩提故，皆共受持，諷誦通利。說是經時，十六菩薩沙彌皆悉信受；聲聞眾中，亦有信解，其餘眾生，千萬億種，皆生疑惑。

L<sub>5</sub> 說經時節 佛說是經，於八千劫，未曾休廢；

L<sub>6</sub> 說已入定 說此經已，即入靜室，住於禪定八萬四千劫。

### I<sub>2</sub> 正明結緣（分二）

#### J<sub>1</sub> 法說結緣（分三）

##### K<sub>1</sub> 明昔共結緣（分二）

L<sub>1</sub> 複講利生 是時十六菩薩沙彌知佛入室，寂然禪定，各升法座，亦於八萬四千劫，為四部眾廣說分別妙

法華經，一一皆度六百萬億那由他恆河沙等眾生，示教利喜，令發阿耨多羅三藐三菩提心。

L<sub>2</sub> 佛起稱歎（分二）

M<sub>1</sub> 正稱歎 大通智勝佛過八萬四千劫已，從三昧起，往詣法座，安詳而坐，普告大眾，是十六菩薩沙彌甚為稀有，諸根通利，智慧明了，已曾供養無量千萬億數諸佛；於諸佛所，常修梵行，受持佛智，開示眾生，令人其中。

M<sub>2</sub> 勸親信 汝等皆當數數親近而供養之，所以者何？若聲聞、辟支佛，及諸菩薩，能信是十六菩薩所說經法，受持不毀者，是人皆當得阿耨多羅三藐三菩提如來之慧。

K<sub>2</sub> 明中間更相值遇 佛告諸比丘，是十六菩薩常樂說是妙法蓮華經，一一菩薩所化六百萬億那由他恆河沙等眾生，世世所生，與菩薩俱，從其聞

法，悉皆信解；以此因緣，得值四萬億諸佛世尊，於今不盡。

K<sup>3</sup> 明今日還說法華（分二）

L<sup>1</sup> 先結會古今（分二）

M<sup>1</sup> 結師之古今 諸比丘！我今語汝，彼佛弟子十六沙彌，

今皆得阿耨多羅三藐三菩提，於十方國土，現在說法，有無量百千萬億菩薩、聲聞，以為眷屬。其二沙彌，東方作佛，一名阿閼，在歡喜國，二名須彌頂；東南方二佛，一名師子音，二名師子相；南方二佛，一名虛空住，二名常滅；西南方二佛，一名帝相，二名梵相；西方二佛，一名阿彌陀，二名度一切世間苦惱；西北方二佛，一名多摩羅跋梅檀香神通，二名須彌相；北方二佛，一名雲自在，二名雲自

在王；東北方佛，名壞一切世間怖畏；第十六，我釋迦牟尼佛，於娑婆國土，成阿耨多羅三藐三菩提。

M<sub>2</sub> 會弟子古今（分四）

N<sub>1</sub> 明本結大緣

諸比丘！我等為沙彌時，各各教化無量百千萬億恆河沙等眾生，從我聞法，為阿耨多羅三藐三菩提。

N<sub>2</sub> 釋今住聲聞疑

此諸眾生，於今有住聲聞地者，我常教化阿耨多羅三藐三菩提；是諸人等，應以是法，漸入佛道。所以者何？如來智慧，難信難解。

N<sub>3</sub> 正結會古今

爾時所化無量恆河沙等眾生者，汝等諸比丘，及我滅度後未來世中聲聞弟子是也。

N<sub>4</sub> 釋未來弟子疑



我滅度後，復有弟子，不聞是經，不知不覺菩薩所行，自於所得功德，生滅度想，當入涅槃。我於餘國作佛，更有異名，是人雖生滅度之想，入於涅槃，而於彼土，求佛智慧，得聞是經，唯以佛乘而得滅度，更無餘乘，除諸如來方便說法。

L<sub>2</sub> 正明還說法華（分二）

M<sub>1</sub> 明應時故說 諸比丘！若如來自知涅槃時到，眾又清淨，信解堅固，了達空法，深入禪定，便集諸菩薩及聲聞眾，為說是經；世間無有二乘而得滅度，惟一佛乘得滅度耳。

M<sub>2</sub> 釋前開三意 比丘當知，如來方便，深入眾生之性，知其志樂小法，深著五欲，為是等故，說於涅槃，是人若聞，則便信受。

J<sub>2</sub> 喻說結緣（分二）

K<sub>1</sub> 立喻（分二）

L<sub>1</sub> 導師喻 譬如五百由旬險難惡道，曠絕無人怖畏之處，若有多眾，欲過此道至珍寶處。有一導師，聰慧明達，善知險道通塞之相，將導眾人，欲過此難。

L<sub>2</sub> 將導喻（分二）

M<sub>1</sub> 中路懈退喻（分二）

N<sub>1</sub> 退大 所將人眾，中路懈退，白導師言：我等疲極，而復怖畏，不能復進，前路猶遠，今欲退還。

N<sub>2</sub> 接小（分二）

O<sub>1</sub> 方便設化 導師多諸方便，而作是念：此等可愍，云何捨大珍寶而欲退還？作是念已，以方便力，於險道中，過三百由旬，化作一城，告眾人言：汝等勿怖，莫得退還！今此大城，可於中止，隨意所作，若入是城，快得安隱；若能前至寶所，亦可得去。

○<sub>2</sub>歡喜前人 是時，疲極之眾，心大歡喜，歎未曾有，我等今者，免斯惡道，快得安隱；於是眾人前入化城，生已度想，生安隱想。

M<sub>2</sub>滅化引至寶所喻 爾時，導師知此人眾既得止息，無復疲倦，即滅化城，語眾人言：汝等去來，寶處在近，向者大城，我所化作，為止息耳。

## K<sub>2</sub> 法合（分二）

### L<sub>1</sub> 正合（分二）

M<sub>1</sub>合導師喻 諸比丘！如來亦復如是，今為汝等作大導師，知諸生死煩惱惡道，險難長遠，應去應度。

M<sub>2</sub>合將導喻 若眾生但聞一佛乘者，則不欲見佛，不欲親近，便作是念，佛道長遠，久受勤苦，乃可得成。佛知是心怯弱下劣，以方便力，而於中道為止息故，說二涅槃。若眾生住於

二地，如來爾時即便為說，汝等所作未辦，汝所住地，近於佛慧，當觀察籌量，所得涅槃，非真實也；但是如來方便之力，於一佛乘，分別說三。

L<sub>2</sub>舉喻帖合 如彼導師，為止息故，化作大城；既知息已，而告之言：寶處在近，此城非實，我化作耳。

## H<sub>2</sub> 重頌（分二）

### I<sub>1</sub> 頌結緣之由（分二）

#### J<sub>1</sub> 頌遠由（分二）

K<sub>1</sub> 頌大通智勝成佛 爾時，世尊欲重宣此義，而說偈言：

大通智勝佛 十劫坐道場 佛法不現前 不得成佛道  
諸天神龍王 阿修羅眾等 常雨於天華 以供養彼佛  
諸天擊天鼓 並作眾伎樂 香風吹萎華 更雨新好者  
過十小劫已 乃得成佛道 諸天及世人 心皆懷踊躍  
彼佛十六子 皆與其眷屬 千萬億圍繞 俱行至佛所

頭面禮佛足 而請轉法輪 聖師子法雨 充我及一切

K 2 頌十方梵王請法（分二）

L 1 頌威光照動

世尊甚難值 久遠時一現 為覺悟群生 震動於一切

L 2 頌梵王來請

東方諸世界 五百萬億國 梵宮殿光曜 昔所未曾有  
諸梵見此相 尋來至佛所 散華以供養 並奉上宮殿  
請佛轉法輪 以偈而讚歎 佛知時未至 受請默然坐  
三方及四維 上下亦復爾 散華奉宮殿 請佛轉法輪  
世尊甚難值 願以本慈悲 廣開甘露門 轉無上法輪

J 2 頌近由（分二）

K 1 頌轉半字教

無量慧世尊 受彼眾人請 為宣種種法 四諦十二緣  
無明至老死 皆從生緣有 如是眾過患 汝等應當知  
宣暢是法時 六百萬億姪 得盡諸苦際 皆成阿羅漢

第二說法時 千萬恆沙眾 於諸法不受 亦得阿羅漢  
從是後得道 其數無有量 萬億劫算數 不能得其邊

K<sub>2</sub> 頌轉滿字教

時十六王子 出家作沙彌 皆共請彼佛 演說大乘法  
我等及營從 皆當成佛道 願得如世尊 慧眼第一淨  
佛知童子心 宿世之所行 以無量因緣 種種諸譬喻  
說六波羅蜜 及諸神通事 分別真實法 菩薩所行道  
說是法華經 如恆河沙偈  
彼佛說經已 靜室入禪定 一心一處坐 八萬四千劫

I<sub>2</sub> 頌正結緣 (分二)

J<sub>1</sub> 頌法說 (分三)

K<sub>1</sub> 頌昔共結緣

是諸沙彌等 知佛禪未出 為無量億眾 說佛無上慧  
各各坐法座 說是大乘經 於佛宴寂後 宣揚助法化  
一一沙彌等 所度諸眾生 有六百萬億 恆河沙等眾

K<sub>2</sub> 頌中間更相值遇

彼佛滅度後 是諸聞法者 在在諸佛土 常與師俱生  
K<sub>3</sub> 頌今日還說法華

是十六沙彌 具足行佛道 今現在十方 各得成正覺  
爾時聞法者 各在諸佛所 其有住聲聞 漸教以佛道  
我在十六數 曾亦為汝說 是故以方便 引汝趣佛慧  
以是本因緣 今說法華經 令汝入佛道 慎勿懷驚懼  
J<sub>2</sub> 頌喻說(分二)

K<sub>1</sub> 頌立喻(分二)

L<sub>1</sub> 頌導師喻

譬如險惡道 迴絕多毒獸 又復無水草 人所怖畏處  
無數千萬眾 欲過此險道 其路甚曠遠 經五百由旬  
時有一導師 強識有智慧 明了心決定 在險濟眾難  
L<sub>2</sub> 頌將導喻(分二)

M<sub>1</sub> 頌中路權立化城(分二)

N<sub>1</sub> 頌眾人退大

眾人皆疲倦 而白導師言 我等今頓乏 於此欲退還

N<sub>2</sub> 頌歡喜前人（分二）

○<sub>1</sub> 頌方便設化

導師作是念 此輩甚可愍 如何欲退還 而失大珍寶  
尋時思方便 當設神通力 化作大城郭 莊嚴諸舍宅  
周匝有園林 渠流及浴池 重門高樓閣 男女皆充滿  
卽作是化已 慰眾言勿懼 汝等入此城 各可隨所樂

○<sub>2</sub> 頌歡喜前人

諸人卽入城 心皆大歡喜 皆生安隱想 自謂已得度

M<sub>2</sub> 頌滅化引至寶所

導師知息已 集眾而告言 汝等當前進 此是化城耳  
我見汝疲極 中路欲退還 故以方便力 權化作此城  
汝今勤精進 當共至寶所

K<sub>2</sub> 頌法合（分二）



L<sub>1</sub> 頌正合

我亦復如是 為一切導師  
見諸求道者 中路而懈廢 不能度生死 煩惱諸險道  
故以方便力 為息說涅槃 言汝等苦滅 所作皆已辦  
既知到涅槃 皆得阿羅漢 爾乃集大眾 為說真實法  
諸佛方便力 分別說三乘 唯有一佛乘 息處故說二  
今為汝說實 汝所得非滅 為佛一切智 當發大精進  
汝證一切智 十力等佛法 具三十二相 乃是真實滅

L<sub>2</sub> 頌舉喻帖合

諸佛之導師 為息說涅槃 既知是息已 引入於佛慧



妙法蓮華經 卷四

五百弟子授記品第八



F 2 授下根記（分二）

G 1 授千二百記（分二）

H 1 授滿慈子記（分二）

I 1 經家敘其默念領解（分二）

J 1 敘其得解歡喜 爾時，富樓那彌多羅尼子，從佛聞是智慧方便，

隨宜說法，又聞授諸大弟子阿耨多羅三藐三菩提記，復聞宿世因緣之事，復聞諸佛有自在神通之力，得未曾有，心淨踊躍。即從座起，到於佛前，頭面禮足，卻住一面，瞻仰尊顏，目不暫捨。

J 2 敘其默念領解 而作是念，世尊甚奇特，所為稀有；隨順世間

若干種性，以方便知見而為說法，拔出眾生處處貪著。我等於佛功德，言不能宣，唯佛世尊能知我等深心本願。

I 2 如來與之述成授記（分二）

J 1 長行（分二）

K 1 述本跡（分三）

L 1 約釋迦世行因發跡

爾時，佛告諸比丘，汝等見是富樓那彌多羅尼子不？我常稱其於說法人中，最為第一；亦常歎其種種功德，精勤護持，助宣我法，能於四眾示教利喜，具足解釋佛之正法，而大饒益同梵行者。自捨如來無能盡其言論之辯。

L 2 約過去世顯其本行

汝等勿謂富樓那但能護持助宣我法，亦於過去九十億諸佛所，護持助宣佛之正法，於彼說法人中，亦最第一。又於諸佛所說空法，明了通達，得四無礙智；常能審諦清淨說法，無有疑惑，具足菩薩神通之力。隨其壽命，

常修梵行；彼佛世人，咸皆謂之實是聲聞。而富樓那以斯方便，饒益無量百千眾生，又化無量阿僧祇人，令立阿耨多羅三藐三菩提。為淨佛土故，常作佛事，教化眾生。

L<sub>3</sub> 約三世佛所述修因 諸比丘！富樓那亦於七佛說法人中，而得第一；今於我所說法人中，亦為第一；於賢劫中，當來諸佛說法人中，亦復第一，而皆護持助宣佛法。亦於未來護持助宣無量無邊諸佛之法，教化饒益無量眾生，令立阿耨多羅三藐三菩提。為淨佛土故，常勤精進，教化眾生。

K<sub>2</sub> 與授記（分三）

L<sub>1</sub> 明因圓果滿 漸漸具足菩薩之道；過無量阿僧祇劫，當於

此土，得阿耨多羅三藐三菩提，號曰法明如來、應供、正遍知、明行足、善逝、世間解、無上士、調御丈夫、天人師、佛、世尊。

L<sub>2</sub> 明國土廣淨（分四）

M<sub>1</sub> 明國大嚴淨 其佛以恆河沙等三千大千世界為一佛土，七寶為地，地平如掌，無有山陵溪澗溝壑，七寶臺觀充滿其中，諸天宮殿，近處虛空，人天交接，兩得相見。

M<sub>2</sub> 明純是善道 無諸惡道，亦無女人，一切眾生皆以化生，無有婬欲，得大神通。身出光明，飛行自在，志念堅固，精進智慧，普皆金色，三十二相而自莊嚴。其國眾生常以二食，一者法喜食，二者禪悅食。

M<sub>3</sub> 明三乘甚多 有無量阿僧祇千萬億那由他諸菩薩眾，得

大神通，四無礙智，善能教化眾生之類。其聲聞眾，算數校計所不能知，皆得具足六通三明，及八解脫。

M<sub>4</sub> 總結莊嚴 其佛國土，有如是等無量功德莊嚴成就。

L<sub>3</sub> 明劫壽法塔 劫名寶明，國名善淨。其佛壽命無量阿僧祇劫，法住甚久，佛滅度後，起七寶塔，遍滿其國。

J<sub>2</sub> 重頌（分二）

K<sub>1</sub> 頌發跡顯本（分二）

L<sub>1</sub> 總發諸聲聞本跡

爾時，世尊欲重宣此義，而說偈言：

諸比丘諦聽 佛子所行道 善學方便故 不可得思議  
知眾樂小法 而畏於大智 是故諸菩薩 作聲聞緣覺  
以無數方便 化諸眾生類 自說是聲聞 去佛道甚遠  
度脫無量眾 皆悉得成就 雖小欲懈怠 漸當令作佛



內秘菩薩行 外現是聲聞 少欲厭生死 實自淨佛土  
示眾有三毒 又現邪見相 我弟子如是 方便度眾生  
若我具足說 種種現化事 眾生聞是者 心則懷疑惑

### L<sub>2</sub> 頌發富樓那本跡

今此富樓那 於昔千億佛 勤修所行道 宣護諸佛法  
為求無上慧 而於諸佛所 現居弟子上 多聞有智慧  
所說無所畏 能令眾歡喜 未曾有疲倦 而以助佛事  
已度大神通 具四無礙智 知諸根利鈍 常說清淨法  
演暢如是義 教諸千億眾 令住大乘法 而自淨佛土  
未來亦供養 無量無數佛 護助宣正法 亦自淨佛土  
常以諸方便 說法無所畏 度不可計眾 成就一切智

### K<sub>2</sub> 頌與之授記

供養諸如來 護持法寶藏 其後得成佛 號名曰法明  
其國名善淨 七寶所合成 劫名為寶明 菩薩眾甚多  
其數無量億 皆度大神通 威德力具足 充滿其國土

聲聞亦無數 三明八解脫 得四無礙智 以是等為僧  
其國諸眾生 姪欲皆已斷 純一變化生 具相莊嚴身  
法喜禪悅食 更無餘食想 無有諸女人 亦無諸惡道  
富樓那比丘 功德悉成滿 當得斯淨土 賢聖眾甚多  
如是無量事 我今但略說

H<sub>2</sub> 授千二百人記（分三）

I<sub>1</sub> 默念請記 爾時，千二百阿羅漢心自在者作是念：

我等歡喜，得未曾有，若世尊各見授記，如餘大弟子者，不亦快乎？

I<sub>2</sub> 如來與記（分二）

J<sub>1</sub> 長行（分三）

K<sub>1</sub> 許記千二 佛知此等心之所念，告摩訶迦葉，是千二百阿羅漢，我今當現前次第與授阿耨多羅三藐三菩提記。

K<sub>2</sub> 別授陳如 於此眾中，我大弟子憍陳如比丘，當供養六萬二

千億佛，然後得成為佛，號曰普明如來、應供、正遍知、明行足、善逝、世間解、無上士、調御丈夫、天人師、佛、世尊。

K<sub>3</sub> 別記五百 其五百阿羅漢、優樓頻螺迦葉、伽耶迦葉、那提迦葉、迦留陀夷、優陀夷、阿菴樓駄、離婆多、劫賓那、薄拘羅、周陀、莎伽陀等，皆當得阿耨多羅三藐三菩提，盡同一號，名曰普明。

### J<sub>2</sub> 重頌（分二）

#### K<sub>1</sub> 頌記憍陳如及五百

爾時，世尊欲重宣此義，而說偈言：

憍陳如比丘 當見無量佛 過阿僧祇劫 乃成等正覺  
常放大光明 具足諸神通 名聞遍十方 一切之所敬  
常說無上道 故號為普明 其國土清淨 菩薩皆勇猛  
咸升妙樓閣 遊諸十方國 以無上供具 奉獻於諸佛  
作是供養已 心懷大歡喜 須臾還本國 有如是神力

佛壽六萬劫 正法住倍壽 像法復倍是 法滅天人憂  
其五百比丘 次第當作佛 同號曰普明 轉次而授記  
我滅度之後 某甲當作佛 其所化世間 亦如我今日  
國土之嚴淨 及諸神通力 菩薩聲聞眾 正法及像法  
壽命劫多少 皆如上所說

K<sub>2</sub> 頌總授一切聲聞記

迦葉汝已知 五百自在者 餘諸聲聞眾 亦當復如是  
其不在此會 汝當為宣說

I<sub>3</sub> 領解 (分二)

J<sub>1</sub> 長行 (分二)

K<sub>1</sub> 經家敘喜 爾時，五百阿羅漢於佛前得授記已，歡喜踊躍，  
即從座起，到於佛前，頭面禮足，悔過自責。

K<sub>2</sub> 自陳領解 (分二)

L<sub>1</sub> 法說 世尊！我等常作是念，自謂已得究竟滅度，今乃知  
之，如無智者。所以者何？我等應得如來智慧，而

便自以小智為足。

L 2 喻說（分二）

M 1 立喻（分二）

N 1 醉酒不覺喻 世尊！譬如有人，至親友家，醉酒而臥；是時，親友官事當行，以無價寶珠繫其衣裏，與之而去。其人醉臥，都不覺知，起已遊行，到於他國；為衣食故，勤力求索，甚大艱難，若少有所得，便以為足。

N 2 親友覺悟喻

於後，親友會遇見之，而作是言：咄哉丈夫！何為衣食乃至如是？我昔欲令汝得安樂，五欲自恣，於某年月日，以無價寶珠繫汝衣裏；今故現在，而汝不知，勤苦憂惱以求自活，甚為癡也。汝今可以此寶，貿易所須，常可如意，無

所乏短。

M 2 法合（分二）

N 1 合醉酒不覺喻 佛亦如是，為菩薩時，教化我等，令發一切智心，而尋廢忘，不知不覺；既得阿羅漢道，自謂滅度，資生艱難，得少為足。

N 2 合親友覺悟喻 一切智願，猶在不失。今者，世尊覺悟我等，作如是言：諸比丘！汝等所得，非究竟滅，我久令汝等種佛善根，以方便故，示涅槃相，而汝謂為實得滅度。世尊！我今乃知實是菩薩，得受阿耨多羅三藐三菩提記，以是因緣，甚大歡喜，得未曾有。

J 2 重頌（分二）

K 1 頌得解歡喜 爾時，阿若憍陳如等，欲重宣此義，而說偈言：

我等聞無上安隱授記聲

歡喜未曾有禮無量智佛

今於世尊前自悔諸過咎

K<sub>2</sub> 頌自陳領解（分二）

L<sub>1</sub> 頌法說於無量佛寶得少涅槃分

如無智愚人便自以為足

L<sub>2</sub> 頌喻說（分二）

M<sub>1</sub> 頌立喻（分二）

N<sub>1</sub> 頌醉臥不覺喻

譬如貧窮人往至親友家其家甚大富具設諸肴膳  
以無價寶珠繫著內衣裏默與而捨去時臥不覺知  
是人既已起遊行詣他國求衣食自濟資生甚艱難  
得少便為足更不願好者不覺內衣裏有無價寶珠

N<sub>2</sub> 頌親友覺悟喻

與珠之親友後見此貧人苦切責之已示以所繫珠

貧人見此珠 其心大歡喜 富有諸財物 五欲而自恣


M<sub>2</sub> 頌法合

我等亦如是 世尊於長夜 常愍見教化 令種無上願  
我等無智故 不覺亦不知 得少涅槃分 自足不求餘  
今佛覺悟我 言非實滅度 得佛無上慧 爾乃為真滅  
我今從佛聞 授記莊嚴事 乃轉次受決 身心遍歡喜



妙法蓮華經 卷四

授學無學人記品第九



G 2 授二千人記（分二）

H 1 二千請記（分二）

I 1 二人請記 爾時，阿難、羅睺羅而作是念：我等每自思惟，設得授記，不亦快乎？即從座起，到於佛前，頭面禮足，俱白佛言：世尊！我等於此，亦應有分，唯有如來，我等所歸；又我等為一切世間天人阿修羅所見知識，阿難常為侍者，護持法藏，羅睺羅是佛之子，若佛見授阿耨多羅三藐三菩提記者，我願既滿，眾望亦足。

I 2 二千請記 爾時，學無學聲聞弟子二千人，皆從座起，偏袒右肩，到於佛前，一心合掌，瞻仰世尊，如阿難、羅睺羅所願，住立一面。

H 2 如來授與（分二）

I 1 記二人（分二）

J 1 記阿難（分五）

K 1 長行正與授記 爾時，佛告阿難：汝於來世，當得作佛，號

山海慧自在通王如來、應供、正遍知、明行足、善逝、世間解、無上士、調御丈夫、天人師、佛、世尊。當供養六十二億諸佛，護持法藏，然後得阿耨多羅三藐三菩提。教化二十千萬億恆河沙諸菩薩等，令成阿耨多羅三藐三菩提。國名常立勝旛，其土清淨，琉璃為地，劫名妙音遍滿。其佛壽命無量千萬億阿僧祇劫，若人於千萬億無量阿僧祇劫中，算術校計，不能得知。正法住世，倍於壽命；像法住世，復倍正法。阿難，是山海慧自在通王佛，為十方無量千萬億恆河沙等諸佛如來所共讚歎，稱其功德。

K<sub>2</sub> 偈頌重明果德 爾時，世尊欲重宣此義，而說偈言：

我今僧中說 阿難持法者  
常供養諸佛 然後成正覺

號曰山海慧 自在通王佛  
其國土清淨 名常立勝旛  
教化諸菩薩 其數如恆沙  
佛有大威德 名聞滿十方  
壽命無有量 以愍眾生故  
正法倍壽命 像法復倍是  
如恆河沙等 無數諸眾生  
於此佛法中 種佛道因緣

K<sub>3</sub> 八千菩薩生疑

爾時，會中新發意菩薩八千人，咸作是念：  
我等尚不聞諸大菩薩得如是記，有何因緣而  
諸聲聞得如是決？

K<sub>4</sub> 如來發迹釋疑

爾時，世尊知諸菩薩心之所念，而告之曰：  
諸善男子！我與阿難等，於空王佛所，同時  
發阿耨多羅三藐三菩提心；阿難常樂多聞，  
我常勤精進，是故我已得成阿耨多羅三藐三

菩提。而阿難護持我法，亦護將來諸佛法藏，教化成就諸菩薩眾，其本願如是，故獲斯記。

### K 5 阿難顯本述歎

阿難面於佛前，自聞授記及國土莊嚴，所願具足，心大歡喜，得未曾有；即時憶念過去無量千萬億諸佛法藏，通達無礙，如今所聞，亦識本願。

爾時，阿難而說偈言：

世尊甚稀有 令我念過去  
無量諸佛法 如今日所聞  
我今無復疑 安住於佛道  
方便為侍者 護持諸佛法

### J 2 記羅睺羅（分二）

K 1 長行授記 爾時，佛告羅睺羅：汝於來世，當得作佛，號蹈七寶華如來、應供、正遍知、明行足、善逝、世

間解、無上士、調御丈夫、天人師、佛、世尊。當供養十世界微塵等數諸佛如來，常為諸佛而作長子，猶如今也。是蹈七寶華佛，國土莊嚴、壽命劫數、所化弟子、正法像法，亦如山海慧自在通王如來無異，亦為此佛而作長子。過是已後，當得阿耨多羅三藐三菩提。

K<sub>2</sub> 偈頌重明 爾時，世尊欲重宣此義，而說偈言：

我為太子時 羅睺為長子 我今成佛道 受法為法子  
於未來世中 見無量億佛 皆為其長子 一心求佛道  
羅睺羅密行 唯我能知之 現為我長子 以示諸眾生  
無量億千萬 功德不可數 安住於佛法 以求無上道

I<sub>2</sub> 記二千人（分三）

J<sub>1</sub> 長行授記 爾時，世尊見學無學二千人，其意柔軟，寂然清淨，一心觀佛；佛告阿難：汝見是學無學二千人不？唯然，已見。阿難！是諸人等，當供養五十世界微塵

數諸佛如來，恭敬尊重，護持法藏；末後，同時於十方國，各得成佛，皆同一號，名曰寶相如來、應供、正遍知、明行足、善逝、世間解、無上士、調御丈夫、天人師、佛、世尊。壽命一劫，國土莊嚴，聲聞菩薩，正法像法，皆悉同等。

J<sub>2</sub> 偈頌重明

爾時，世尊欲重宣此義，而說偈言：

是二千聲聞 今於我前住 悉皆與授記 未來當成佛  
所供養諸佛 如上說塵數 護持其法藏 後當成正覺  
各於十方國 悉同一名號 俱時坐道場 以證無上慧  
皆名為寶相 國土及弟子 正法與像法 悉等無有異  
咸以諸神通 度十方眾生 名聞普周遍 漸入於涅槃  
J<sub>3</sub> 得記歡喜  
爾時，學無學二千人，聞佛授記，歡喜踊躍，而說

偈言：


世尊慧燈明 我聞授記音 心歡喜充滿 如甘露見灌





妙法蓮華經 卷四

# 法師品第十



C 2 法師品歎持經人與所持法（分二）

D 1 歎美能持法人（分二）

E 1 明稟道弟子功深福重（分二）

F 1 佛世弟子 爾時，世尊因藥王菩薩，告八萬大士：藥王！汝見是大眾中，無量諸天、龍王、夜叉、乾闥婆、阿修羅、迦樓羅、緊那羅、摩睺羅伽，人與非人，及比丘、比丘尼、優婆塞、優婆夷，求聲聞者，求辟支佛者，求佛道者，如是等類，咸於佛前，聞妙法華經，一偈、一句，乃至一念隨喜者，我皆與授記，當得阿耨多羅三藐三菩提。

F 2 滅後弟子 佛告藥王，又如來滅度之後，若有人聞妙法華經，乃至一偈、一句、一念隨喜者，我亦與授阿耨多羅三藐三菩提記。

E 2 明授道師功深福重（分二）

F 1 長行（分二）

G 1 別明（分二）

H 1 明現世 若復有人，受持、讀誦、解說、書寫妙法華經，乃至一偈，

於此經卷，敬視如佛，種種供養，華香、瓔珞、末香、塗香、燒香、繒蓋、幢旛、衣服、伎樂，乃至合掌恭敬。

藥王！當知是諸人等，已曾供養十萬億佛，於諸佛所，成就大願，愍眾生故，生此人間。

藥王！若有人問，何等眾生於未來世當得作佛？應示是諸人等，於未來世，必得作佛。何以故？若善男子、善女人，於法華經，乃至一句，受持、讀誦、解說、書寫，種種供養經卷，華香、瓔珞、末香、塗香、燒香、繒蓋、幢旛、衣服、伎樂，合掌恭敬，是人一切世間所應瞻奉，應以如來供養而供養之。當知此人是菩薩，成就阿耨多羅三藐三菩提，哀愍眾生，願生此間，廣演分別妙法華經；何況盡能受持種種供養者？

藥王！當知是人，自捨清淨業報，於我滅度後，愍眾生故，生於惡世，廣演此經。

H 2 明來世  
若是善男子、善女人，我滅度後，能竊為一人說法華經，

乃至一句，當知是人，則如來使，如來所遣，行如來事；何況於大眾中，廣為人說。

G 2 總明 藥王！若有惡人，以不善心，於一劫中，現於佛前，常毀罵佛，其罪尚輕；若人以一惡言，毀訾在家出家讀誦法華經者，其罪甚重。

藥王！其有讀誦法華經者，當知是人，以佛莊嚴而自莊嚴，則為如來肩所荷擔，其所至方，應隨向禮，一心合掌，恭敬供養，尊重讚歎，華香、瓔珞、末香、塗香、燒香、繒蓋、幢旛、衣服、餽饌，作諸伎樂，人中上供而供養之，應持天寶而以散之，天上寶聚，應以奉獻，所以者何？是人歡喜說法，須臾聞之，即得究竟阿耨多羅三藐三菩提故。

F 2 重頌（分三）

G 1 獎勵自行利他 爾時，世尊欲重宣此義，而說偈言：

若欲住佛道 成就自然智 常當勤供養 受持法華者  
其有欲疾得 一切種智慧 當受持是經 並供養持者

G 2 重頌別總兩義（分二）

H 1 頌別明（分二）

I 1 頌現世 若有能受持 妙法華經者 當知佛所使 愍念諸眾生  
諸有能受持 妙法華經者 捨於清淨土 愍眾故生此  
當知如是人 自在所欲生 能於此惡世 廣說無上法  
應以天華香 及天寶衣服 天上妙寶聚 供養說法者

I 2 頌來世 吾滅後惡世 能持是經者 當合掌禮敬 如供養世尊

上饌眾甘美 及種種衣服 供養是佛子 冀得須臾聞  
若能於後世 受持是經者 我遣在人中 行於如來事

H 2 頌總明 若於一劫中 常懷不善心 作色而罵佛 獲無量重罪

其有讀誦持 是法華經者 須臾加惡言 其罪復過彼  
有人求佛道 而於一劫中 合掌在我前 以無數偈讚  
由是讚佛故 得無量功德 歎美持經者 其福復過彼  
於八十億劫 以最妙色聲 及與香味觸 供養持經者  
如是供養已 若得須臾聞 則應自欣慶 我今獲大利

G<sub>3</sub> 結歎經最第一 藥王今告汝 我所說諸經 而於此經中 法華最第一

D<sub>2</sub> 歎美所持之法及示通經方軌(分二)

E<sub>1</sub> 長行(分二)

F<sub>1</sub> 歎經法(分五)

G<sub>1</sub> 約法歎 爾時，佛復告藥王菩薩摩訶薩：我所說經典，無量千萬億，已說，今說，當說，而於其中，此法華經最為難信難解。藥王！此經是諸佛秘要之藏，不可分布妄授與人，諸佛世尊之所守護，從昔以來，未曾顯說；而此經者，如來現在，猶多怨嫉，沉滅度後。

G<sub>2</sub> 約人歎 藥王！當知如來滅後，其能書持、讀誦、供養，為他人說者，如來則為以衣覆之，又為他方現在諸佛之所護念；是人有大信力，及志願力、諸善根力，當知是人與如來共宿，則為如來手摩其頭。

G<sub>3</sub> 約處歎 藥王！在在處處，若說若讀，若誦若書，若經卷所住處，皆應起七寶塔，極令高廣嚴飾，不需復安舍利。所以者何？此

中已有如來全身，此塔應以一切華香、瓔珞、繒蓋、幢幡、伎樂、歌頌，供養恭敬，尊重讚歎。若有人得見此塔，禮拜供養，當知是等，皆近阿耨多羅三藐三菩提。

G 4 約因歎 藥王！多有人在家、出家，行菩薩道，若不能得見聞、讀誦、書持、供養是法華經者，當知是人未善行菩薩道；若有得聞是經典者，乃能善行菩薩之道。

#### G 5 約果歎（分五）

H 1 明近果 其有眾生求佛道者，若見若聞是法華經，聞已，信解受持者；當知是人，得近阿耨多羅三藐三菩提。

H 2 立喻 藥王！譬如有人，渴乏須水，於彼高原，穿鑿求之，猶見乾土，知水尚遠，施功不已，轉見濕土，遂漸至泥，其心決定，知水必近。

H 3 法合 菩薩亦復如是，若未聞未解，未能修習是法華經，當知是人，去阿耨多羅三藐三菩提尚遠；若得聞解，思惟修習，必知得近阿耨多羅三藐三菩提。

H<sub>4</sub> 釋近 所以者何？一切菩薩阿耨多羅三藐三菩提，皆屬此經；此經開方便門，示真實相。是法華經藏，深固幽遠，無人能到，今佛教化成就菩薩，而為開示。

H<sub>5</sub> 揀非 藥王！若有菩薩聞是法華經，驚疑怖畏，當知是為新發意菩薩；若聲聞人聞是經，驚疑怖畏，當知是為增上慢者。

F<sub>2</sub> 示方軌（分二）

G<sub>1</sub> 正明方法 藥王！若有善男子、善女人，如來滅後，欲為四眾說是法華經者，云何應說？是善男子、善女人，入如來室，著如來衣，坐如來座，爾乃應為四眾廣說斯經。如來室者，一切眾生中，大慈悲心是；如來衣者，柔和忍辱心是；如來座者，一切法空是。安住是中，然後以不懈怠心，為諸菩薩及四眾，廣說是法華經。

G<sub>2</sub> 明五利益 藥王！我於餘國遣化人，為其集聽法眾；亦遣化比丘、比丘尼、優婆塞、優婆夷，聽其說法；是諸化人，聞法信受，隨順不逆。若說法者，在空閑處，我時廣遣天龍、鬼



神、乾闥婆、阿修羅等，聽其說法。我雖在異國，時時令說法者得見我身；若於此經忘失句讀，我還為說令得具足。

### E 2 重頌（分三）

F 1 總勸 爾時，世尊欲重宣此義，而說偈言：

欲捨諸懈怠 應當聽此經 是經難得聞 信受者亦難

### F 2 頌長行（分二）

#### G 1 頌約果歎（分二）

H 1 頌立喻 如人渴須水 穿鑿於高原 猶見乾燥土 知去水尚遠

漸見濕土泥 決定知近水

H 2 頌法合 藥王汝當知 如是諸人等 不聞法華經 去佛智甚遠

若聞是深經 決了聲聞法 是諸經之王 聞已諦思惟

當知此人等 近於佛智慧

#### G 2 頌示方軌（分二）

H 1 頌正明方法 若人說此經 應入如來室 著於如來衣 而坐如來座

處眾無所畏 廣為分別說 大慈悲為室 柔和忍辱衣  
諸法空為座 處此為說法 若說此經時 有人惡口罵  
加刀杖瓦石 念佛故應忍

H<sub>2</sub> 頌明五利益 我千萬億土 現淨堅固身 於無量億劫 為眾生說法

若我滅度後 能說此經者 我遣化四眾 比丘比丘尼  
及清淨士女 供養於法師 引導諸眾生 集之令聽法  
若人欲加惡 刀杖及瓦石 則遣變化人 為之作衛護  
若說法之人 獨在空閑處 寂寞無人聲 讀誦此經典  
我爾時為現 清淨光明身 若忘失章句 為說令通利  
若人具是德 或為四眾說 空處讀誦經 皆得見我身  
若人在空閑 我遣天龍王 夜叉鬼神等 為作聽法眾  
是人樂說法 分別無罣礙 諸佛護念故 能令大眾喜

F<sub>3</sub> 結勸 若親近法師 速得菩薩道 隨順是師學 得見恆沙佛

妙法蓮華經 卷四

# 見寶塔品第十一



B 2 示佛知見·寶塔天授二品 (分二)

C 1 寶塔出現顯示實相 (分二)

D 1 長行 (分三)

E 1 明寶塔湧現 (分六)

F 1 塔現之相 爾時，佛前有七寶塔，高五百由旬，縱廣二百五十由旬，從地湧出，住在空中。種種寶物而莊校之；五千欄楯，龕室千萬，無數幢幡以為嚴飾，垂寶瓔珞寶鈴萬億而懸其上。四面皆出多摩羅跋栴檀之香，充遍世界。其諸旛蓋，以金、銀、琉璃、碑磔、瑪瑙、真珠、玫瑰，七寶合成，高至四天王宮。

F 2 諸天供養 三十三天，雨天曼陀羅華，供養寶塔。餘諸天、龍、夜叉、乾闥婆、阿修羅、迦樓羅、緊那羅、摩睺羅伽、人非人等，千萬億眾，以一切華香、瓔珞、旛蓋、伎樂，供養寶塔，恭敬尊重讚歎。

F 3 多寶稱歎 爾時，寶塔中出大音聲，歎言：善哉！善哉！善哉！釋迦牟尼世尊！

能以平等大慧教菩薩法，佛所護念妙法華經，為大眾說；如是！如是！釋迦牟尼世尊！如所說者，皆是真實。

F 4 時眾驚疑 爾時四眾，見大寶塔住在空中，又聞塔中所出音聲，皆得法喜，怪未曾有，從座而起，恭敬合掌，卻住一面。

F 5 樂說請問 爾時，有菩薩摩訶薩名大樂說，知一切世間天、人、阿修羅等，心之所疑，而白佛言：世尊！以何因緣，有此寶塔從地湧出，又於其中，發是音聲？

F 6 如來垂答（分三）

G 1 超答何故湧出 爾時，佛告大樂說菩薩：此寶塔中，有如來全身，乃往過去東方無量千萬億阿僧祇世界，國名寶淨，彼中有佛，號曰多寶；其佛行菩薩道時，作大誓願，若我成佛，滅度之後，於十方國土，有說法華經處，我之塔廟為聽是經故，湧現其前，為作證明，讚言善哉。

G 2 追答何因有塔 彼佛成道已，臨滅度時，於天人大眾中，告諸比丘，我滅度後，欲供養我全身者，應起一大塔。

G<sub>3</sub> 答何故發是音聲 其佛以神通願力，十方世界，在在處處，若有說法華經者，彼之寶塔皆湧出其前，全身在於塔中，讚言善哉善哉。

大樂說！今多寶如來塔，聞說法華經故，從地湧出，讚言善哉善哉。

E<sub>2</sub> 明分身遠集（分七）

F<sub>1</sub> 樂說請見多寶 是時，大樂說菩薩以如來神力故，白佛言：世尊！我等願欲見此佛身。

F<sub>2</sub> 佛告分身應集 佛告大樂說菩薩摩訶薩：是多寶佛有深重願，若我寶塔為聽法華經故，出於諸佛前時，其有欲以我身示四眾者，彼佛分身諸佛，在於十方世界說法，盡還集一處，然後我身乃出現耳。

大樂說！我分身諸佛，在於十方世界說法者，今應當集。

F<sub>3</sub> 樂說請集分身 大樂說白佛言：世尊！我等亦願欲見世尊分身諸佛，禮

拜供養。

F<sub>4</sub> 如來放光遠召爾時，佛放白毫一光，即見東方五百萬億那由他恆河沙等國土諸佛，彼諸國土，皆以玻瓈為地，寶樹寶衣以為莊嚴，無數千萬億菩薩充滿其中，遍張寶幔，寶網羅上。彼國諸佛，以大妙音而說諸法，及見無量千萬億菩薩遍滿諸國，為眾說法。南西北方，四維上下，白毫相光所照之處，亦復如是。

F<sub>5</sub> 諸佛告眾同來爾時，十方諸佛各告眾菩薩言：善男子！我今應往娑婆世界釋迦牟尼佛所，並供養多寶如來寶塔。

F<sub>6</sub> 嚴淨堪忍國界（分三）

G<sub>1</sub> 變娑婆一界時娑婆世界即變清淨，琉璃為地，寶樹莊嚴，黃金為繩以界八道，無諸聚落、村營、城邑、大海、江河、山川、林藪。燒大寶香，曼陀羅華遍布其地，以寶網幔羅覆其上，懸諸寶鈴。唯留此會眾，移諸天人置於他土。是時諸佛，各將一大菩薩以為侍者，至娑婆世界，各到

寶樹下。一一寶樹，高五百由旬，枝葉華果次第莊嚴，諸寶樹下皆有師子之座，高五由旬，亦以大寶而校飾之。

爾時，諸佛各於此座結跏趺坐，如是展轉，遍滿三千大千世界，而於釋迦牟尼佛一方所分之身，猶故未盡。

### G<sub>2</sub> 變八方世界

時釋迦牟尼佛，欲容受所分身諸佛故，八方各更變二百萬億那由他國，皆令清淨，無有地獄、餓鬼、畜生，及阿修羅，又移諸天人置於他土。所化之國，亦以琉璃為地，寶樹莊嚴，樹高五百由旬，枝葉華果次第莊嚴，樹下皆有寶師子座，高五由旬，種種諸寶以為莊校。亦無大海江河，及目真鄰陀山、摩訶目真鄰陀山、鐵圍山、大鐵圍山、須彌山等諸山王，通為一佛國土。寶地平正，寶交露幔，遍覆其上，懸諸旛蓋，燒大寶香，諸天寶華遍布其地。

### G<sub>3</sub> 更變八方世界

釋迦牟尼佛為諸佛當來坐故，復於八方，各更變二百



萬億那由他國，皆令清淨，無有地獄、餓鬼、畜生，及阿修羅，又移諸天人置於他土。所化之國，亦以琉璃為地，寶樹莊嚴，樹高五百由旬，枝葉華果次第莊嚴，樹下皆有寶師子座，高五由旬，亦以大寶而校飾之。亦無大海江河，及目真鄰陀山、摩訶目真鄰陀山、鐵圍山、大鐵圍山、須彌山等諸山王，通為一佛國土。寶地平正，寶交露幔，遍覆其上，懸諸幡蓋，燒大寶香，諸天寶華，遍布其地。

爾時，東方釋迦牟尼佛所分之身，百千萬億那由他恆河沙等國土中諸佛，各各說法，來集於此，如是次第，十方諸佛皆悉來集，坐於八方；爾時一一方，四百萬億那由他國土諸佛如來，遍滿其中。

F 7 與欲開此寶塔（分五）

G 1 諸佛問訊說欲 是時，諸佛各在寶樹下坐師子座，皆遣侍者問訊釋迦牟尼佛，各齎寶華滿掬，而告之言：善男子！汝往詣

耆闍崛山釋迦牟尼佛所，如我辭曰：少病少惱，氣力安樂，及菩薩聲聞眾悉安穩不？

以此寶華散佛供養，而作是言：彼某甲佛，與欲開此寶塔。諸佛遣使，亦復如是。

G<sub>2</sub> 釋迦右指開塔  
爾時，釋迦牟尼佛見所分身佛悉已來集，各各坐於師子之座，皆聞諸佛與欲同開寶塔，即從座起，住虛空中。一切四眾，起立合掌，一心觀佛。

於是釋迦牟尼佛，以右指開七寶塔戶，出大音聲，如卻關鑰，開大城門。

G<sub>3</sub> 四眾同皆見聞  
即時，一切眾會皆見多寶如來於寶塔中，坐師子座，全身不散，如入禪定。又聞其言：善哉！善哉！釋迦牟尼佛！快說是法華經，我為聽是經故，而來至此。爾時，四眾等，見過去無量千萬億劫滅度佛說如是言，歎未曾有，以天寶華聚，散多寶佛及釋迦牟尼佛上。

G 4 二佛分座而坐 爾時，多寶佛於寶塔中，分半座與釋迦牟尼佛，而作是言：釋迦牟尼佛！可就此座。

即時，釋迦牟尼佛入其塔中，坐其半座，結跏趺坐。

G 5 四眾請加處空 爾時，大眾見二如來在七寶塔中，師子座上結跏趺坐，各作是念：佛坐高遠，惟願如來以神通力，令我等輩俱處虛空。

即時，釋迦牟尼佛以神通力，接諸大眾皆在虛空。

E 3 明釋迦唱募 以大音聲普告四眾：誰能於此娑婆國土，廣說妙法華經，今正是時。如來不久當入涅槃，佛欲以此妙法華經付囑有在。

### D 2 重頌（分三）

E 1 頌寶塔湧現 爾時，世尊欲重宣此義，而說偈言：

聖主世尊 雖久滅度 在寶塔中 尚為法來  
諸人云何 不勤為法 此佛滅度 無央數劫  
處處聽法 以難遇故 彼佛本願 我滅度後  
在在所往 常為聽法

E 2 頌分身遠集 又我分身 無量諸佛 如恆沙等 來欲聽法  
及見滅度 多寶如來 各捨妙土 及弟子眾  
天人龍神 諸供養事 令法久住 故來至此  
為坐諸佛 以神通力 移無量眾 令國清淨  
諸佛各各 詣寶樹下 如清淨池 蓮華莊嚴  
其寶樹下 諸師子座 佛坐其上 光明嚴飾  
如夜闇中 然大炬火 身出妙香 遍十方國  
眾生蒙熏 喜不自勝 譬如大風 吹小樹枝  
以是方便 令法久住

E 3 頌釋迦唱募(分二)

F 1 舉三佛以勸持經(分三)

G 1 募覓其人 告諸大眾 我滅度後 誰能護持 讀說斯經  
今於佛前 自說誓言

G 2 三佛以勸 其多寶佛 雖久滅度 以大誓願 而師子吼  
多寶如來 及與我身 所集化佛 當知此意

諸佛子等 誰能護法 當發大願 令得久住

G 3 釋上勸意 其有能護 此經法者 則為供養 我及多寶

此多寶佛 處於寶塔 常遊十方 為是經故

亦復供養 諸來化佛 莊嚴光飾 諸世界者

若說此經 則為見我 多寶如來 及諸化佛

F 2 舉難持以堅誓願 (分二)

G 1 正舉勸持 (分三)

H 1 誠勸 諸善男子 各諦思惟 此為難事 宜發大願

H 2 正舉難持以勸 諸餘經典 數如恆沙 雖說此等 未足為難

若接須彌 擲置他方 無數佛土 亦未為難

若以足指 動大千界 遠擲他國 亦未為難

若立有頂 為眾演說 無量餘經 亦未為難

若佛滅後 於惡世中 能說此經 是則為難

假使有人 手把虛空 而以遊行 亦未為難

於我滅後 若自書持 若使人書 是則為難

若以大地 置足甲上 升於梵天 亦未為難  
佛滅度後 於惡世中 暫讀此經 是則為難  
假使劫燒 擔負乾草 入中不燒 亦未為難  
我滅度後 若持此經 為一人說 是則為難  
若持八萬 四千法藏 十二部經 為人演說  
令諸聽者 得六神通 雖能如是 亦未為難  
於我滅後 聽受此經 問其義趣 是則為難  
若人說法 令千萬億 無量無數 恆沙眾生  
得阿羅漢 具六神通 雖有是益 亦未為難  
於我滅後 若能奉持 如斯經典 是則為難  
H<sub>3</sub> 釋難持意 我為佛道 於無量土 從始至今 廣說諸經  
而於其中 此經第一 若有能持 則持佛身

G<sub>2</sub> 總釋勸意（分三）

H<sub>1</sub> 重募持經之人 諸善男子 於我滅後 誰能受持 讀誦此經  
今於佛前 自說誓言

H<sub>2</sub> 明能持難持則諸佛歡喜 此經難持 若暫持者 我則歡喜 諸佛亦然  
如是之人 諸佛所歎


H<sub>3</sub> 明即成自行化他勝行 是則勇猛 是則精進 是名持戒 行頭陀者  
則為疾得 無上佛道 能於來世 讀持此經  
是真佛子 住淳善地 佛滅度後 能解其義  
是諸天人 世間之眼 於恐懼世 能須與說  
一切天人 皆應供養





妙法蓮華經 卷四

# 提婆達多品第十二



C 2 難易得果證法平等 (分二)

D 1 明昔日達多通經，釋迦資之成道 (分三) .

E 1 明往昔師弟持經之相 (分二)

F 1 長行 (分四)

G 1 明求法時節 爾時，佛告諸菩薩及天人四眾，吾於過去無量劫中，求

法華經，無有懈怠；於多劫中，常作國王，發願求於無上菩提，心不退轉。

G 2 正明求法 (分二)

H 1 明六度行滿 為欲滿足六波羅蜜，勤行布施，心無憍惜，象馬七珍、國城妻子、奴婢僕從、頭目髓腦、身肉手足，不惜軀命。

H 2 明推求妙法 時世人民，壽命無量，為於法故，捐捨國位，委政太子，擊鼓宣令，四方求法，誰能為我說大乘者，吾當終身供給走使。

G 3 求得法師 時有仙人來白王言：我有大乘，名妙法華經，若不違我，

當為宣說。

G 4 受法奉行 王聞仙言，歡喜踊躍，即隨仙人供給所須，採果汲水，捨薪設食，乃至以身而為床座，身心無倦。於時奉事，經於千歲，為於法故，精勤給侍，令無所乏。

#### F 2 重頌（分四）

G 1 頌時節及正求法 爾時，世尊欲重宣此義，而說偈言：

我念過去劫 為求大法故 雖作世國王 不貪五欲樂  
椎鐘告四方 誰有大法者 若為我解說 身當為奴僕

G 2 頌求得法師 時有阿私仙 來白於大王 我有微妙法 世間所稀有  
若能修行者 吾當為汝說

G 3 頌受法奉行 時王聞仙言 心生大喜悅 即便隨仙人 供給於所須  
採薪及果蔬 隨時恭敬與 情存妙法故 身心無懈倦

G 4 結證勸信 普為諸眾生 勤求於大法 亦不為己身 及以五欲樂  
故為大國王 勤求獲此法 遂致得成佛 今故為汝說

#### E 2 結會古今（分二）

F 1 正結會古今 佛告諸比丘：爾時王者，則我身是；時仙人者，今提婆達多是。

F 2 明師弟功滿（分二）

G 1 明師弟圓因報滿 由提婆達多善知識故，令我具足六波羅蜜，慈悲喜捨，三十二相，八十種好，紫磨金色，十力、四無所畏、四攝法、十八不共神通道力，成等正覺，廣度眾生，皆因提婆達多善知識故。

G 2 明法師妙果當成（分三）

H 1 明正果成 告諸四眾，提婆達多卻後過無量劫，當得成佛，號曰天王如來、應供、正遍知、明行足、善逝、世間解、無上士、調御丈夫、天人師、佛、世尊，世界名天道。

H 2 明所化度 時天王佛住世二十中劫，廣為眾生說於妙法，恆河沙眾生發無上生得阿羅漢果，無量眾生發緣覺心，恆河沙眾生發無上道心，得無生忍，至不退轉。

H 3 明滅後利益 時天王佛般涅槃後，正法住世二十中劫。全身舍利起

七寶塔，高六十由旬，縱廣四十由旬，諸天人民，悉以雜華、末香、燒香、塗香、衣服、瓔珞、幢幡、寶蓋、伎樂歌頌，禮拜供養七寶妙塔。無量眾生得阿羅漢果，無量眾生悟辟支佛，不可思議眾生發菩提心，至不退轉。

E 3 勸信生善 佛告諸比丘：未來世中，若有善男子、善女人，聞妙法華經提婆達多品，淨心信敬，不生疑惑者，不墮地獄、餓鬼、畜生，生十方佛前，所生之處，常聞此經；若生人天中，受勝妙樂，若在佛前，蓮華化生。

D 2 明今日文殊弘經，龍女因之成佛（分二）

E 1 明文殊通經（分五）

F 1 智積請退 於時下方多寶世尊所從菩薩，名曰智積，白多寶佛：當還本土。

F 2 釋尊止之 釋迦牟尼佛告智積曰：善男子！且待須臾；此有菩薩名文殊師利，可與相見，論說妙法，可還本土。

F<sub>3</sub> 文殊尋來 爾時，文殊師利坐千葉蓮華，大如車輪，俱來菩薩亦坐寶蓮華，從於大海娑竭羅龍宮自然湧出，住虛空中，詣靈鷲山，從蓮華下，至於佛所，頭面敬禮二世尊足。修敬已畢，往智積所，共相慰問，卻坐一面。

F<sub>4</sub> 智積請問 智積菩薩問文殊師利：仁往龍宮，所化眾生，其數幾何？

F<sub>5</sub> 文殊垂答 文殊師利言：其數無量，不可稱計，非口所宣，非心所測，且待須臾，自當證知。所言未竟，無數菩薩坐寶蓮華從海湧出，詣靈鷲山，住在虛空；此諸菩薩，皆是文殊師利之所化度，具菩薩行，皆共論說六波羅蜜。本聲聞人，在虛空中說聲聞行，今皆修行大乘空義。

文殊師利謂智積曰：於海教化，其事如是。

E<sub>2</sub> 明通經利益（分十）

F<sub>1</sub> 智積偈讚 爾時，智積菩薩以偈讚曰：

大智德勇健 化度無量眾 今此諸大會 及我皆已見  
演暢實相義 開闡一乘法 廣導諸眾生 令速成菩提

F 2 文殊自敘 文殊師利言：我於海中，唯常宣說妙法華經。

F 3 問有得果 智積問文殊師利言：此經甚深微妙，諸經中寶，世所稀有，頗有眾生勤加精進，修行此經，速得佛不？

F 4 答有其人 文殊師利言：有娑竭羅龍王女，年始八歲，智慧利根，善知眾生諸根行業，得陀羅尼，諸佛所說甚深秘藏，悉能受持。深入禪定，了達諸法，於剎那頃，發菩提心，得不退轉，辯才無礙；慈念眾生，猶如赤子，功德具足，心念口演，微妙廣大，慈悲仁讓，志意和雅，能至菩提。

F 5 智積疑問 智積菩薩言：我見釋迦如來，於無量劫難行苦行，積功累德，求菩提道，未曾止息；觀三千大千世界，乃至無有如芥子許，非是菩薩捨身命處，為眾生故，然後乃得成菩提道。不信此女於須臾頃，便成正覺。

F 6 龍女釋疑 言論未訖，時龍王女忽現於前，頭面禮敬，卻住一面，以偈讚曰：

深達罪福相 遍照於十方 微妙淨法身 具相三十二

以八十種好 用莊嚴法身 天人所戴仰 龍神咸恭敬  
一切眾生類 無不宗奉者 又聞成菩提 唯佛當證知  
我闡大乘教 度脫苦眾生

F 7 挾權難問 時舍利弗語龍女言：汝謂不久得無上道，是事難信。所以者何？女身垢穢，非是法器，云何能得無上菩提？佛道懸曠，經無量劫，勤苦積行，具修諸度，然後乃成；又女人身，猶有五障，一者不得做梵天王，二者帝釋，三者魔王，四者轉輪聖王，五者佛身，云何女身速得成佛？

F 8 獻珠除疑 爾時，龍女有一寶珠，價值三千大千世界，持以上佛，佛即受之。龍女謂智積菩薩、尊者舍利弗言：我獻寶珠，世尊納受，是事疾不？答言：甚疾。女言：以汝神力，觀我成佛，復速於此。

當時眾會，皆見龍女，忽然之間，變成男子，具菩薩行，即往南方無垢世界，坐寶蓮華，成等正覺，三十二相，八十種好，普為十方一切眾生演說妙法。



F 9 時眾得益 爾時娑婆世界，菩薩、聲聞、天龍八部、人與非人，皆遙見彼龍女成佛，普為時會人天說法，心大歡喜，悉遙敬禮。無量眾生聞法解悟，得不退轉；無量眾生得受道記。

無垢世界，六反震動，娑婆世界，三千眾生住不退地，三千眾生發菩提心，而得受記。

F 10 會眾默然 智積菩薩及舍利弗，一切眾會，默然信受。



妙法蓮華經 卷四

# 勸持品第十三



B3 悟佛知見（持品至壽量四品）（分二）

C1 因跡門弟子通經，文殊請問如來示軌四行（分二）

D1 明持經（分二）

E1 明受持（分三）

F1 菩薩奉命此土持經

爾時，藥王菩薩摩訶薩，及大樂說菩薩摩訶薩，與二萬菩薩眷屬俱，皆於佛前作是誓言：惟願世尊不以為慮，我等於佛滅後，當奉持讀誦，說此經典；後惡世眾生，善根轉少，多增上慢，貪利供養，增不善根，遠離解脫，雖難可教化，我等當起大忍力，讀誦此經，持說書寫，種種供養，不惜身命。

F2 聲聞發願他土弘經

爾時，眾中五百阿羅漢得受記者，白佛言：世尊！我等亦自誓願，於異國土廣說此經。復有學無學八千人得受記者，從座而起，合掌向佛，作是誓言：世尊！我等亦當於他國土廣說此經，所以者何？是娑婆國中，人多弊惡，懷增上慢，功德淺

薄，瞋濁諂曲，心不實故。

F<sub>3</sub> 六千比丘尼眾請記（分三）

G<sub>1</sub> 波闍波提請記 爾時，佛姨母摩訶波闍波提比丘尼，與學無學比丘尼六千人俱，從座而起，一心合掌，瞻仰尊顏，目不暫捨。於時，世尊告憍曇彌：何故憂色而視如來，汝心將無謂我不說汝名，授阿耨多羅三藐三菩提記耶？憍曇彌！我先總說一切聲聞皆已授記，今汝欲知記者，將來之世，當於六萬八千億諸佛法中，為大法師，及六千學無學比丘尼俱為法師。汝如是漸漸具菩薩道，當得作佛，號一切眾生喜見如來、應供、正遍知、明行足、善逝、世間解、無上士、調御丈夫、天人師、佛、世尊。憍曇彌！是一切眾生喜見佛，及六千菩薩，轉次授記，得阿耨多羅三藐三菩提。

G<sub>2</sub> 耶輸陀羅請記 爾時，羅睺羅母耶輸陀羅比丘尼，作是念：世尊於授記中，獨不說我名。佛告訴耶輸陀羅：汝於來世，

百千萬億諸佛法中，修菩薩行，為大法師，漸具佛道；於善國中，當得作佛，號具足千萬光相如來、應供、正遍知、明行足、善逝、世間解、無上士、調御丈夫、天人師、佛、世尊，佛壽無量阿僧祇劫。

G<sub>3</sub> 尼眾領解發願 爾時，摩訶波闍波提比丘尼，及耶輸陀羅比丘尼，並其眷屬，皆大歡喜，得未曾有，即於佛前而說偈言：

世尊導師 安隱天人 我等聞記 心安具足

諸比丘尼說是偈已，白佛言：世尊！我等亦能於他方國，廣宣此經。

## E<sub>2</sub> 明勸持（分二）

### F<sub>1</sub> 長行（分二）

G<sub>1</sub> 菩薩請敕 爾時，世尊視八十萬億那由他諸菩薩摩訶薩；是諸菩薩皆是阿惟越致，轉不退法輪，得諸陀羅尼。即從座起，至於佛前，一心合掌，而作是念：若世尊告敕我等，持說此經者，當如佛教，廣宣斯法。復作是念：佛今默然，不見告

敕，我當云何？

G 2 順佛意發誓 時諸菩薩敬順佛意，並欲自滿本願，便於佛前作師子吼，而發誓言：世尊！我等於如來滅後，周旋往返十方世界，能令眾生書寫此經，受持讀誦，解說其義，如法修行，正憶念，皆是佛之威力；惟願世尊，在於他方，遙見守護。

F 2 偈頌（分三）

G 1 廣明忍難（分三）

H 1 總明惡世弘經 即時，諸菩薩俱同發聲，而說偈言：

惟願不為慮 於佛滅度後 恐怖惡世中 我等當廣說  
H 2 廣明所忍之境 有諸無智人 惡口罵詈等 及加刀杖者 我等皆當忍

惡世中比丘 邪智心諂曲 未得謂為得 我慢心充滿  
或有阿練若 納衣在空閒 自謂行真道 輕賤人間者  
貪著利養故 與白衣說法 為世所恭敬 如六通羅漢  
是人懷惡心 常念世俗事 假名阿練若

好出我等過 而做如是言 此諸比丘等 為貪利養故  
說外道論義 自作此經典 誑惑世間人 為求名聞故  
分別於是經 常在大眾中 欲毀我等故 向國王大臣  
婆羅門居士 及餘比丘眾 誹謗說我惡 謂是邪見人  
說外道論議 我等敬佛故 悉忍是諸惡 為斯所輕言  
汝等皆是佛 如此輕慢言 皆當忍受之

H<sub>3</sub> 敬佛忍難 濁劫惡世中 多有諸恐怖 惡鬼入其身 罵詈毀辱我  
我等敬信佛 當著忍辱鎧 為說是經故 忍此諸難事  
我不愛身命 但惜無上道 我等於來世 護持佛所囑  
世尊自當知 濁世惡比丘 不知佛方便 隨宜所說法  
惡口而鬻蹙 數數見擯出 遠離於塔寺 如是等眾惡  
念佛告敕故 皆當忍是事

G<sub>2</sub> 略明通經 諸聚落城邑 其有求法者 我皆到其所 說佛所囑法  
我是世尊使 處眾無所畏 我當善說法 願佛安隱住  
G<sub>3</sub> 總結誓願 我於世尊前 諸來十方佛 發如是誓言 佛自知我心



妙法蓮華經 卷五

# 安樂行品第十四



D 2 示方軌 (分二)

E 1 文殊請問 爾時，文殊師利法王子菩薩摩訶薩白佛言：世尊！是諸菩薩，甚為難有，敬順佛故，發大誓願，於後惡世，護持讀說是法華經。世尊！菩薩摩訶薩，於後惡世，云何能說是經？

E 2 如來垂答 (分三)

F 1 總標章門 佛告文殊師利：若菩薩摩訶薩，於後惡世，欲說是經，當安住四法。

F 2 詳釋四行 (分四)

G 1 身安樂行 (分二)

H 1 長行 (分二)

I 1 總標行近 一者，安住菩薩行處及親近處，能為眾生演說是經。

I 2 別釋行近 (分二)

J 1 釋行處 文殊師利！云何名菩薩摩訶薩行處？若菩薩摩訶薩住忍辱地，柔和善順，而不卒暴，心亦不驚；又復於法無所行，而觀諸法如實相，亦不行，不分別，是名菩

薩摩訶薩行處。

J 2 釋親近處（分三）

K 1 約遠論近（分十）

L 1 遠豪勢 云何名菩薩摩訶薩親近處？菩薩摩訶薩不親近國王、王子、大臣、官長。

L 2 遠邪人邪法 不親近諸外道梵志、尼犍子等，及造世俗文筆讚詠外書，及路伽耶陀、逆路伽耶陀者。

L 3 遠兇險戲 亦不親近諸有兇戲、相扞相撲，及那羅等種種變現之戲。

L 4 遠旃陀羅 又不親近旃陀羅，及畜豬羊雞狗，畋獵漁捕，諸惡律儀。如是人等或時來者，則為說法，無所希望。

L 5 遠二乘眾 又不親近求聲聞比丘、比丘尼、優婆塞、優婆夷，亦不問訊。若於房中，若經行處，若在講堂中，不共住止。或時來者，隨宜說法，無所

希求。

L 6 遠欲想 文殊師利！又菩薩摩訶薩，不應於女人身，取能生欲想相而為說法，亦不樂見。若入他家，不與小女、處女、寡女等共語。

L 7 遠不男 亦復不近五種不男之人，以為親厚。

L 8 遠危害 不獨入他家，若有因緣須獨入時，但一心念佛。

L 9 遠譏嫌 若為女人說法，不露齒笑，不現胸臆，乃至為法，猶不親厚，況復餘事。

L 10 遠畜養 不樂畜年少弟子、沙彌小兒，亦不樂與同師。

K 2 約近論近 常好坐禪，在於閒處，修攝其心。文殊師利，是名初親近處。

K 3 約非遠非近論近 復次，菩薩摩訶薩觀一切法空，如實相，不顛倒，不動、不退、不轉，如虛空，無所有性。一切語言道斷，不生、不出、不起，無名、無相，實無所有，無量、無

邊，無礙、無障，但以因緣有，從顛倒  
生。故說：常樂觀如是法相，是名菩薩摩  
訶薩第二親近處。

## H 2 重頌（分三）

I 1 頌總標行近 爾時，世尊欲重宣此義，而說偈言：

若有菩薩 於後惡世 無佈畏心 欲說是經  
應入行處 及親近處

## I 2 頌別釋行近（分二）

J 1 頌約遠論近 常離國王 及國王子 大臣官長 兇險戲者  
及旃陀羅 外道梵志  
亦不親近 增上慢人 貪著小乘 三藏學者  
破戒比丘 名字羅漢 及比丘尼 好戲笑者  
深著五欲 求現滅度 諸優婆夷 皆勿親近  
若是人等 以好心來 到菩薩所 為聞佛道  
菩薩則以 無所畏心 不懷希望 而為說法

J 1 頌非遠非近

寡女處女 及諸不男 皆勿親近 以為親厚  
亦莫親近 屠兒魁膾 畋獵漁捕 為利殺害  
販肉自活 銜賣女色 如是之人 皆勿親近  
兇險相撲 種種嬉戲 諸婬女等 盡勿親近  
莫獨屏處 為女說法 若說法時 無得戲笑  
入里乞食 將一比丘 若無比丘 一心念佛  
是則名為 行處近處 以此二處 能安樂說  
又復不行 上中下法 有為無為 實不實法  
亦不分別 是男是女 不得諸法 不知不見  
是則名為 菩薩行處 一切諸法 空無所有  
無有常住 亦無起滅 是名智者 所親近處  
顛倒分別 諸法有無 是實非實 是生非生  
在於閒處 修攝其心 安住不動 如須彌山  
觀一切法 皆無所有 猶如虛空 無有堅固  
不生不出 不動不退 常住一相 是名近處

I 3 明行成 若有比丘 於我滅後 入是行處 及親近處

說斯經時 無有怯弱 菩薩有時 入於靜室

以正憶念 隨義觀法 從禪定起 為諸國王

王子臣民 婆羅門等 開化演暢 說斯經典

其心安隱 無有怯弱 文殊師利 是名菩薩

安住初法 能於後世 說法華經

## G 2 口安樂行（分二）

### H 1 長行（分二）

I 1 標章 又文殊師利，如來滅後，於末法中，欲說是經，應住安樂行。

### I 2 釋行法（分二）

J 1 明止行 若口宣說，若讀經時，不樂說人及經典過。亦不輕慢諸餘法師，不說他人好惡長短。於聲聞人，亦不稱名說其過惡，亦不稱名讚歎其美，又亦不生怨嫌之心。

J 2 明觀行 善修如是安樂心故，諸有聽者，不逆其意，有所難問，

不以小乘法答，但以大乘而為解說，令得一切種智。

H 2 重頌（分三）

I 1 頌標 爾時，世尊欲重宣此義，而說偈言：

菩薩常樂 安隱說法 於清淨地 而施床座

以油塗身 澡浴塵穢 著新淨衣 內外俱淨

安處法座 隨問為說

I 2 頌釋（分二）

J 1 頌止行 若有比丘 及比丘尼 諸優婆塞 及優婆夷

國王王子 群臣士民 以微妙義 和顏為說

若有難問 隨義而答 因緣譬喻 敷演分別

以是方便 皆使發心 漸漸增益 入於佛道

除懶惰意 及懈怠想 離諸憂惱 慈心說法

J 2 頌觀行 晝夜常說 無上道教 以諸因緣 無量譬喻

開示眾生 咸令歡喜 衣服臥具 飲食醫藥

而於其中 無所希望 但一心念 說法因緣



願成佛道 令眾亦爾 是則大利 安樂供養

I 3 明行成 我滅度後 若有比丘 能演說斯 妙法華經

心無嫉恚 諸惱障礙 亦無憂愁 及罵詈者

又無怖畏 加刀杖等 亦無擯出 安住忍故

智者如是 善修其心 能住安樂 如我上說

其人功德 千萬億劫 算數譬喻 說不能盡

### G 3 意安樂行 (分二)

#### H 1 長行 (分三)

I 1 釋止行 又文殊師利！菩薩摩訶薩，於後末世，法欲滅時，受持

讀誦斯經典者，無懷嫉妬諂誑之心，亦勿輕罵學佛道者，求其長短。若比丘、比丘尼、優婆塞、優婆夷，求聲聞者、求辟支佛者、求菩薩道者，無得惱之，令其疑悔，語其人言：汝等去道甚遠，終不能得一切種智。所以者何？汝是放逸之人，於道懈怠故。又亦不應戲論諸法，有所諍競。

I 2 釋觀行 當於一切眾生，起大悲想；於諸如來，起慈父想；於諸菩薩，起大師想；於十方諸大菩薩，常應深心恭敬禮拜。於一切眾生，平等說法，以順法故，不多不少，乃至深愛法者，亦不為多說。

I 3 結行成 文殊師利！是菩薩摩訶薩，於後末世，法欲滅時，有成就是第三安樂行者。說是法時，無能惱亂；得好同學，共讀誦是經，亦得大眾而來聽受，聽已能持，持已能誦，誦已能說，說已能書，若使人書，供養經卷，恭敬、尊重、讚歎。

## H 2 重頌（分二）

### I 1 頌釋（分二）

J 1 頌止行 爾時，世尊欲重宣此義，而說偈言：

若欲說是經 當捨嫉恚慢 諂誑邪偽心 常修質直行  
不輕蔑於人 亦不戲論法 不令他疑悔 云汝不得佛  
J 2 頌觀行 是佛子說法 常柔和能忍 慈悲於一切 不生懈怠心

十方大菩薩 愍眾故行道 應生恭敬心 是則我大師  
於諸佛世尊 生無上父想 破於憍慢心 說法無障礙

I 2 頌行成 第三法如是 智者應守護 一心安樂行 無量眾所敬

#### G 4 誓願安樂行（分二）

##### H 1 長行（分二）

##### I 1 明行法（分二）

J 1 釋行法 又文殊師利！菩薩摩訶薩，於後末世，法欲滅時，有持是法華經者，於在家出家人中，生大慈心，於非菩薩人中，生大悲心，應作是念：如是之人，則為大失。如來方便，隨宜說法，不聞、不知、不覺、不問、不信、不解。其人雖不問、不信、不解是經，我得阿耨多羅三藐三菩提時，隨在何地，以神通力、智慧力引之，令得住是法中。

J 2 結行成 文殊師利！是菩薩摩訶薩，於如來滅後，有成就此第四法者，說是法時，無有過失，常為比丘、比丘尼、

優婆塞、優婆夷、國王、王子、大臣、人民、婆羅門、居士等，供養恭敬，尊重讚歎。虛空諸天，為聽法故，亦常隨侍。若在聚落、城邑、空閑林中，有人來欲難問者，諸天晝夜，常為法故，而衛護之，能令聽者皆得歡喜。所以者何？此經是一切過去、未來、現在諸佛，神力所護故。

I 2 歎經法（分二）

J 1 就法略歎 文殊師利！是法華經於無量國中，乃至名字不可得聞，何況得見、受持、讀誦。

J 2 約喻廣歎（分二）

K 1 不與珠喻（分二）

L 1 立喻 文殊師利！譬如強力轉輪聖王，欲以威勢降伏諸國，而諸小王不順其命，時轉輪王起種種兵而往討伐。王見兵眾戰有功者，即大歡喜，隨功賞賜，或與田宅、聚落、城邑，或與衣服、嚴身之具，或與種種

珍寶、金、銀、琉璃、碑磬、瑪瑙、珊瑚、琥珀、象、馬、車乘、奴婢、人民。唯髻中明珠不以與之。所以者何？獨王頂上有此一珠，若以與之，王諸眷屬，必大驚怪。

L<sub>2</sub> 法合 文殊師利！如來亦復如是，以禪定智慧力，得法國王，王於三界，而諸魔王不肯順伏。如來賢聖諸將與之共戰，其有功者，心亦歡喜，於四眾中，為說諸經，令其心悅，賜以禪定、解脫、無漏根力、諸法之財，又復賜與涅槃之城，言得滅度，引導其心，令皆歡喜，而不為說是法華經。

### K<sub>2</sub> 與珠喻（分二）

L<sub>1</sub> 立喻 文殊師利！如轉輪王，見諸兵眾有大功者，心甚歡喜，以此難信之珠，久在髻中，不妄與人，而今與之。

L<sub>2</sub> 法合 如來亦復如是，於三界中，為大法王，以法教化一

切眾生，見賢聖軍與五陰魔、煩惱魔、死魔共戰，有大功勳，滅三毒，出三界，破魔網。爾時，如來亦大歡喜，此法華經，能令眾生至一切智，一切世間多怨難信，先所未說，而今說之。文殊師利！此法華經，是諸如來第一之說，於諸說中，最為甚深；末後賜與，如彼強力之王，久護明珠，今乃與之。文殊師利！此法華經，諸佛如來祕密之藏，於諸經中，最在其上，長夜守護，不妄宣說，始於今日乃與汝等而敷演之。

## H 2 重頌（分二）

I 1 頌行法 爾時，世尊欲重宣此義，而說偈言：

常行忍辱 哀愍一切 乃能演說 佛所讚經  
後末世時 持此經者 於家出家 及非菩薩  
應生慈悲 斯等不聞 不信是經 則為大失  
我得佛道 以諸方便 為說此法 令住其中

I 2 頌歎經（分二）

J 1 總頌兩喻 譬如強力 轉輪之王 兵戰有功 賞賜諸物

象馬車乘 嚴身之具 及諸田宅 聚落城邑

或與衣服 種種珍寶 奴婢財物 歡喜賜與

如有勇健 能為難事 王解髻中 明珠賜之

J 1 總頌兩合 如來亦爾 為諸法王 忍辱大力 智慧寶藏

以大慈悲 如法化世

見一切人 受諸苦惱 欲求解脫 與諸魔戰

為是眾生 說種種法 以大方便 說此諸經

既知眾生 得其力已 末後乃為 說是法華

如王解髻 明珠與之 此經為尊 眾經中上

我常守護 不妄開示 今正是時 為汝等說

F 3 總明行成之相（分三）

G 1 結勸四行 我滅度後 求佛道者 欲得安隱 演說斯經

應當親近 如是四法

G 2 舉三報以勸(分三)

H 1 報障轉轉現報 讀是經者 常無憂惱

H 2 業障轉轉生報 又無病痛 顏色鮮白 不生貧窮 卑賤醜陋

H 3 煩惱障轉轉後報(分二)

I 1 別明三煩惱障轉 眾生樂見 如慕賢聖 天諸童子 以為給使

刀杖不加 毒不能害

若人惡罵 口則閉塞 遊行無畏 如師子王

智慧光明 如日之照

I 2 總明一切煩惱障轉(分四)

J 1 夢入十信相似位 若於夢中 但見妙事 見諸如來 坐師子座

諸比丘眾 圍繞說法

又見龍神 阿修羅等 數如恆沙 恭敬合掌

自見其身 而為說法

J 2 夢入初住見道位 又見諸佛 身相金色 放無量光 照於一切

以梵音聲 演說諸法



佛為四眾 說無上法 見身處中 合掌讚佛

聞法歡喜 而為供養 得陀羅尼 證不退智

佛知其心 深入佛道 即為授記 成最正覺

汝善男子 當於來世 得無量智 佛之大道

國土嚴淨 廣大無比 亦有四眾 合掌聽法

J<sub>3</sub> 夢入住行向地修道位 又見自身 在山林中 修習善法 證諸實相

深入禪定 見十方佛

J<sub>4</sub> 夢入妙覺究竟位

諸佛身金色 百福相莊嚴 聞法為人說 常有是好夢

又夢作國王 捨宮殿眷屬 及上妙五欲 行詣於道場

在菩提樹下 而處師子座 求道過七日 得諸佛之智

成無上道已 起而轉法輪 為四眾說法 經千萬億劫

說無漏妙法 度無量眾生 後當入涅槃 如煙盡燈滅

G<sub>3</sub> 總結 若後惡世中 說是第一法 是人得大利 如上諸功德



妙法蓮華經 卷五

# 從地湧出品第十五



C 2 發本門弟子通經，彌勒騰疑如來開本壽量（分三）

D 1 從地湧出（分三）

E 1 他土菩薩請命 爾時，他方國土諸來菩薩摩訶薩，過八恆河沙數，於大眾中起，合掌作禮，而白佛言：世尊！若聽我等，於佛滅後，在此娑婆世界，勤加精進，護持讀誦、書寫、供養是經典者，當於此土而廣說之。

E 2 如來止他召此 爾時，佛告諸菩薩摩訶薩眾：止！善男子！不須汝等護持此經。所以者何？我娑婆世界，自有六萬恆河沙等菩薩摩訶薩，一一菩薩，各有六萬恆河沙眷屬，是諸人等，能於我滅後，護持讀誦廣說此經。

E 3 他方菩薩湧出（分二）

F 1 經家敘相 佛說是時，娑婆世界三千大千國土，地皆震裂，而於其中，有無量千萬億菩薩摩訶薩同時湧出。是諸菩薩，身皆金色，三十二相，無量光明，先盡在此娑婆世界之下，此界虛空中住。是諸菩薩，聞釋迦牟尼佛所說音聲，從下發來。一一

菩薩，皆是大眾唱導之首，各將六萬恆河沙眷屬，況將五萬、四萬、三萬、二萬、一萬恆河沙等眷屬者；況復乃至一恆河沙、半恆河沙、四分之一，乃至千萬億那由他分之一；況復千萬億那由他眷屬；況復億萬眷屬；況復千萬、百萬，乃至一萬；況復一千、一百，乃至一十；況復將五、四、三、二、一弟子者；況復單己，樂遠離行；如是等比，無量無邊，算數譬喻所不能知。

## F 2 讚歎問訊（分五）

G 1 海眾讚歎 是諸菩薩從地出已，各詣虛空七寶妙塔多寶如來、釋迦牟尼佛所；到已，向二世尊頭面禮足。及至諸寶樹下師子座上佛所，亦皆作禮，右繞三匝，合掌恭敬，以諸菩薩種種讚法而以讚歎，住在一面，欣樂瞻仰於二世尊。是諸菩薩摩訶薩，從初涌出，以諸菩薩種種讚法而讚於佛，如是時間，經五十小劫。是時，釋迦牟尼佛默然而坐，及諸四眾，亦皆默然，五十小劫，佛神力故，令諸大眾謂如半

日。爾時，四眾亦以佛神力故，見諸菩薩，遍滿無量百千萬億國土虛空。

### G<sub>2</sub> 上首問訊

是菩薩眾中，有四導師，一名上行，二名無邊行，三名淨行，四名安立行。是四菩薩，於其眾中，最為上首、唱導之師；在大眾前，各共合掌，觀釋迦牟尼佛，而問訊言：世尊！少病少惱，安樂行不？所應度者，受教易不？不令世尊生疲勞耶？爾時，四大菩薩而說偈言：

世尊安樂 少病少惱 教化眾生 得無疲倦

又諸眾生 受化易不 不令世尊 生疲勞耶

### G<sub>3</sub> 佛答安樂

爾時，世尊於菩薩大眾中，而作是言：如是！如是！諸善男子！如來安樂，少病少惱。諸眾生等，易可化度，無有疲勞。所以者何？是諸眾生，世世已來，常受我化，亦於過去諸佛恭敬尊重，種諸善根。此諸眾生，始見我身，聞我所說，即皆信受，入如來慧。除先修習學小乘者，如是之人，我今亦令得聞是經，入於佛慧。

G 4 偈頌隨喜 爾時，諸大菩薩而說偈言：

善哉善哉 大雄世尊 諸眾生等 易可化度  
能問諸佛 甚深智慧 聞已信行 我等隨喜

G 5 如來述歎 於時，世尊讚歎上首諸大菩薩：善哉！善哉！善哉！善男子！汝等能於如來發隨喜心。

D 2 彌勒疑問（分二）

E 1 此土菩薩疑（分二）

F 1 長行疑念 爾時，彌勒菩薩及八千恆河沙諸菩薩眾，皆作是念：我等從昔已來，不見不聞如是大菩薩摩訶薩眾，從地涌出，住世尊前，合掌供養，問訊如來。

時彌勒菩薩摩訶薩，知八千恆河沙諸菩薩等心之所念，並欲自決所疑，合掌向佛，以偈問曰：

F 2 偈頌正問（分四）

G 1 問來處來緣 無量千萬億 大眾諸菩薩 昔所未曾見 願兩足尊說  
是從何所來 以何因緣集 巨身大神通 智慧叵思議

其志念堅固 有大忍辱力 眾生所樂見 為從何所來  
G<sub>2</sub> 敘眷屬數量 一一諸菩薩 所將諸眷屬 其數無有量 如恆河沙等

或有大菩薩 將六萬恆沙 如是諸大眾 一心求佛道  
是諸大師等 六萬恆河沙 俱來供養佛 及護持是經  
將五萬恆沙 其數過於是 四萬及三萬 二萬至一萬  
一千一百等 乃至一恆沙 半及三四分 億萬分之一  
千萬那由他 萬億諸弟子 乃至於半億 其數復過上  
百萬至一萬 一千及一百 五十與一十 乃至三二一  
單已無眷屬 樂於獨處者 俱來至佛所 其數轉過上  
如是諸大眾 若人行籌數 過於恆沙劫 猶不能盡知  
G<sub>3</sub> 問師法是誰 是諸大威德 精進菩薩眾 誰為其說法 教化而成就  
從誰初發心 稱揚何佛法 受持行誰經 修習何佛道  
G<sub>4</sub> 結請決疑 如是諸菩薩 神通大智力 四方地震裂 皆從中湧出  
世尊我昔來 未曾見是事 願說其所從 國土之名號  
我常遊諸國 未曾見是眾 我於此眾中 乃不識一人



忽然從地出 願說其因緣

今此之大會 無量百千億 是諸菩薩等 皆欲知此事

是諸菩薩眾 本末之因緣 無量德世尊 惟願決眾疑

E<sub>2</sub> 他土菩薩疑

爾時，釋迦牟尼分身諸佛，從無量千萬億他方國土來者，在於八方諸寶樹下，師子座上，結跏趺坐。其佛侍者，各各見是菩薩大眾，於三千大千世界四方，從地湧出，住於虛空，各白其佛言：世尊！此諸無量無邊阿僧祇菩薩大眾，從何所來？

爾時，諸佛各告侍者：諸善男子！且待須臾，有菩薩摩訶薩，名曰彌勒，釋迦牟尼佛之所授記，次後作佛，已問斯事，佛今答之，汝等自當因是得聞。

D<sub>3</sub> 如來詳答（分二）

E<sub>1</sub> 誠聽（分二）

F<sub>1</sub> 長行 爾時，釋迦牟尼佛告彌勒菩薩：善哉！善哉！阿逸多！乃能問佛如是大事。汝等當共一心，被精進鎧，發堅固意，如來今欲顯發

宣示諸佛智慧，諸佛自在神通之力，諸佛師子奮迅之力，諸佛威猛大勢之力。

F 2 重頌 爾時，世尊欲重宣此義，而說偈言：

當精進一心 我欲說此事 勿得有疑悔 佛智叵思議  
汝今出信力 住於忍善中 昔所未聞法 今皆當得聞  
我今安慰汝 勿得懷疑懼 佛無不實語 智慧不可量  
所得第一法 甚深叵分別 如是今當說 汝等一心聽

E 2 正答（分二）

F 1 略開顯動執生疑（分二）

G 1 略開（分二）

H 1 長行（分二）

I 1 答所師 爾時，世尊說此偈已，告彌勒菩薩：我今於此大眾，宣告汝等。阿逸多！是諸大菩薩摩訶薩無量無數阿僧祇，從地湧出，汝等昔所未見者；我於是娑婆世界，得阿耨多羅三藐三菩提已，教化示導是諸菩薩，調伏其心，令

發道意。

I 2 答來處 此諸菩薩，皆於是娑婆世界下，此界虛空中住，於諸經典，讀誦通利，思惟分別，正憶念。阿逸多！是諸善男子等，不樂在眾，多有所說，常樂靜處，勤行精進，未曾休息；亦不依止人天而住。常樂深智，無有障礙，亦常樂於諸佛之法，一心精進，求無上慧。

## H 2 重頌（分二）

### I 1 頌長行（分二）

J 1 頌答所師 爾時，世尊欲重宣此義，而說偈言：

阿逸汝當知 是諸大菩薩 從無數劫來 修習佛智慧  
悉是我所化 令發大道心 此等是我子

J 2 頌答來處 依止是世界 常行頭陀事 志樂於靜處 捨大眾憤鬧  
不樂多所說 如是諸子等 學習我道法 晝夜常精進  
為求佛道故 在娑婆世界 下方空中住 志念力堅固  
常勤求智慧 說種種妙法 其心無所畏

I 2 正略開顯 我於伽耶城 菩提樹下坐 得成最正覺 轉無上法輪  
爾乃教化之 令初發道心 今皆住不退 悉當得成佛  
我今說實語 汝等一心信 我從久遠來 教化是等眾

G 2 疑請 (分二)

H 1 長行 (分二)

I 1 經家敘疑 爾時，彌勒菩薩摩訶薩，及無數諸菩薩等，心生疑惑，  
怪未曾有，而作是念：云何世尊於少時間，教化如是  
無量無邊阿僧祇諸大菩薩，令住阿耨多羅三藐三菩  
提？

I 2 騰疑請答 (分二)

J 1 騰疑 (分三)

K 1 法說 (分二)

L 1 執近疑遠 即白佛言：世尊！如來為太子時，出於釋宮，  
去伽耶城不遠，坐於道場，得成阿耨多羅三藐  
三菩提；從是已來，始過四十餘年。

世尊！云何於此少時大作佛事，以佛勢力，以佛功德，教化如是無量大菩薩眾，當成阿耨多羅三藐三菩提？

L<sub>2</sub> 執遠疑近 世尊！此大菩薩眾，假使有人，於千萬億劫，數不能盡，不得其邊；斯等久遠已來，於無量無邊諸佛所，植諸善根，成就菩薩道，常修梵行。

K<sub>2</sub> 立喻 世尊！如此之事，世所難信。譬如有人，色美髮黑，年二十五，指百歲人，言是我子；其百歲人，亦指年少，言是我父，生育我等，是事難信。

K<sub>3</sub> 法合 佛亦如是！得道已來，其實未久；而此大眾諸菩薩等，已於無量千萬億劫，為佛道故，勤行精進，善入出住無量百千萬億三昧，得大神通，久修梵行，善能次第習諸善法，巧於問答。人中之寶，一切世間甚為稀有。今日世尊方云，得佛道時，初令發心，教化示

導，令向阿耨多羅三藐三菩提。世尊得佛未久，乃能作此大功德事？

J 2 請答 我等雖復信佛隨宜所說，佛所出言，未曾虛妄，佛所知者，皆悉通達；然諸新發意菩薩，於佛滅後，若聞是語，或不信受而起破法罪業因緣。唯然，世尊！願為解說，除我等疑，及未來世諸善男子，聞此事已，亦不生疑。

## H 2 重頌（分二）

### I 1 頌騰疑（分三）

J 1 頌法說 爾時，彌勒菩薩欲重宣此義，而說偈言：

佛昔從釋種 出家近伽耶 坐於菩提樹 爾來尚未久  
此諸佛子等 其數不可量 久已行佛道 住於神通力  
善學菩薩道 不染世間法 如蓮華在水 從地而湧出  
皆起恭敬心 住於世尊前 是事難思議 云何而可信  
佛得道甚近 所成就甚多 願為除眾疑 如實分別說

J 2 頌立喻 譬如少壯人 年始二十五 示人百歲子 髮白而面皺

是等我所生 子亦說是父 父少而子老 舉世所不信

J 3 頌法合 世尊亦如是 得道來甚近 是諸菩薩等 志固無怯弱

從無量劫來 而行菩薩道 巧於難問答 其心無所畏

忍辱心決定 端正有威德 十方佛所讚 善能分別說

不樂在人眾 常好在禪定 為求佛道故 於下空中住

I 2 頌請答 我等從佛聞 於此事無疑 願佛為未來 演說令開解

若有於此經 生疑不信者 即當墮惡道 願今為解說


是無量菩薩 云何於少時 教化令發心 而住不退地





妙法蓮華經 卷五

如來壽量品第十六



F 2 廣開顯斷疑生信 (分二)

G 1 誠信 (分三)

H 1 三誠 爾時，佛告諸菩薩及一切大眾：諸善男子！汝等當信解如來誠諦之語。復告大眾：汝等當信解如來誠諦之語。又復告諸大眾：汝等當信解如來誠諦之語。

H 2 三請 是時菩薩大眾，彌勒為首，合掌白佛言：世尊！惟願說之，我等當信受佛語。如是三白已。

H 3 重請重誠 復言：惟願說之，我等當信受佛語。爾時，世尊知諸菩薩三請不止，而告之言：汝等諦聽。

G 2 正答 (分二)

H 1 長行 (分二)

I 1 正開近顯遠 (分二)

J 1 出執近之情 如來祕密神通之力。一切世間天人及阿修羅，皆謂：今釋迦牟尼佛出釋氏宮，去伽耶城不遠，坐於道場，得阿耨多羅三藐三菩提。

J 2 破近顯遠（分二）

K 1 正明顯遠 然善男子！我實成佛已來，無量無邊百千萬億那由他劫。

K 2 舉喻格量（分三）

L 1 舉喻難問 譬如五百千萬億那由他阿僧祇三千大千世界，假使有人抹為微塵，過於東方五百千萬億那由他阿僧祇國，乃下一塵；如是東行，盡是微塵。諸善男子，於意云何？是諸世界，可得思惟校計，知其數不？

L 2 答其難知 彌勒菩薩等，俱白佛言：世尊！是諸世界，無量無邊，非算數所知，亦非心力所及。一切聲聞、辟支佛，以無漏智，不能思惟知其限數。我等住阿惟越致地，於是事中，亦所不達。世尊！如是諸世界，無量無邊。

L 3 合顯長遠 爾時，佛告大菩薩眾：諸善男子！今當分明宣

語汝等。是諸世界，若著微塵及不著者，盡以為塵，一塵一劫；我成佛已來，復過於此百千萬億那由他阿僧祇劫。

I 2 明三世益物（分二）

J 1 法說（分二）

K 1 正明三世益物（分三）

L 1 明過去益物（分三）

M 1 益物之處 自從是來，我常在此娑婆世界，說法教化；亦於餘處百千萬億那由他阿僧祇國，導利眾生。

M 2 拂跡中疑 諸善男子！於是中間，我說然燈佛等，又復言其入於涅槃，如是皆以方便分別。

M 3 正明益物 諸善男子！若有眾生來至我所，我以佛眼，觀其信等諸根利鈍，隨所應度，處處自說名字不同、年紀大小，亦復現言當入涅槃。又

以種種方便，說微妙法，能令眾生發歡喜心。

L 2 明現在益物（分三）

M 1 明機感與現形 諸善男子！如來見諸眾生，樂於小法，德薄垢重者，為是人說：我少出家，得阿耨多羅三藐三菩提。然我實成佛已來，久遠若斯；但以方便教化眾生，令人佛道，作如是說。

M 2 正明一代所說 諸善男子！如來所演經典，皆為度脫眾生，或說己身，或說他身；或示己身，或示他身；或示己事，或示他事；諸所言說，皆實不虛。

M 3 釋出巧說之由 所以者何？如來如實知見三界之相，無有生死，若退若出，亦無在世及滅度者。非實非虛，非如非異，不如三界見於三界。如斯之事，如來明見，無有錯

謬。以諸眾生有種種性、種種欲、種種行、種種憶想分別故；欲令生諸善根，以若干因緣、譬喻、言辭，種種說法，所作佛事，未曾暫廢。

L<sub>3</sub> 明未來益物（分二）

M<sub>1</sub> 正明非滅唱滅以益未來

如是，我成佛已來，甚大久遠，壽命無量阿僧祇劫，常住不滅。諸善男子！我本行菩薩道，所成壽命，今猶未盡，復倍上數。然今非實滅度，而便唱言：當取滅度，如來以是方便，教化眾生。

M<sub>2</sub> 釋須唱滅意（分二）

N<sub>1</sub> 不滅有損 所以者何？若佛久住於世，薄德之人，不種善根，貧窮下賤，貪著五欲，入於憶想妄見網中。若見如來常在不滅，便起憍恣，而懷厭怠，不能生難遭之想、恭敬之心。

N 2 唱滅有益 是故如來以方便說。比丘當知！諸佛出世，

難可值遇。所以者何？諸薄德人，過無量百千萬億劫，或有見佛或不見者，以此事故，我作是言：諸比丘！如來難可得見！斯眾生等聞如是語，必當生於難遭之想，心懷戀慕，渴仰於佛，便種善根；是故如來雖不實滅，而言滅度。

K 2 總結不虛 又善男子！諸佛如來，法皆如是，為度眾生，皆實不虛。

J 2 喻說（分二）

K 1 立喻（分二）

L 1 良醫治子喻喻上三世益物（分三）

M 1 遠行喻喻過去益物

譬如良醫，智慧聰達，明練方藥，善治眾病。其人多諸子息，若十、二十乃至百數，以有事緣，遠至餘

國。

M<sub>2</sub> 還來喻喻現在益物（分二）

N<sub>1</sub> 喻感應 諸子於後，飲他毒藥，藥發悶亂，宛轉於地。

N<sub>2</sub> 喻施化（分二）

O<sub>1</sub> 喻現形 是時，其父還來歸家，諸子飲毒，或失本心，或不失者，遙見其父，皆大歡喜，拜跪問訊，善安隱歸，我等愚癡，誤服毒藥，願見救療，更賜壽命。

O<sub>2</sub> 喻說法 父見子等苦惱如是，依諸經方，求好藥草，色香美味，皆悉具足，搗篩和合，與子令服。而作是言：此大良藥，色香美味，皆悉具足，汝等可服，速除苦惱，無復眾患。其諸子中，不失心者，見此良藥，色香俱好，即便服之，病盡除愈。

M<sub>3</sub> 復去喻喻未來益物（分四）



N<sub>1</sub> 超喻不滅有損

餘失心者，見其父來，雖亦歡喜問訊，求索治病，然與其藥，而不肯服。所以者何？毒氣深入，失本心故，於此好色香藥，而謂不美。

N<sub>2</sub> 喻方便唱滅

父作是念：此子可愍，為毒所中，心皆顛倒，雖見我喜，求索救療，如是好藥，而不肯服；我今當設方便，令服此藥。即作是言：汝等當知！我今衰老，死時已至，是好良藥，今留在此，汝可取服，勿憂不瘥。作是教已，復至他國，遣使還告，汝父已死。

N<sub>3</sub> 喻唱滅有益

是時諸子聞父背喪，心大憂惱。而作是念：若父在者，慈愍我等，能見救護；今者捨我，遠喪他國，自惟孤露，無復恃怙。常懷悲感，心遂醒悟，乃知

此藥色香美味，即取服之，毒病皆癒。

N 4 追喻本實不滅

其父聞子悉已得瘥，尋便來歸，咸使見之。

L 2 治子實益喻喻上總結不虛

諸善男子！於意云何？頗有人能說此良醫虛妄罪不？不也！世尊！

K 2 法合 佛言：我亦如是！成佛已來，無量無邊百千萬億那由他阿僧祇劫，為眾生故，以方便力，言當滅度，亦無有能如法說我虛妄過者。

H 2 重頌（分二）

I 1 頌正顯遠 爾時，世尊欲重宣此義，而說偈言：

自我得佛來 所經諸劫數 無量百千萬 億載阿僧祇

I 2 頌三世益物（分二）

J 1 頌法說（分二）

K 1 頌正明三世益物（分三）

L<sub>1</sub> 頌過去 常說法教化 無數億眾生 令人於佛道 爾來無量劫  
為度眾生故 方便現涅槃 而實不滅度 常住此說法  
我常住於此 以諸神通力 令顛倒眾生 雖近而不見  
L<sub>2</sub> 頌現在 眾見我滅度 廣供養舍利 咸皆懷戀慕 而生渴仰心  
眾生既信伏 質直意柔軟 一心欲見佛 不自惜身命  
時我及眾僧 俱出靈鷲山 我時語眾生 常在此不滅  
以方便力故 現有滅不滅

L<sub>3</sub> 頌未來（分二）

M<sub>1</sub> 頌方便唱滅兼頌須唱滅意

餘國有眾生 恭敬信樂者 我復於彼中 為說無上法  
汝等不聞此 但謂我滅度 我見諸眾生 沒在於苦惱  
故不為現身 令其生渴仰 因其心戀慕 乃出為說法

M<sub>2</sub> 頌本實不滅兼廣釋不見得見之由

神通力如是 於阿僧祇劫 常在靈鷲山 及餘諸住處  
眾生見劫盡 大火所燒時 我此土安隱 天人常充滿

園林諸堂閣 種種寶莊嚴 寶樹多華果 眾生所遊樂  
諸天擊天鼓 常作眾伎樂 兩曼陀羅華 散佛及大眾  
我淨土不毀 而眾見燒盡 憂怖諸苦惱 如是悉充滿  
是諸罪眾生 以惡業因緣 過阿僧祇劫 不聞三寶名  
諸有修功德 柔和質直者 則皆見我身 在此而說法  
或時為此眾 說佛壽無量 久乃見佛者 為說佛難值

K<sub>2</sub> 頌總結不虛


我智力如是 慧光照無量 壽命無數劫 久修業所得  
汝等有智者 勿於此生疑 當斷令永盡 佛語實不虛

J<sub>2</sub> 頌喻說（分二）

K<sub>1</sub> 頌立喻 如醫善方便 為治狂子故 實在而言死 無能說虛妄  
K<sub>2</sub> 頌法合 我亦為世父 救諸苦患者 為凡夫顛倒 實在而言滅  
以常見我故 而生憍恣心 放逸著五欲 墮於惡道中  
我常知眾生 行道不行道 隨所應可度 為說種種法  
每自作是意 以何令眾生 得人無上慧 速成就佛身

妙法蓮華經 卷五

# 分別功德品第十七



B 4 入佛知見（分別功德至常不輕四品）（分三）

C 1 明證解功德（分二）

D 1 明證入（分二）

E 1 長行（分三）

F 1 經家敘益 爾時，大會聞佛說壽命劫數長遠如是，無量無邊阿僧祇眾生，  
得大饒益。

F 2 如來分別 於時，世尊告彌勒菩薩摩訶薩：

阿逸多！我說是如來壽命長遠時，

六百八十萬億那由他恆河沙眾生，得無生法忍；

復有千倍菩薩摩訶薩，得聞持陀羅尼門；

復有一世界微塵數菩薩摩訶薩，得樂說無礙辯才；

復有一世界微塵數菩薩摩訶薩，得百千萬億無量旋陀羅尼；

復有三千大千世界微塵數菩薩摩訶薩，能轉不退法輪；

復有二千中國土微塵數菩薩摩訶薩，能轉清淨法輪；

復有小千國土微塵數菩薩摩訶薩，八生當得阿耨多羅三藐三菩提；

復有四四天下微塵數菩薩摩訶薩，四生當得阿耨多羅三藐三菩提；  
復有三四天下微塵數菩薩摩訶薩，三生當得阿耨多羅三藐三菩提；  
復有二四天下微塵數菩薩摩訶薩，二生當得阿耨多羅三藐三菩提；  
復有一四天下微塵數菩薩摩訶薩，一生當得阿耨多羅三藐三菩提；  
復有八世界微塵數眾生，皆發阿耨多羅三藐三菩提心。

F<sub>3</sub> 瑞表圓益 佛說是諸菩薩摩訶薩得大法利時，於虛空中，雨曼陀羅華、  
摩訶曼陀羅華，以散無量百千萬億寶樹下，師子座上諸佛，  
並散七寶塔中，師子座上釋迦牟尼佛及久滅度多寶如來，亦  
散一切諸大菩薩及四部眾。又雨細末、栴檀、沉水香等，於  
虛空中，天鼓自鳴，妙聲深遠；又雨千種天衣，垂諸瓔珞，  
真珠瓔珞、摩尼珠瓔珞、如意珠瓔珞，遍於九方，眾寶香  
爐，燒無價香，自然周至，供養大會。一一佛上，有諸菩  
薩，執持旛蓋，次第而上，至於梵天。是諸菩薩，以妙音  
聲，歌無量頌，讚歎諸佛。

E<sub>2</sub> 偈頌（分三）

F<sub>1</sub> 頌時眾得解

爾時，彌勒菩薩從座而起，偏袒右肩，合掌向佛，而說偈言：  
佛說稀有法 昔所未曾聞 世尊有大力 壽命不可量  
無數諸佛子 聞世尊分別 說得法利者 歡喜充遍身

F<sub>2</sub> 頌如來分別

或住不退地 或得陀羅尼 或無礙樂說 萬億旋總持  
或有大千界 微塵數菩薩 各各皆能轉 不退之法輪  
復有中千界 微塵數菩薩 各各皆能轉 清淨之法輪  
復有小千界 微塵數菩薩 餘各八生在 當得成佛道  
復有四三二 如此四天下 微塵諸菩薩 隨數生成佛  
或一四天下 微塵數菩薩 餘有一生在 當成一切智  
如是等眾生 聞佛壽長遠 得無量無漏 清淨之果報  
復有八世界 微塵數眾生 聞佛說壽命 皆發無上心  
F<sub>3</sub> 頌瑞表圓益  
世尊說無量 不可思議法 多有所饒益 如虛空無邊  
雨天曼陀羅 摩訶曼陀羅 釋梵如恆沙 無數佛土來  
雨栴檀沉水 繽紛而亂墜 如鳥飛空下 供散於諸佛  
天鼓虛空中 自然出妙聲 天衣千萬種 旋轉而來下



眾寶妙香爐 燒無價之香 自然悉周遍 供養諸世尊  
其大菩薩眾 執七寶旛蓋 高妙萬億種 次第至梵天  
一一諸佛前 寶幢懸勝旛 亦以千萬偈 歌詠諸如來  
如是種種事 昔所未曾有 聞佛壽無量 一切皆歡喜  
佛名聞十方 廣饒益眾生 一切具善根 以助無上心

D<sub>2</sub> 明解入（分二）

E<sub>1</sub> 明現在四信（分四）

F<sub>1</sub> 一念信解（分二）

G<sub>1</sub> 長行（分三）

H<sub>1</sub> 出相貌 爾時，佛告彌勒菩薩摩訶薩：阿逸多！其有眾生，聞佛壽命長遠如是，乃至能生一念信解，所得功德，無有限量。

H<sub>2</sub> 明功德 若有善男子、善女人，為阿耨多羅三藐三菩提故，於八十萬億那由他劫，行五波羅蜜：檀波羅蜜、尸羅波羅蜜、羼提波羅蜜、毘梨耶波羅蜜、禪波羅蜜，除般若波羅蜜，以是功德比前功德，百分、千分、百千萬億分不及其一，乃

至算數譬喻所不能知。

H<sub>3</sub> 明行位不退 若善男子、善女人，有如是功德，於阿耨多羅三藐三菩提退者，無有是處。

G<sub>2</sub> 重頌（分三）

H<sub>1</sub> 頌格量功德 爾時，世尊欲重宣此義，而說偈言：

若人求佛慧 於八十萬億 那由他劫數 行五波羅蜜  
於是諸劫中 布施供養佛 及緣覺弟子 並諸菩薩眾  
珍異之飲食 上服與臥具 栴檀立精舍 以園林莊嚴  
如是等布施 種種皆微妙 盡此諸劫數 以迴向佛道  
若復持禁戒 清淨無缺漏 求於無上道 諸佛之所歎  
若復行忍辱 住於調柔地 設眾惡來加 其心不傾動  
諸有得法者 懷於增上慢 為斯所輕惱 如是亦能忍  
若復勤精進 志念常堅固 於無量億劫 一心不懈息  
又於無數劫 住於空閑處 若坐若經行 除睡常攝心  
以是因緣故 能生諸禪定 八十億萬劫 安住心不亂

持此一心福 願求無上道 我得一切智 盡諸禪定際  
是人於百千 萬億劫數中 行此諸功德 如上之所說  
有善男女等 聞我說壽命 乃至一念信 其福過於彼  
若人悉無有 一切諸疑悔 深心須臾信 其福為如此  
H<sub>2</sub> 頌位行不退 其有諸菩薩 無量劫行道 聞我說壽命 是則能信受  
如是諸人等 頂受此經典 願我於未來 長壽度眾生  
如今日世尊 諸釋中之王 道場師子吼 說法無所畏  
我等未來世 一切所尊敬 坐於道場時 說壽亦如是

H<sub>3</sub> 頌深心信解 若有深心者 清淨而質直 多聞能總持 隨義解佛語  
如是之人等 於此無有疑

F<sub>2</sub> 略解言趣 又阿逸多！若有聞佛壽命長遠，解其言趣，是人所得功德，無有限量，能起如來無上之慧。

F<sub>3</sub> 聞持供養 何況廣聞是經，若教人聞，若自持，若教人持，若自書，若教人書，若以華、香、瓔珞、幢幡、繒蓋、香油、酥燈，供養經卷，是人功德，無量無邊，能生一切種智。

F 4 深信觀成 阿逸多！若善男子、善女人，聞我說壽命長遠，深信信解，則為見佛常在耆闍崛山，共大菩薩，諸聲聞眾，圍繞說法。又見此娑婆世界，其地琉璃，坦然平正，閻浮檀金，以界八道，寶樹行列，諸臺樓觀，皆悉寶成，其菩薩眾，咸處其中。若有能如是觀者，當知是為深信解相。

E 2 明滅後五品（分二）

F 1 列五品粗格量後四品功德（分二）

G 1 長行（分四）

H 1 起隨喜受持 又復如來滅後，若聞是經而不毀訾，起隨喜心，當知已為深信解相；何況讀誦受持之者，斯人則為頂戴如來。阿逸多！是善男子、善女人，不須為我復起塔寺，及作僧坊，以四事供養眾僧。所以者何？是善男子、善女人，受持讀誦是經典者，為已起塔，造立僧坊，供養眾僧。則為以佛舍利起七寶塔，高廣漸小至於梵天，懸諸幡蓋及眾寶鈴，華、香、瓔珞、末香、

塗香、燒香、眾鼓伎樂、簫笛、箜篌，種種舞戲，以妙音聲，歌唄讚頌，則為於無量千萬億劫，作是供養已。

H<sub>2</sub> 加教人受持 阿逸多！若我滅後，聞是經典，有能受持，若自書，若教人書，則為起立僧坊，以赤梅檀作諸殿堂三十有二，高八多羅樹，高廣嚴好，百千比丘於其中止。園林浴池，經行禪窟，衣服、飲食、床褥、湯藥，一切樂具，充滿其中。如是僧坊堂閣若干百千萬億，其數無量，以此現前，供養於我及比丘僧。是故我說，如來滅後，若有受持讀誦，為他人說，若自書，若教人書，供養經卷，不須復起塔寺，及造僧坊，供養眾僧。

H<sub>3</sub> 加兼行六度 況復有人，能持是經，兼行布施、持戒、忍辱、精進、一心、智慧，其德最勝，無量無邊。譬如虛空，東西南北、四維上下，無量無邊；是人功德，亦復如是無

量無邊，疾至一切種智。

H 4 加正行六度 若人讀誦受持是經，為他人說，若自書，若教人書，復能起塔及造僧坊，供養讚歎聲聞眾僧，亦以百千萬億讚歎之法，讚歎菩薩功德，又為他人種種因緣，隨義解說此法華經；復能清淨持戒，與柔和者而共同止，忍辱無瞋，志念堅固，常貴坐禪，得諸深定，精進勇猛，攝諸善法，利根智慧，善答問難。

阿逸多！若我滅後，諸善男子、善女人，受持讀誦是經典者，復有如是諸善功德，當知是人，已趣道場，近阿耨多羅三藐三菩提，坐道樹下。

阿逸多！是善男子、善女人，若坐、若立、若行處，此中便應起塔，一切天人皆應供養，如佛之塔。

G 2 重頌（分四）

H 1 頌第二品 爾時，世尊欲重宣此義，而說偈言：

若我滅度後 能奉持此經 斯人福無量 如上之所說

是則為具足 一切諸供養 以舍利起塔 七寶而莊嚴  
表剎甚高廣 漸小至梵天 寶鈴千萬億 風動出妙音  
又於無量劫 而供養此塔 華香諸瓔珞 天衣眾伎樂  
燃香油蘇燈 周匝常照明 惡世法末時 能持是經者  
則為已如上 具足諸供養

## H<sub>2</sub> 頌第三品

若能持此經 則如佛現在 以牛頭梅檀 起僧坊供養  
堂有三十二 高八多羅樹 上饌妙衣服 床臥皆具足  
百千眾住處 園林諸浴池 經行及禪窟 種種皆嚴好  
若有信解心 受持讀誦書 若復教人書 及供養經卷

## H<sub>3</sub> 頌第四品

散華香末香 以須曼薝蔔 阿提目多伽 薰油常燃之  
如是供養者 得無量功德 如虛空無邊 其福亦如是  
H<sub>4</sub> 頌第五品 兼布施持戒 忍辱樂禪定 不瞋不惡口

## H<sub>4</sub> 頌第五品


恭敬於塔廟 謙下諸比丘 遠離自高心 常思惟智慧  
有問難不瞋 隨順為解說 若能行是行 功德不可量  
若見此法師 成就如是德 應以天華散 天衣覆其身

頭面接足禮 生心如佛想 又應作是念 不久詣道場  
得無漏無為 廣利諸人天 其所住止處 經行若坐臥  
乃至說一偈 是中應起塔 莊嚴令妙好 種種以供養  
佛子住此地 則是佛受用 常在於其中 經行及坐臥



妙法蓮華經 卷六

隨喜功德品第十八



F 2 廣格量初品功德 (分二)

G 1 彌勒請問 爾時，彌勒菩薩摩訶薩白佛言：世尊！若有善男子、善女

人，聞是法華經隨喜者，得幾所福？而說偈言：

世尊滅度後 其有聞是經 若能隨喜者 為得幾所福

G 2 如來垂答 (分二)

H 1 長行 (分二)

I 1 明隨喜能說功德 (分四)

J 1 展轉相教 爾時，佛告彌勒菩薩摩訶薩：阿逸多！如來滅後，

若比丘、比丘尼、優婆塞、優婆夷，及餘智者，若長若幼，聞是經隨喜已，從法會出，至於餘處，若在僧坊，若空閑地，若城邑、巷陌、聚落、田里，如其所聞，為父母、宗親、善友、知識，隨力演說。是諸人等，聞已隨喜，復行轉教，餘人聞已，亦隨喜轉教；如是展轉，至第五十。

J 2 舉格量本 阿逸多！其第五十善男子、善女人，隨喜功德，我

J 3 問答顯勝

今說之，汝當善聽！若四百萬億阿僧祇世界，六趣四生眾生，卵生、胎生、濕生、化生，若有形、無形、有想、無想、非有想、非無想，無足、二足、四足、多足，如是等在眾生數者，有人求福，隨其所欲娛樂之具，皆給與之。一一眾生，與滿閻浮提金、銀、琉璃、硨磲、瑪瑙、珊瑚、琥珀，諸妙珍寶，及象、馬、車乘，七寶所成宮殿、樓閣等。是大施主，如是布施，滿八十年已，而作是念：我已施眾生娛樂之具，隨意所欲；然此眾生皆已衰老，年過八十，髮白面皺，將死不久，我當以佛法而訓導之。即集此眾生，宣布法化，示教利喜，一時皆得須陀洹道、斯陀含道、阿那含道、阿羅漢道，盡諸有漏，於深禪定皆得自在，具八解脫。

於汝意云何？是大施主所得功德，寧為多不？彌勒白佛言：世尊！是人功德甚多，無量無邊；若是施

主，但施眾生一切樂具，功德無量，何況令得阿羅漢果。

J 4 正為格量 佛告彌勒：我今分明語汝。是人以一切樂具，施於四百萬億阿僧祇世界六趣眾生，又令得阿羅漢果，所得功德，不如是第五十人聞法華經一偈隨喜功德，百分、千分、百千萬億分不及其一，乃至算數譬喻所不能知。

阿逸多！如是第五十人，展轉聞法華經隨喜功德，尚無量無邊阿僧祇，何況最初於會中聞而隨喜者，其福復勝無量無邊阿僧祇，不可得比。

#### I 2 明聽法勸人功德（分四）

J 1 自往聽經 又阿逸多！若人為是經故，往詣僧坊，若坐若立，須臾聽受；緣是功德，轉身所生，得好上妙象、馬、車乘，珍寶輦輿，及乘天宮。

J 2 分座與人 若復有人於講法處坐，更有人來，勸令坐聽，若分

座令坐；是人功德，轉身得帝釋坐處，若梵王坐處，若轉輪聖王所坐之處。

### J 3 勸往聽經

阿逸多！若復有人，語餘人言，有經名法華，可共往聽；即受其教，乃至須臾間聞。是人功德，轉身得與陀羅尼菩薩共生一處，利根智慧。百千萬世，終不瘖啞；口氣不臭，舌常無病，口亦無病，齒不垢黑，不黃不疏，亦不缺落，不差不曲；唇不下垂，亦不褰縮、不羸澀、不瘡疹，亦不缺壞，亦不崙斜，不厚不大，亦不黧黑，無諸可惡。鼻不匾匱，亦不曲戾，面色不黑，亦不狹長，亦不窳曲，無有一切不可喜相。唇舌牙齒，悉皆嚴好，鼻修高直，面貌圓滿，眉高而長，額廣平正，人相具足，世世所生，見佛聞法，信受教誨。

### J 4 具聽修行

阿逸多！汝且觀是勸於一人令往聽法，功德如此，何況一心聽說讀誦，而於大眾為人分別如說修行。

H 2 重頌（分二）

I 1 頌隨喜能說功德 爾時，世尊欲重宣此義，而說偈言：

若人於法會 得聞是經典 乃至於一偈 隨喜為他說  
如是展轉教 至於第五十 最後人獲福 今當分別之  
如有大施主 供給無量眾 具滿八十歲 隨意之所欲  
見彼衰老相 髮白而面皺 齒疏形枯竭 念其死不久  
我今應當教 令得於道果 即為方便說 涅槃真實法  
世皆不牢固 如水沫泡燄 汝等咸應當 疾生厭離心  
諸人聞是法 皆得阿羅漢 具足六神通 三明八解脫  
最後第五十 聞一偈隨喜 是人福勝彼 不可為譬喻  
如是展轉聞 其福尚無量 何況於法會 初聞隨喜者

I 2 頌聽法勸人功德

若有勸一人 將引聽法華 言此經深妙 千萬劫難遇  
即受教往聽 乃至須臾聞 斯人之福報 今當分別說  
世世無口患 齒不疏黃黑 唇不厚褰缺 無有可惡相


舌不乾黑短 鼻高修且直 額廣而平正 面目悉端嚴  
為人所喜見 口氣無臭穢 優鉢華之香 常從其口出  
若故詣僧坊 欲聽法華經 須臾聞歡喜 今當說其福  
後生天人中 得妙象馬車 珍寶之輦輿 及乘天宮殿  
若於講法處 勸人坐聽經 是福因緣得 釋梵轉輪座  
何況一心聽 解說其義趣 如說而修行 其福不可量





妙法蓮華經 卷六

# 法師功德品第十九



C 2 明持經根淨（分二）

D 1 總列六根清淨 爾時，佛告常精進菩薩摩訶薩，若善男子、善女人，受持是法華經，若讀，若誦，若解說，若書寫，是人當得八百眼功德、千二百耳功德、八百鼻功德、千二百舌功德、八百身功德、千二百意功德，以是功德，莊嚴六根，皆令清淨。

D 2 別作六章解釋（分六）

E 1 眼根功德（分二）

F 1 長行 是善男子、善女人，父母所生清淨肉眼，見於三千大千世界，內外所有山林河海，下至阿鼻地獄，上至有頂，亦見其中一切眾生，及業因緣果報生處，悉見悉知。

F 2 重頌 爾時，世尊欲重宣此義，而說偈言：

若於大眾中 以無所畏心 說是法華經 汝聽其功德  
是人得八百 功德殊勝眼 以是莊嚴故 其目甚清淨  
父母所生眼 悉見三千界 內外彌樓山 須彌及鐵圍  
並諸餘山林 大海江河水 下至阿鼻獄 上至有頂處

其中諸眾生一切皆悉見 雖未得天眼 肉眼力如是

## E 2 耳根功德（分二）

F 1 長行 復次常精進！若善男子、善女人，受持此經，若讀，若誦，若解說，若書寫，得千二百耳功德。以是清淨耳，聞三千大千世界，下至阿鼻地獄，上至有頂，其中內外種種語言音聲。象聲、馬聲、牛聲，車聲，啼哭聲、愁歎聲，螺聲、鼓聲、鐘聲、鈴聲，笑聲、語聲，男聲、女聲、童子聲、童女聲，法聲、非法聲，苦聲、樂聲，凡夫聲、聖人聲，喜聲、不喜聲，天聲、龍聲、夜叉聲、乾闥婆聲、阿修羅聲、迦樓羅聲、緊那羅聲、摩睺羅伽聲，火聲、水聲、風聲，地獄聲、畜生聲、餓鬼聲，比丘聲、比丘尼聲、聲聞聲、辟支佛聲、菩薩聲、佛聲。以要言之，三千大千世界，一切內外所有諸聲，雖未得天耳，以父母所生清淨常耳，皆悉聞知，如是分別種種音聲，而不壞耳根。

F 2 重頌 爾時，世尊欲重宣此義，而說偈言：

父母所生耳 清淨無濁穢 以此常耳聞 三千世界聲

象馬車牛聲 鐘鈴螺鼓聲 琴瑟箏篴聲 簫笛之音聲  
清淨好歌聲 聽之而不著 無數種人聲 聞悉能解了  
又聞諸天聲 微妙之歌音 及聞男女聲 童子童女聲  
山川險谷中 迦陵頻伽聲 命命等諸鳥 悉聞其音聲  
地獄眾苦痛 種種楚毒聲 餓鬼飢渴逼 求索飲食聲  
諸阿修羅等 居在大海邊 自共言語時 出於大音聲  
如是說法者 安住於此間 遙聞是眾聲 而不壞耳根  
十方世界中 禽獸鳴相呼 其說法之人 於此悉聞之  
其諸梵天上 光音及遍淨 乃至有頂天 言語之音聲  
法師住於此 悉皆得聞之 一切比丘眾 及諸比丘尼  
若讀誦經典 若為他人說 法師住於此 悉皆得聞之  
復有諸菩薩 讀誦於經法 若為他人說 撰集解其義  
如是諸音聲 悉皆得聞之 諸佛大聖尊 教化眾生者  
於諸大會中 演說微妙法 持此法華者 悉皆得聞之  
三千大千界 內外諸音聲 下至阿鼻獄 上至有頂天

皆聞其音聲 而不壞耳根 其耳聰利故 悉能分別知  
持是法華者 雖未得天耳 但用所生耳 功德已如是

### E 3 鼻根功德（分二）

F 1 長行 復次常精進！若善男子、善女人，受持是經，若讀，若誦，若解說，若書寫，成就八百鼻功德。以是清淨鼻根，聞於三千大千世界上下內外種種諸香，須曼那華香、闍提華香、末利華香、薈蔔華香、波羅羅華香、赤蓮華香、青蓮華香、白蓮華香、華樹香、果樹香、栴檀香、沉水香、多摩羅跋香、多伽羅香，及千萬種和香，若末、若丸、若塗香，持是經者，於此間住，悉能分別。又復別知眾生之香，象香、馬香、牛羊等香，男香、女香、童子香、童女香，及草木叢林香，若近若遠，所有諸香，悉皆得聞，分別不錯。持是經者，雖住於此，亦聞天上諸天之香，波利質多羅、拘鞞陀羅樹香，及曼陀羅華香、摩訶曼陀羅華香、曼殊沙華香、摩訶曼殊沙華香、栴檀、沉水，種種末香，諸雜華香，如是等天香和合所出之香，無不聞知。又聞諸天身香，釋提桓因在勝

殿上，五欲娛樂嬉戲時香，若在妙法堂上，為忉利諸天說法時香，若於諸園遊戲時香，及餘天等男女身香，皆悉遙聞。如是展轉，乃至梵世，上至有頂，諸天身香，亦皆聞之。並聞諸天所燒之香，及聲聞香、辟支佛香、菩薩香、諸佛身香，亦皆遙聞，知其所在。雖聞此香，然於鼻根不壞不錯。若欲分別為他人說，憶念不謬。

F2 重頌 爾時，世尊欲重宣此義，而說偈言：

是人鼻清淨 於此世界中 若香若臭物 種種悉聞知  
須曼那闍提 多摩羅栴檀 沉水及桂香 種種華果香  
及諸眾生香 男子女人香 說法者遠住 聞香知所在  
大勢轉輪王 小轉輪及子 群臣諸宮人 聞香知所在  
身所著珍寶 及地中寶藏 轉輪王寶女 聞香知所在  
諸人嚴身具 衣服及瓔珞 種種所塗香 聞香知其身  
諸天若行坐 遊戲及神變 持是法華者 聞香悉能知  
諸樹華果實 及酥油香氣 持經者住此 悉知其所在

諸山深險處 梅檀樹華敷 眾生在中者 聞香悉能知  
鐵圍山大海 地中諸眾生 持經者聞香 悉知其所在  
阿修羅男女 及其諸眷屬 鬪諍遊戲時 聞香皆能知  
曠野險隘處 獅子象虎狼 野牛水牛等 聞香知所在  
若有懷妊者 未辨其男女 無根及非人 聞香悉能知  
以聞香力故 知其初懷妊 成就不成就 安樂產福子  
以聞香力故 知男女所念 染欲癡恚心 亦知修善者  
地中眾伏藏 金銀諸珍寶 銅器之所盛 聞香悉能知  
種種諸瓔珞 無能識其價 聞香知貴賤 出處及所在  
天上諸華等 曼陀曼殊沙 波利質多樹 聞香悉能知  
天上諸宮殿 上中下差別 眾寶華莊嚴 聞香悉能知  
天園林勝殿 諸觀妙法堂 在中而娛樂 聞香悉能知  
諸天若聽法 或受五欲時 來往行坐臥 聞香悉能知  
天女所著衣 好華香莊嚴 周旋遊戲時 聞香悉能知  
如是展轉上 乃至於梵世 入禪出禪者 聞香悉能知

光音遍淨天 乃至於有頂 初生及退沒 聞香悉能知  
諸比丘眾等 於法常精進 若坐若經行 及讀誦經典  
或在林樹下 專精而坐禪 持經者聞香 悉知其所在  
菩薩志堅固 坐禪若讀誦 或為人說法 聞香悉能知  
在在方世尊 一切所恭敬 愍眾而說法 聞香悉能知  
眾生在佛前 聞經皆歡喜 如法而修行 聞香悉能知  
雖未得菩薩 無漏法生鼻 而是持經者 先得此鼻相

#### E 4 舌根功德（分二）

F 1 長行 復次常精進！若善男子、善女人，受持是經，若讀，若誦，若解說，若書寫，得千二百舌功德。若好若醜，若美不美，及諸苦澀物，在其舌根，皆變成上味，如天甘露，無不美者。若以舌根，於大眾中，有所演說，出深妙聲，能入其心，皆令歡喜快樂。又諸天子、天女、釋梵諸天，聞是深妙音聲，有所演說，言論次第，皆悉來聽。及諸龍、龍女，夜叉、夜叉女，乾闥婆、乾闥婆女，阿修羅、阿修羅女，迦樓羅、迦樓羅女，緊那羅、緊那羅



女，摩睺羅伽、摩睺羅伽女，為聽法故，皆來親近，恭敬供養。及比丘、比丘尼、優婆塞、優婆夷，國王、王子、群臣眷屬，小轉輪王、大轉輪王、七寶千子、內外眷屬，乘其宮殿，俱來聽法，以是菩薩善說法故。婆羅門、居士、國內人民，盡其形壽，隨侍供養。又諸聲聞、辟支佛、菩薩、諸佛，常樂見之。是人在方面，諸佛皆向其處說法，悉能受持一切佛法，又能出於深妙法音。

F2 重頌 爾時，世尊欲重宣此義，而說偈言：

是人舌根淨 終不受惡味 其有所食噉 悉皆成甘露  
以深淨妙聲 於大眾說法 以諸因緣喻 引導眾生心  
聞者皆歡喜 設諸上供養  
諸天龍夜叉 及阿修羅等 皆以恭敬心 而共來聽法  
是說法之人 若欲以妙音 遍滿三千界 隨意即能至  
大小轉輪王 及千子眷屬 合掌恭敬心 常來聽受法  
諸天龍夜叉 羅剎毗舍闍 亦以歡喜心 常樂來供養

梵天王魔王 自在大自在 如是諸天眾 常來至其所  
諸佛及弟子 聞其說法音 常念而守護 或時為現身

E 5 身根功德（分二）

F 1 長行 復次常精進！若善男子、善女人，受持是經，若讀，若誦，若解說，若書寫，得八百身功德。得清淨身，如淨琉璃，眾生喜見。其身淨故，三千大千世界眾生，生時死時，上下好醜，生善處惡處，悉於中現。及鐵圍山、大鐵圍山、彌樓山、摩訶彌樓山等諸山，及其中眾生，悉於中現。下至阿鼻地獄，上至有頂，所有及眾生，悉於中現。若聲聞、辟支佛、菩薩、諸佛說法，皆於身中，現其色像。

F 2 重頌 爾時，世尊欲重宣此義，而說偈言：

若持法華者 其身甚清淨 如彼淨琉璃 眾生皆喜見  
又如淨明鏡 悉見諸色像 菩薩於淨身 皆見世所有  
唯獨自明了 餘人所不見  
三千世界中 一切諸群萌 天人阿修羅 地獄鬼畜生

如是諸色像 皆於身中現

諸天等宮殿 乃至於有頂 鐵圍及彌樓 摩訶彌樓山

諸大海水等 皆於身中現

諸佛及聲聞 佛子菩薩等 若獨若在眾 說法悉皆現

雖未得無漏 法性之妙身 以清淨常體 一切於中現

### E 6 意根功德（分二）

F 1 長行 復次常精進！若善男子、善女人，如來滅後，受持是經，若讀，


若誦，若解說，若書寫，得千二百意功德。以是清淨意根，乃至聞一偈一句，通達無量無邊之義。解是義已，能演說一句一偈，至於一月、四月，乃至一歲，諸所說法，隨其義趣，皆與實相不相違背。若說俗間經書、治世語言、資生業等，皆順正法。三千大千世界六趣眾生，心之所行，心所動作，心所戲論，皆悉知之，雖未得無漏智慧，而其意根清淨如此。是人有所思惟，籌量言說，皆是佛法，無不真實，亦是先佛經中所說。

F 2 重頌 爾時，世尊欲重宣此義，而說偈言：

是人意清淨 明利無濁穢 以此妙意根 知上中下法  
乃至聞一偈 通達無量義 次第如法說 月四月至歲  
是世界內外 一切諸眾生 若天龍及人 夜叉鬼神等  
其在六趣中 所念若干種 持法華之報 一時皆悉知  
十方無數佛 百福莊嚴相 為眾生說法 悉聞能受持  
思惟無量義 說法亦無量 終始不妄錯 以持法華故  
悉知諸法相 隨義識次第 達名字語言 如所知演說  
此人有所說 皆是先佛法 以演此法故 於眾無所畏  
持法華經者 意根淨若斯 雖未得無漏 先有如是相  
是人持此經 安住稀有地 為一切眾生 歡喜而愛敬  
能以千萬種 善巧之語言 分別而說法 持法華經故

妙法蓮華經 卷六

常不輕菩薩品第二十



C 3 顯能證之人（分二）

D 1 長行（分三）

E 1 雙舉前品所說罪福 爾時，佛告得大勢菩薩摩訶薩：汝今當知！若比丘、比丘尼、優婆塞、優婆夷，持法華經者，若有惡口罵詈誹謗，獲大罪報，如前所說。其所得功德，如向所說，眼耳鼻舌身意清淨。

E 2 雙開今品往昔信毀（分二）

F 1 明事本（分二）

G 1 明最初一佛 得大勢！乃往古昔，過無量無邊不可思議阿僧祇劫，有佛名威音王如來、應供、正遍知、明行足、善逝、世間解、無上士、調御丈夫、天人師、佛、世尊，劫名離衰，國名大成。其威音王佛，於彼世中，為天、人、阿修羅說法。為求聲聞者，說應四諦法，度生老病死，究竟涅槃；為求辟支佛者，說應十二因緣法；為諸菩薩，因阿耨多羅三藐三菩提，說應六波羅蜜法，究竟佛慧。

得大勢！是威音王佛，壽四十萬億那由他恆河沙劫，正法住世劫數，如一閻浮提微塵，像法住世劫數，如四天下微塵，其佛饒益眾生已，然後滅度。

G<sub>2</sub> 明次第二萬億佛 正法像法滅盡之後，於此國土，復有佛出，亦號威音王如來、應供、正遍知、明行足、善逝、世間解、無上士、調御丈夫、天人師、佛、世尊，如是次第有二萬億佛，皆同一號。

#### F<sub>2</sub> 明本事（分二）

G<sub>1</sub> 初標時節人名 最初威音王如來，既已滅度，正法滅後，於像法中，增上慢比丘有大勢力。爾時，有一菩薩比丘，名常不輕。

#### G<sub>2</sub> 徵釋不輕之名（分二）

H<sub>1</sub> 先明不輕之行 得大勢！以何因緣，名常不輕？是比丘凡有所見，若比丘、比丘尼、優婆塞、優婆夷，皆悉禮拜讚歎，而作是言：我深敬汝等，不敢輕慢；所以者

何？汝等皆行菩薩道，當得作佛。而是比丘不專讀誦經典，但行禮拜，乃至遠見四眾，亦復故往禮拜讚歎，而作是言：我不敢輕於汝等，汝等皆當作佛。

H<sub>2</sub> 次明得名所以 四眾之中，有生瞋恚，心不淨者，惡口罵詈言：是無智比丘，從何所來？自言我不輕汝，而與我等授記，當得作佛；我等不用如是虛妄授記。

如此經歷多年，常被罵詈，不生瞋恚，常作是言：汝當作佛。說是語時，眾人或以杖木瓦石而打擲之，避走遠住，猶高聲唱言：我不敢輕於汝等，汝等皆當作佛。以其常作是語故，增上慢比丘、比丘尼、優婆塞、優婆夷，號之為常不輕。

E<sub>3</sub> 雙明信毀果報 (分二)

F<sub>1</sub> 明信者果報 (分二)

G<sub>1</sub> 正明果報 (分三)



H<sub>1</sub> 明現報 是比丘臨欲終時，於虛空中，具聞威音王佛，先所說法華經二十千萬億偈，悉能受持，即得如上眼根清淨，耳鼻舌身意根清淨。得是六根清淨已，更增壽命二百萬億那由他歲，廣為人說是法華經。

於時增上慢四眾，比丘、比丘尼、優婆塞、優婆夷，輕賤是人為作不輕名者，見其得大神通力、樂說辯力、大善寂力，聞其所說，皆信伏隨從。

H<sub>2</sub> 明生報 是菩薩復化千萬億眾，令住阿耨多羅三藐三菩提。命終之後，得值二千億佛，皆號日月燈明，於其法中，說是法華經。

H<sub>3</sub> 明後報 以是因緣，復值二千億佛，同號雲自在燈王，於此諸佛法中，受持讀誦，為諸四眾說此經典故，得是常眼清淨，耳鼻舌身意諸根清淨，於四眾中說法，心無所畏。

得大勢！是常不輕菩薩摩訶薩，供養如是若干諸佛，恭敬尊重讚歎，種諸善根；於後復值千萬億佛，亦於諸佛法

中，說是經典，功德成就，當得作佛。

G 2 結會古今 得大勢！於意云何？爾時常不輕菩薩，豈異人乎？則我身是！若我於宿世，不受持讀誦此經，為他人說者，不能疾得阿耨多羅三藐三菩提。我於先佛所，受持讀誦此經，為人說故，疾得阿耨多羅三藐三菩提。

F 2 明毀者果報（分二）

G 1 正明果報 得大勢！彼時四眾，比丘、比丘尼、優婆塞、優婆夷，以瞋恚意，輕賤我故，二百億劫常不值佛、不聞法、不見僧，千劫於阿鼻地獄受大苦惱。畢是罪已，復遇常不輕菩薩，教化阿耨多羅三藐三菩提。

G 2 結會古今（分二）

H 1 結會 得大勢，於汝意云何？爾時四眾常輕是菩薩者，豈異人乎？今此會中，跋陀婆羅等五百菩薩，師子月等五百比丘，尼思佛等五百優婆塞，皆於阿耨多羅三藐三菩提不退轉者是。

H 2 勸持 得大勢！當知是法華經，大饒益諸菩薩摩訶薩，能令至於阿

耨多羅三藐三菩提。是故諸菩薩摩訶薩，於如來滅後，常應受持、讀誦、解說、書寫是經。

D 2 重頌（分二）

E 1 頌雙開今品信毀（分三）

F 1 頌事本 爾時，世尊欲重宣此義，而說偈言：

過去有佛 號威音王 神智無量 將導一切

天人龍神 所共供養

F 2 頌時節人名 是佛滅後 法欲盡時 有一菩薩 名常不輕

時諸四眾 計著於法

F 3 頌不輕之行 不輕菩薩 往到其所 而語之言

我不輕汝 汝等行道 皆當作佛

諸人聞已 輕毀罵詈 不輕菩薩 能忍受之

E 2 頌雙明信毀果報（分三）

F 1 頌信毀果報 其罪畢已 臨命終時 得聞此經 六根清淨

神通力故 增益壽命 復為諸人 廣說是經

諸著法眾 皆蒙菩薩 教化成就 今住佛道  
不輕命終 值無數佛 說是經故 得無量福  
漸具功德 疾成佛道

F<sub>2</sub> 頌結會古今

彼時不輕 則我身是 時四部眾 著法之者  
聞不輕言 汝當作佛 以是因緣 值無數佛  
此會菩薩 五百之眾 並及四部 清信士女  
今於我前 聽法者是

F<sub>3</sub> 舉益勸持

我於前世 勸是諸人 聽受斯經 第一之法  
開示教人 令住涅槃 世世受持 如是經典  
億億萬劫 至不可議 時乃得聞 是法華經  
億億萬劫 至不可議 諸佛世尊 時說是經  
是故行者 於佛滅後 聞如是經 勿生疑惑  
應當一心 廣說此經 世世值佛 疾成佛道

妙法蓮華經 卷六

如來神力品第二十一



A 3 流通分·流通跡本二門(分三)

B 1 明付囑流通(分二)

C 1 神力品明菩薩受命弘經(分二)

D 1 長行(分三)

E 1 菩薩受命 爾時，千世界微塵等菩薩摩訶薩從地湧出者，皆於佛前，一心合掌，瞻仰尊顏，而白佛言：世尊！我等於佛滅後，世尊分身所在國土滅度之處，當廣說此經，所以者何？我等亦自欲得是真淨大法，受持、讀誦、解說、書寫，而供養之。

E 2 佛現神力(分五)

F 1 正現神力 爾時，世尊於文殊師利等，無量百千萬億舊住娑婆世界菩薩摩訶薩，及諸比丘、比丘尼、優婆塞、優婆夷、天、龍、夜叉、乾闥婆、阿修羅、迦樓羅、緊那羅、摩睺羅伽、人非人等，一切眾前，現大神力，出廣長舌，上至梵世；一切毛孔，放於無量無數色光，皆悉遍照十方世界。眾寶樹下，師子座上諸佛，亦復如是，出廣長舌，放無量光。

釋迦牟尼佛，及寶樹下諸佛，現神力時，滿百千歲，然後還攝舌相。一時警效，俱共彈指，是二音聲，遍至十方諸佛世界，地皆六種震動。

F<sub>2</sub> 普見大會 其中眾生，天龍、夜叉、乾闥婆、阿修羅、迦樓羅、緊那羅、摩睺羅伽、人非人等，以佛神力故，皆見此娑婆世界，無量無邊百千萬億眾寶樹下師子座上諸佛；及見釋迦牟尼佛共多寶如來，在寶塔中坐師子座；又見無量無邊百千萬億菩薩摩訶薩，及諸四眾，恭敬圍繞釋迦牟尼佛。既見是已，皆大歡喜，得未曾有。

F<sub>3</sub> 諸天唱勸 即時，諸天於虛空中，高聲唱言：過此無量無邊百千萬億阿僧祇世界，有國名娑婆，是中有佛，名釋迦牟尼。今為諸菩薩摩訶薩說大乘經，名妙法蓮華，教菩薩法，佛所護念。汝等當深心隨喜，亦當禮拜供養釋迦牟尼佛。

F<sub>4</sub> 眾生歸命供養 彼諸眾生，聞虛空中聲已，合掌向娑婆世界，作如是言：南無釋迦牟尼佛！南無釋迦牟尼佛！以種種華、香、瓔

珞、旛蓋，及諸嚴身之具，珍寶妙物，皆共遙散娑婆世界。所散諸物，從十方來，譬如雲集，變成寶帳，遍覆此間諸佛之上。

F 5 世界合一於時，十方世界通達無礙，如一佛土。

E 3 結要勸持（分三）

F 1 稱歎付囑 爾時，佛告上行等菩薩大眾：諸佛神力，如是無量無邊，不可思議。若我以是神力，於無量無邊百千萬億阿僧祇劫，為囑累故，說此經功德，猶不能盡。

F 2 結要付囑 以要言之，如來一切所有之法，如來一切自在神力，如來一切秘要之藏，如來一切甚深之事，皆於此經宣示顯說。

F 3 勸持付囑 是故汝等於如來滅後，應一心受持、讀誦、解說、書寫，如說修行。所在國土，若有受持、讀誦、解說、書寫，如說修行，若經卷所住之處，若於園中，若於林中，若於樹下，若於僧坊，若白衣舍，若在殿堂，若山谷曠野，是中皆應起塔供養。所以者何？當知是處，即是道場。諸佛於此，得阿耨



多羅三藐三菩提；諸佛於此，轉於法輪；諸佛於此，而般涅槃。

D 2 重頌（分二）

E 1 頌佛現神力 爾時，世尊欲重宣此義，而說偈言：

諸佛救世者 住於大神通 為悅眾生故 現無量神力  
舌相至梵天 身放無數光 為求佛道者 現此稀有事  
諸佛警歎聲 及彈指之聲 周聞十方國 地皆六種動  
以佛滅度後 能持是經故 諸佛皆歡喜 現無量神力

E 2 頌結要勸持（分三）

F 1 頌稱歎 囑累是經故 讚美受持者 於無量劫中 猶故不能盡  
是人之功德 無邊無有窮 如十方虛空 不可得邊際

F 2 頌結要兼釋付囑意（分四）

G 1 頌一切法 能持是經者 則為已見我 亦見多寶佛 及諸分身者  
又見我今日 教化諸菩薩

G 2 頌自在神力 能持是經者 令我及分身 滅度多寶佛 一切皆歡喜

十方現在佛 並過去未來 亦見亦供養 亦令得歡喜

G<sub>3</sub> 頌秘要之藏 諸佛坐道場 所得秘要法 能持是經者 不久亦當得

G<sub>4</sub> 頌甚深之事 能持是經者 於諸法之義 名字及言辭 樂說無窮盡

如風於空中 一切無障礙 於如來滅後 知佛所說經

因緣及次第 隨義如實說 如日月光明 能除諸幽冥

斯人行世間 能滅眾生闇 教無量菩薩 畢竟住一乘

F<sub>3</sub> 頌勸獎 是故有智者 聞此功德利 於我滅度後 應受持斯經

是人於佛道 決定無有疑

妙法蓮華經 卷六

# 囑累品第二十二



C 2 囑累品明如來摩頂付囑（分二）

D 1 囑累受命（分三）

E 1 如來付囑命（分三）

F 1 正明付囑 爾時，釋迦牟尼佛從法座起，現大神力，以右手摩無量菩薩摩訶薩頂，而作是言：我於無量百千萬億阿僧祇劫，修習是難得阿耨多羅三藐三菩提法，今以付囑汝等，汝等應當一心流布此法，廣令增益。如是三摩諸菩薩摩訶薩頂，而作是言：我於無量百千萬億阿僧祇劫，修習是難得阿耨多羅三藐三菩提法，今以付囑汝等，汝等當受持讀誦，廣宣此法，令一切眾生，普得聞知。

F 2 釋付囑意 所以者何？如來有大慈悲，無諸慳吝，亦無所畏，能與眾生佛之智慧、如來智慧、自然智慧，如來是一切眾生之大施主。汝等亦應隨學如來之法，勿生慳吝。

F 3 誠勉隨宜 於未來世，若有善男子、善女人，信如來智慧者，當為演說此法華經，使得聞知，為令其人得佛慧故。若有眾生不信受

者，當於如來餘深法中，示教利喜，汝等若能如是，則為已報諸佛之恩。

E 2 菩薩領受 時諸菩薩摩訶薩，聞佛作是說已，皆大歡喜，遍滿其身，益加恭敬，曲躬低頭，合掌向佛，俱發聲言：如世尊敕，當具奉行，唯然世尊！願不有慮。諸菩薩摩訶薩眾，如是三反，俱發聲言：如世尊敕，當具奉行，唯然世尊！願不有慮。


E 2 事畢云散 爾時，釋迦牟尼佛令十方來諸分身佛，各還本土，而作是言：諸佛各隨所安，多寶佛塔還可如故。

D 2 時眾歡喜 說是語時，十方無量分身諸佛，坐寶樹下，師子座上者，及多寶佛，並上行等無邊阿僧祇菩薩大眾，舍利弗等聲聞四眾，及一切世間天人阿修羅等，聞佛所說，皆大歡喜。



妙法蓮華經 卷六

藥王菩薩本事品第二十三



B 2 藥王下五品約化他勸流通（分四）

C 1 勛弘法之師（分四）

D 1 宿王請問 爾時，宿王華菩薩白佛言：世尊！藥王菩薩云何遊於娑婆世界？

世尊！是藥王菩薩，有若干百千萬億那由他難行苦行？

善哉！世尊！願少解說。

諸天、龍神、夜叉、乾闥婆、阿修羅、迦樓羅、緊那羅、摩睺羅伽、人非人等，又他國土諸來菩薩，及此聲聞眾，聞皆歡喜。

D 2 如來垂答（分二）

E 1 正答苦行（分二）

F 1 明事本 爾時，佛告宿王華菩薩，乃往過去無量恆河沙劫，有佛號日月淨明德如來、應供、正遍知、明行足、善逝、世間解、無上士、調御丈夫、天人師、佛、世尊。

其佛有八十億大菩薩摩訶薩，七十二恆河沙大聲聞眾，佛壽四萬二千劫，菩薩壽命亦等。彼國無有女人、地獄、餓鬼、畜生、阿修羅等，及以諸難。地平如掌，琉璃所成，寶樹莊嚴，



寶帳覆上，垂寶華旛，寶瓶香爐，周遍國界。七寶為臺，一樹一臺，其樹去臺，盡一箭道。此諸寶樹，皆有菩薩、聲聞，而坐其下。諸寶臺上，各有百億諸天，作天伎樂，歌歎於佛，以為供養。

F 2 明本事（分三）

G 1 彼佛說法 爾時，彼佛為一切眾生喜見菩薩，及眾菩薩、諸聲聞眾，說法華經。

G 2 廣修供養（分二）

H 1 明現生供養（分二）

I 1 修行得法 是一切眾生喜見菩薩，樂習苦行，於日月淨明德佛法中，精進經行，一心求佛，滿萬二千歲已，得現一切色身三昧。

I 2 作念報恩（分二）

J 1 以三昧神通力供養 得此三昧已，心大歡喜，即作念言：我得現一切色身三昧，皆是得聞法華經力，我

今當供養日月淨明德佛，及法華經。即時入是三昧，於虛空中，雨曼陀羅華、摩訶曼陀羅華、細末堅黑栴檀，滿虛空中，如雲而下。又雨海彼岸栴檀之香，此香六銖，價值娑婆世界，以供養佛。

J<sub>2</sub> 以正報色身力供養（分三）

K<sub>1</sub> 正明燒身 作是供養已，從三昧起，而自念言：我雖以神力供養於佛，不如以身供養。即服諸香，栴檀、薰陸、兜羅婆、畢力迦、沉水、膠香，又飲薈蔔諸華香油，滿千二百歲已。香油塗身，於日月淨明德佛前，以天寶衣而自纏身，灌諸香油，以神通力願而自然身，光明遍照八十億恆河沙世界。

K<sub>2</sub> 諸佛稱歎 其中諸佛同時讚言：善哉！善哉！善男子！是真精進，是名真法供養如來。若以華、香、瓔珞、燒香、末香、塗香、天繒、旛蓋，及海彼岸栴檀

之香，如是等種種諸物供養，所不能及。假使國城妻子布施，亦所不及。

善男子！是名第一之施，於諸施中，最尊最上，以法供養諸如來故。作是語已，而各默然。

K<sup>3</sup> 明燒身時節 其身火然千二百歲，過是已後，其身乃盡。

H<sup>2</sup> 明次生供養（分五）

I<sup>1</sup> 生在王家 一切眾生喜見菩薩作如是法供養已，命終之後，復生日月淨明德佛國中，於淨德王家，結跏趺坐，忽然化生。

I<sup>2</sup> 說昔本事 即為其父而說偈言：

大王今當知 我經行彼處 即時得一切 現諸身三昧  
勤行大精進 捨所愛之身 供養於世尊 為求無上慧  
說是偈已，而白父言：日月淨明德佛，今故現在，我先供養佛已，得解一切眾生語言陀羅尼，復聞是法華經八百千萬億那由他、甄迦羅、頻婆羅、阿閼婆等

偈。大王！我今當還供養此佛。

I 3 往詣佛所 白已，即坐七寶之臺，上升虛空，高七多羅樹，往到佛所，頭面禮足，合十指爪，以偈讚佛：

容顏甚奇妙 光明照十方 我適曾供養 今復還親覲

爾時，一切眾生喜見菩薩說是偈已，而白佛言：

世尊！世尊！猶故在世。

I 4 如來付囑 爾時，日月淨明德佛告一切眾生喜見菩薩：善男子！我涅槃時到，滅盡時至，汝可安施床座，我於今夜，當般涅槃。又敕一切眾生喜見菩薩：善男子！我以佛法，囑累於汝，及諸菩薩大弟子，並阿耨多羅三藐三菩提法，亦以三千大千七寶世界，諸寶樹寶臺，及給侍諸天，悉付於汝。我滅度後，所有舍利，亦付囑汝，當令流布，廣設供養，應起若干千塔。如是日月淨明德佛，敕一切眾生喜見菩薩已，於夜後分，入於涅槃。

I 5 奉命任持（分四）

J 1 滅後起塔 爾時，一切眾生喜見菩薩見佛滅度，悲感懊惱，戀慕於佛，即以海此岸栴檀為積，供養佛身，而以燒之。火滅已後，收取舍利，作八萬四千寶瓶，以起八萬四千塔，高三世界，表剎莊嚴，垂諸旛蓋，懸眾寶鈴。

J 2 燒臂供養 爾時，一切眾生喜見菩薩復自念言：我雖作是供養，心猶未足，我今當更供養舍利。便語諸菩薩、大弟子，及天龍夜叉等一切大眾：汝等當一心念，我今供養日月淨明德佛舍利。作是語已，即於八萬四千塔前，然百福莊嚴臂，七萬二千歲，而以供養。

J 3 時眾獲益 令無數求聲聞眾、無量阿僧祇人，發阿耨多羅三藐三菩提心，皆使得住現一切色身三昧。

J 4 燒臂還復 爾時，諸菩薩、天、人、阿修羅等，見其無臂，憂惱悲哀，而作是言：此一切眾生喜見菩薩，是我等

師，教化我者，而今燒臂，身不具足。

於時一切眾生喜見菩薩，於大眾中，立此誓言：我捨兩臂，必當得佛金色之身，若實不虛，令我兩臂還復如故。作是誓已，自然還復，由斯菩薩福德智慧淳厚所致。

當爾之時，三千大千世界六種震動，天雨寶華，一切人天得未曾有。

G<sub>3</sub> 結會古今 佛告宿王華菩薩：於汝意云何，一切眾生喜見菩薩，豈異人乎？今藥王菩薩是也！其所捨身布施，如是無量百千萬億那由他數。

E<sub>2</sub> 歎經功深（分三）

F<sub>1</sub> 歎能持經人 宿王華！若有發心欲得阿耨多羅三藐三菩提者，能然手指，乃至足一指，供養佛塔，勝以國城妻子，及三千大千國土，山林河池，諸珍寶物，而供養者。若復有人，以七寶滿三千大千世界，供養於佛，及大菩薩、辟支佛、阿羅

漢，是人所得功德，不如受持此法華經，乃至一四句偈，其福最多。

F 2 歎所持經法（分二）

G 1 歎法體 宿王華！譬如一切川流江河諸水之中，海為第一；此法華經

亦復如是，於諸如來所說經中，最為深大。又如土山、黑山、小鐵圍山、大鐵圍山，及十寶山，眾山之中，須彌山為第一；此法華經亦復如是，於諸經中最為其上。又如眾星之中，月天子最為第一；此法華經亦復如是，於千萬億種諸經法中，最為照明。又如日天子，能除諸闇；此經亦復如是，能破一切不善之闇。又如諸小王中，轉輪聖王最為第一；此經亦復如是，於眾經中，最為其尊。又如帝釋，於三十三天中王；此經亦復如是，諸經中王。又如大梵天王，一切眾生之父；此經亦復如是，一切賢聖，學無學，及發菩薩心者之父。又如一切凡夫人中，須陀洹、斯陀含、阿那含、阿羅漢、辟支佛為第一；此經亦復如是，一切如來所說，若菩薩

所說，若聲聞所說，諸經法中，最為第一。有能受持是經典者，亦復如是，於一切眾生中，亦為第一。一切聲聞、辟支佛中，菩薩為第一；此經亦復如是，於一切諸經法中，最為第一。如佛為諸法王，此經亦復如是，諸經中王。

### G<sub>2</sub> 歎法用

宿王華！此經能救一切眾生者，此經能令一切眾生離諸苦惱，

此經能大饒益一切眾生，充滿其願。如清涼池，能滿一切諸渴乏者；如寒者得火，如裸者得衣，如商人得主，如子得母，如渡得船，如病得醫，如闇得燈，如貧得寶，如民得王，如賈客得海，如炬除闇；此法華經亦復如是，能令眾生離一切苦、一切病痛，能解一切生死之縛。

### F<sub>3</sub> 明持經福德（分二）

#### G<sub>1</sub> 明持全經福

若人得聞此法華經，若自書，若使人書，所得功德，以

佛智慧，籌量多少，不得其邊。若書是經卷，華香、瓔珞、燒香、末香、塗香、旛蓋、衣服、種種之燈、酥燈、油燈、諸香油燈、薈蔔油燈、須曼那油燈、波羅羅



油燈、婆利師迦油燈、那婆摩利油燈供養，所得功德，亦復無量。

G 2 明持此品福（分二）

H 1 格量（分四）

I 1 明聞品益 宿王華！若有人聞是藥王菩薩本事品者，亦得無量無邊功德。若有女人，聞是藥王菩薩本事品，能受持者，盡是女身，後不復受。

I 2 明勸修益 若如來滅後，後五百歲中，若有女人，聞是經典，如說修行，於此命終，即往安樂世界，阿彌陀佛、大菩薩眾，圍繞住處，生蓮華中，寶座之上，不復為貪欲所惱，亦復不為瞋恚愚癡所惱，亦復不為憍慢嫉妬諸垢所惱，得菩薩神通，無生法忍。得是忍已，眼根清淨，以是清淨眼根，見七百萬二千億那由他恆河沙等諸佛如來。

I 3 諸佛遙讚 是時諸佛遙共讚言：

善哉！善哉！善男子！汝能於釋迦牟尼佛法中，受持讀誦，思惟是經，為他人說，所得福德，無量無邊，火不能焚，水不能漂，汝之功德，千佛共說，不能令盡。汝今已能破諸魔賊，壞生死軍，諸餘怨敵，皆悉摧滅。善男子！百千諸佛，以神通力，共守護汝，於一切世間，天人之中，無如汝者，唯除如來，其諸聲聞、辟支佛，乃至菩薩，智慧禪定，無有與汝等者。

#### I 4 結聞品益

宿王華！此菩薩成就如是功德智慧之力。若有人聞是藥王菩薩本事品，能隨喜讚善者，是人現世口中，常出青蓮華香，身毛孔中，常出牛頭栴檀之香，所得功德，如上所說。

H 2 囑累 是故宿王華！以此藥王菩薩本事品，囑累於汝。我滅度後，後五百歲中，廣宣流布於閻浮提，無令斷絕，惡魔、魔民、諸天、龍、夜叉、鳩槃荼等，得其便也。

宿王華！汝當以神通之力，守護是經，所以者何？此經則為

閻浮提人病之良藥；若人有病，得聞是經，病即消滅，不老不死。

宿王華！汝若見有受持是經者，應以青蓮華盛滿末香，供散其上，散已，作是念言：此人不久必當取草坐於道場，破諸魔軍，當吹法螺，擊大法鼓，度脫一切眾生老病死海。是故求佛道者，見有受持是經典人，應當如是生恭敬心。

D<sub>3</sub> 聞品利益 說是藥王菩薩本事品時，八萬四千菩薩，得解一切眾生語言陀羅尼。


D<sub>4</sub> 多寶稱善 多寶如來於寶塔中，讚宿王華菩薩言：

善哉！善哉！宿王華！汝成就不可思議功德，乃能問釋迦牟尼佛如此之事，利益無量一切眾生。



妙法蓮華經 卷七

妙音菩薩品第二十四



C 2 勛受法弟子（分二）

D 1 妙音說法（分六）

E 1 放光東照 爾時，釋迦牟尼佛放大人相肉髻光明，及放眉間白毫相光，遍照東方百八萬億那由他恆河沙等諸佛世界。

過是數已，有世界名淨光莊嚴，其國有佛，號淨華宿王智如來、應供、正遍知、明行足、善逝、世間解、無上士、調御丈夫、天人師、佛、世尊，為無量無邊菩薩大眾，恭敬圍繞，而為說法。

釋迦牟尼佛白毫光明，遍照其國。

E 2 奉命西來（分二）

F 1 發來之緣（分五）

G 1 經家敘德 爾時，一切淨光莊嚴國中，有一菩薩，名曰妙音，久已植眾德本，供養親近無量百千萬億諸佛，而悉成就甚深智慧，得妙幢相三昧、法華三昧、淨德三昧、宿王戲三昧、無緣三昧、智印三昧、解一切眾生語言三昧、集一切功

德三昧、清淨三昧、神通遊戲三昧、慧炬三昧、莊嚴王三昧、淨光明三昧、淨藏三昧、不共三昧、日旋三昧，得如是等百千萬億恆河沙等諸大三昧。

G<sub>2</sub> 被照辭佛 釋迦牟尼佛光照其身，即白淨華宿王智佛言：

世尊！我當往詣娑婆世界，禮拜親近供養釋迦牟尼佛，及見文殊師利法王子菩薩、藥王菩薩、勇施菩薩、宿王華菩薩、上行意菩薩、莊嚴王菩薩、藥上菩薩。

G<sub>3</sub> 彼佛垂誠 爾時，淨華宿王智佛告妙音菩薩：

汝莫輕彼國，生下劣想。善男子！彼娑婆世界，高下不平，土石諸山，穢惡充滿，佛身卑小，諸菩薩眾，其形亦小，而汝身四萬二千由旬，我身六百八十萬由旬，汝身第一端正，百千萬福，光明殊妙；是故汝往，莫輕彼國，若佛菩薩及國土，生下劣想。

G<sub>4</sub> 妙音受旨

妙音菩薩白其佛言：世尊！我今詣娑婆世界，皆是如來之力，如來神通遊戲，如來功德智慧莊嚴。

G 5 先現來相（分六）

H 1 妙音先現華瑞 於是妙音菩薩不起於座，身不動搖，而入三昧。以三昧力，於耆闍崛山，去法座不遠，化作八萬四千眾寶蓮華，閻浮檀金為莖，白銀為葉，金剛為鬚，甄叔迦寶以為其臺。

H 2 文殊發問何緣 爾時，文殊師利法王子見是蓮華，而白佛言：

世尊！是何因緣，先現此瑞，有若干千萬蓮華，閻浮檀金為莖，白銀為葉，金剛為鬚，甄叔迦寶以為其臺？

H 3 如來答以欲來 爾時，釋迦牟尼佛告文殊師利：

是妙音菩薩摩訶薩，欲從淨華宿王智佛國，與八萬四千菩薩圍繞而來，至此娑婆世界，供養親近禮拜於我，亦欲供養聽法華經。

H 4 文殊請現其相 文殊師利白佛言：

世尊！是菩薩種何善本，修何功德，而能有是大神



通力？行何三昧？願為我等說是三昧名字，我等亦欲勤修行之。行此三昧，乃能見是菩薩色相大小，威儀進止，惟願世尊以神通力，彼菩薩來，令我得見。

H 5 釋迦推功多寶 爾時，釋迦牟尼佛告文殊師利：

此久滅度多寶如來，當為汝等而現其相。

H 6 多寶令彼來會 時多寶佛告彼菩薩：

善男子來！文殊師利法王子欲見汝身。

F 2 正共發來（分六）

G 1 眷屬經歷 於時，妙音菩薩於彼國沒，與八萬四千菩薩，俱共發來。

所經諸國，六種震動，皆悉雨於七寶蓮華，百千天樂，不鼓自鳴。

G 2 敘相登臺 是菩薩目如廣大青蓮華葉，正使和合百千萬月，其面貌端正，復過於此。身真金色，無量百千功德莊嚴，威德熾盛，光明照耀，諸相具足，如那羅延堅固之身。入七寶

臺，上升虛空，去地七多羅樹，諸菩薩眾恭敬圍繞，而來詣此娑婆世界耆闍崛山。

G<sub>3</sub> 問訊傳旨

到已，下七寶臺，以價值百千瓔珞，持至釋迦牟尼佛所，頭面禮足，奉上瓔珞，而白佛言：

世尊！淨華宿王智佛問訊世尊：少病少惱，起居輕利，安樂行不？四大調和不？世事可忍不？眾生易度不？無多貪欲、瞋恚、愚癡、嫉妬、慳慢不？無不孝父母、不敬沙門、邪見不善心、不攝五情不？世尊！眾生能降伏諸魔怨不？久滅度多寶如來在七寶塔中，來聽法不？又問訊多寶如來：安隱少惱，堪忍久住不？

G<sub>4</sub> 請見多寶

世尊！我今欲見多寶佛身，惟願世尊，示我令見。

G<sub>5</sub> 世尊為通

爾時，釋迦牟尼佛語多寶佛，是妙音菩薩欲得相見。

G<sub>6</sub> 塔中稱善

時多寶佛告妙音言：

善哉！善哉！汝能為供養釋迦牟尼佛，及聽法華經，並見文殊師利等，故來至此。

E 3 十方弘經（分二）

F 1 問答善根神力（分二）

G 1 華德疑問 爾時，華德菩薩白佛言：

世尊！是妙音菩薩，種何善根，修何功德，有是神力？

G 2 如來垂答（分二）

H 1 正答善根功德 佛告華德菩薩：

過去有佛，名雲雷音王，多陀阿伽度阿羅訶三藐三佛陀，國名現一切世間，劫名喜見。妙音菩薩於萬二千歲，以十萬種伎樂，供養雲雷音王佛，並奉上八萬四千七寶鉢，以是因緣果報，今生淨華宿王智佛國，有是神力。華德！於汝意云何？

爾時，雲雷音王佛所，妙音菩薩伎樂供養，奉上寶器者，豈異人乎？今此妙音菩薩摩訶薩是。

華德！是妙音菩薩，已曾供養親近無量諸佛，久植德本，又值恆河沙等百千萬億那由他佛。

## H2 廣明神力應化

華德！汝但見妙音菩薩其身在此，而是菩薩現種種身，處處為諸眾生說是經典，或現梵王身，或現帝釋身，或現自在天身，或現大自在天身，或現天大將軍身，或現毘沙門天王身，或現轉輪聖王身，或現諸小王身，或現長者身，或現居士身，或現宰官身，或現婆羅門身，或現比丘、比丘尼、優婆塞、優婆夷身，或現長者居士婦女身，或現宰官婦女身，或現婆羅門婦女身，或現童男童女身，或現天龍、夜叉、乾闥婆、阿修羅、迦樓羅、緊那羅、摩睺羅迦、人非人等身，而說是經。諸有地獄、餓鬼、畜生，及眾難處，皆能救濟，乃至於王後宮，變為女身，而說是經。

華德！是妙音菩薩，能救護娑婆世界諸眾生者，是妙音菩薩如是種種變化現身，在此娑婆國土，為諸眾生說是經典，於神通變化智慧無所損減。是菩薩

以若干智慧，明照娑婆世界，令一切眾生，各得所知；於十方恆河沙世界中，亦復如是。

若應以聲聞形得度者，現聲聞形而為說法；

應以辟支佛形得度者，現辟支佛形而為說法；

應以菩薩形得度者，現菩薩形而為說法；

應以佛形得度者，即現佛形而為說法。

如是種種，隨所應度而為現形，乃至應以滅度而得度者，示現滅度。

華德！妙音菩薩摩訶薩，成就大神通智慧之力，其事如是。

## F 2 問答住何三昧（分二）

G 1 問 爾時，華德菩薩白佛言：

世尊！是妙音菩薩深種善根。

世尊！是菩薩住何三昧，而能如是在所變現，度脫眾生？

G 2 答 佛告華德菩薩：

善男子！其三昧名現一切色身，妙音菩薩住是三昧中，能如是饒益無量眾生。


E 4 兩土得益 說是妙音菩薩品時，與妙音菩薩俱來者，八萬四千人，皆得現一切色身三昧；此娑婆世界無量菩薩，亦得是三昧及陀羅尼。

E 5 還歸本土 爾時，妙音菩薩摩訶薩，供養釋迦牟尼佛及多寶佛塔已，還歸本土，所經諸國，六種震動，雨寶蓮華，作百千萬億種種伎樂。既到本國，與八萬四千菩薩圍繞，至淨華宿王智佛所，白佛言：世尊！我到娑婆世界，饒益眾生，見釋迦牟尼佛，及見多寶佛塔，禮拜供養，又見文殊師利法王子菩薩，及見藥王菩薩、得勤精進力菩薩、勇施菩薩等，亦令是八萬四千菩薩，得現一切色身三昧。

E 6 聞品進道 說是妙音菩薩來往品時，四萬二千天子得無生法忍，華德菩薩得法華三昧。

妙法蓮華經 卷七

觀世音菩薩普門品第二十五



D 2 普門圓應 (分二)

E 1 問答顯德 (分二)

F 1 長行 (分二)

G 1 初番問答 (分二)

H 1 無盡興問 爾時，無盡意菩薩即從座起，偏袒右肩，合掌向佛，而作是言：世尊！觀世音菩薩以何因緣，名觀世音？

H 2 如來垂答 (分三)

I 1 總答 佛告無盡意菩薩：

善男子！若有無量百千萬億眾生，受諸苦惱，聞是觀世音菩薩，一心稱名，觀世音菩薩即時觀其音聲，皆得解脫。

I 2 別答 (分三)

J 1 約口業機明應 (分二)

K 1 明七難 (分七)

L 1 火難 若有持是觀世音菩薩名者，設入大火，火不能燒，由是菩薩威神力故。



L 2 水難 若為大水所漂，稱其名號，即得淺處。

L 3 羅剎難 若有百千萬億眾生，為求金、銀、琉璃、磈磈、瑪瑙、珊瑚、琥珀、真珠等寶，入於大海，假使黑風吹其船舫，漂墮羅剎鬼國，其中若有乃至一人，稱觀世音菩薩名者，是諸人等，皆得解脫羅剎之難，以是因緣，名觀世音。

L 4 刀杖難 若復有人，臨當被害，稱觀世音菩薩名者，彼所執刀杖，尋段段壞，而得解脫。

L 5 惡鬼難 若三千大千國土，滿中夜叉羅剎，欲來惱人，聞其稱觀世音菩薩名者，是諸惡鬼尚不能以惡眼視之，況復加害。

L 6 枷鎖難 設復有人，若有罪，若無罪，杻械枷鎖檢繫其身，稱觀世音菩薩名者，皆悉斷壞，即得解脫。

L 7 怨賊難 若三千大千國土，滿中怨賊，有一商主，將諸商人，齎持重寶，經過險路，其中一人作是唱言：

諸善男子！勿得恐怖！汝等應當一心稱觀世音菩薩名號，是菩薩能以無畏施於眾生；汝等若稱名者，於此怨賊當得解脫！眾商人聞，俱發聲言：南無觀世音菩薩！稱其名故，即得解脫。

K<sub>2</sub> 結歎 無盡意！觀世音菩薩摩訶薩，威神之力，巍巍如是。

J<sub>2</sub> 約意業機明應（分二）

K<sub>1</sub> 明三毒 若有眾生多於婬欲，常念恭敬觀世音菩薩，便得離欲；若多瞋恚，常念恭敬觀世音菩薩，便得離瞋；若多愚癡，常念恭敬觀世音菩薩，便得離癡。

K<sub>2</sub> 結歎 無盡意！觀世音菩薩有如是等大威神力，多所饒益，是故眾生常應心念！

J<sub>3</sub> 約身業機明應（分二）

K<sub>1</sub> 明二求 若有女人，設欲求男，禮拜供養觀世音菩薩，便生福德智慧之男；設欲求女，便生端正有相之女，宿植德本，眾人愛敬。

K<sub>2</sub> 結歎 無盡意！觀世音菩薩有如是力！若有眾生，恭敬禮拜  
觀世音菩薩，福不唐捐。

I<sub>3</sub> 勸持名答（分三）

J<sub>1</sub> 勸持 是故眾生，皆應受持觀世音菩薩名號。

J<sub>2</sub> 格量 無盡意！若有人受持六十二億恆河沙菩薩名字，復盡形  
供養飲食、衣服、臥具、醫藥，於汝意云何？是善男  
子、善女人，功德多不？

無盡意言：甚多！世尊！

佛言：若復有人，受持觀世音菩薩名號，乃至一時禮拜  
供養，是二人福，正等無異，於百千萬億劫不可窮盡。

J<sub>3</sub> 結歎 無盡意！受持觀世音菩薩名號，得如是無量無邊福德之  
利。

G<sub>2</sub> 次番問答（分二）

H<sub>1</sub> 無盡興問 無盡意菩薩白佛言：世尊！觀世音菩薩云何遊此娑婆世  
界？云何而為眾生說法？方便之力，其事云何？

H 2 如來垂答（分三）

I 1 別答 佛告無盡意菩薩：善男子！若有國土眾生，

應以佛身得度者，觀世音菩薩即現佛身而為說法；

應以辟支佛身得度者，即現辟支佛身而為說法；

應以聲聞身得度者，即現聲聞身而為說法；

應以梵王身得度者，即現梵王身而為說法；

應以帝釋身得度者，即現帝釋身而為說法；

應以自在天身得度者，即現自在天身而為說法；

應以大自在天身得度者，即現大自在天身而為說法；

應以天大將軍身得度者，即現天大將軍身而為說法；

應以毗沙門身得度者，即現毗沙門身而為說法；

應以小王身得度者，即現小王身而為說法；

應以長者身得度者，即現長者身而為說法；

應以居士身得度者，即現居士身而為說法；

應以宰官身得度者，即現宰官身而為說法；

應以婆羅門身得度者，即現婆羅門身而為說法；

應以比丘、比丘尼、優婆塞、優婆夷身得度者，即現比丘、比丘尼、優婆塞、優婆夷身而為說法；

應以長者、居士、宰官、婆羅門婦女身得度者，即現婦女身而為說法；

應以童男、童女身得度者，即現童男、童女身而為說法；

應以天龍、夜叉、乾闥婆、阿修羅、迦樓羅、緊那羅、摩睺羅伽、人非人等身得度者，即皆現之，而為說法；

應以執金剛神得度者，即現執金剛神而為說法。

I 2 總答 無盡意！是觀世音菩薩成就如是功德，以種種形，遊諸國土，度脫眾生。

### I 3 勸供養（分二）

J 1 勸供 是故汝等應當一心供養觀世音菩薩，是觀世音菩薩摩訶薩，於怖畏急難之中，能施無畏，是故此娑婆世界皆號之為施無畏者。

J 2 受旨（分六）

K 1 奉命興供 無盡意菩薩白佛言：

世尊！我今當供養觀世音菩薩。即解頸眾寶珠瓔珞，價值百千兩金而以與之，作是言：仁者！受此法施珍寶瓔珞。

K 2 觀音不受 時觀世音菩薩不肯受之。

K 3 無盡重舉 無盡意復白觀世音菩薩言：

仁者！愍我等故，受此瓔珞。

K 4 佛勸當愍 爾時，佛告觀世音菩薩：當愍此無盡意菩薩及四眾、天龍、夜叉、乾闥婆、阿修羅、迦樓羅、緊那羅、摩睺羅伽、人非人等故，受是瓔珞。

K 5 受已奉佛 即時觀世音菩薩愍諸四眾，及於天龍人非人等，受其瓔珞，分作二分，一分奉釋迦牟尼佛，一分奉多寶佛塔。

K 6 總結神力 無盡意！觀世音有如是自在神力，遊於娑婆世界。

F 2 偈頌（分三）

G 1 雙頌二問 爾時，無盡意菩薩以偈問曰：

世尊妙相具 我今重問彼 佛子何因緣 名為觀世音

G 2 雙頌二答（分二）

H 1 總歎行願 具足妙相尊 偈答無盡意 汝聽觀音行 善應諸方所

弘誓深如海 歷劫不思議 侍多千億佛 發大清淨願

H 2 別頌二答（分二）

I 1 頌前答（分二）

J 1 頌總答 我為汝略說 聞名及見身 心念不空過 能滅諸有苦

J 2 頌別答（分二）

K 1 頌七難（分十二）

L 1 頌第一火難

假使興害意 推落大火坑 念彼觀音力 火坑變成池

L 2 頌第二水難

或漂流巨海 龍魚諸鬼難 念彼觀音力 波浪不能沒

L 3 加頌墮須彌難

或在須彌峰 為人所推墮 念彼觀音力 如日虛空住

L 4 加頌墮金剛山難

或被惡人逐 墮落金剛山 念彼觀音力 不能損一毛

L 5 超頌第七怨賊難

或值怨賊繞 各執刀加害 念彼觀音力 咸即起慈心

L 6 追頌第四刀杖難

或遭王難苦 臨刑欲壽終 念彼觀音力 刀尋段段壞

L 7 追頌第六枷鎖難

或囚禁枷鎖 手足被杻械 念彼觀音力 釋然得解脫

L 8 加頌咒詛毒藥難

咒詛諸毒藥 所欲害身者 念彼觀音力 還著於本人

L 9 追頌第五惡鬼難

或遇惡羅刹 毒龍諸鬼等 念彼觀音力 時悉不敢害

L 10 加頌惡獸難



若惡獸圍繞 利牙爪可怖 念彼觀音力 疾走無邊方

L 1 1 加頌蛇蠍難

虺蛇及蝮蠍 氣毒煙火然 念彼觀音力 尋聲自迴去

L 1 2 加頌雷雨難

雲雷鼓掣電 降雹澍大雨 念彼觀音力 應時得消散

K 2 頌三毒二求

眾生被困厄 無量苦逼身 觀音妙智力 能救世間苦

I 2 頌後答（分二）

J 1 正頌普門示現（分三）

K 1 明身業普應

具足神通力 廣修智方便 十方諸國土 無刹不現身

種種諸惡趣 地獄鬼畜生 生老病死苦 以漸悉令滅

K 2 明意業普觀

真觀清淨觀 廣大智慧觀 悲觀及慈觀 常願常瞻仰

無垢清淨光 慧日破諸闇 能伏災風火 普明照世間

K<sup>3</sup> 明口業普說

悲體戒雷震 慈意妙大雲 澍甘露法雨 滅除煩惱焰

J<sup>2</sup> 加頌顯機顯應

諍訟經官處 怖畏軍陣中 念彼觀音力 眾怨悉退散

G<sup>3</sup> 雙頌二勸(分二)

H<sup>1</sup> 頌勸持名 妙音觀世音 梵音海潮音 勝彼世間音 是故須常念

念念勿生疑 觀世音淨聖 於苦惱死厄 能為作依怙

H<sup>2</sup> 頌勸供養 具一切功德 慈眼視眾生 福聚海無量 是故應頂禮

E<sup>2</sup> 聞品獲益(分二)

F<sup>1</sup> 持地歎證 爾時，持地菩薩即從座起，前白佛言：

世尊！若有眾生聞是觀世音菩薩品自在之業，普門示現神通力者，當知是人功德不少。

F<sup>2</sup> 經家述益 佛說是普門品時，眾中八萬四千眾生，皆發無等等阿耨多羅

三藐三菩提心。

妙法蓮華經 卷七

陀羅尼品第二十六



C 3 明咒護 (分三)

D 1 問答持經功德 爾時，藥王菩薩即從座起，偏袒右肩，合掌向佛，而白佛言：

世尊！若善男子、善女人，有能受持法華經者，若讀誦通利，若書寫經卷，得幾所福？

佛告藥王：若有善男子、善女人，供養八百萬億那由他恆河沙等諸佛，於汝意云何，其所得福，寧為多不？

甚多！世尊！

佛言：若善男子、善女人，能於是經，乃至受持一四句偈，讀誦解義，如說修行，功德甚多。

D 2 請以神咒護持 (分五)

E 1 藥王護咒 (分三)

F 1 請護 爾時，藥王菩薩白佛言：

世尊！我今當與說法者陀羅尼咒，以守護之。即說咒曰：

安爾。曼爾。摩禰。摩摩禰。旨隸。遮梨第。賒咩。賒履多瑋。

羶帝。目帝。目多履。娑履。阿瑋娑履。桑履。娑履。又裔。阿

又裔。阿耆膩。羶帝。賒履。陀羅尼。阿盧伽婆娑簸蔗毘叉膩。  
禰毘刹。阿便哆邏彌履刹。阿亶哆波隸輸地。歐究隸。牟究隸。  
阿羅隸。波羅隸。首迦差。阿三磨三履。佛陀毘吉利表帝。達摩  
波利差帝。僧伽涅瞿沙禰。婆舍婆舍輸地。曼哆邏。曼哆邏叉夜  
多。郵樓哆。郵樓哆僑舍略。惡叉邏。惡叉冶多冶。阿婆盧。阿  
摩若那多夜。

F<sub>2</sub> 稱歎 世尊！是陀羅尼神咒，六十二億恆河沙等諸佛所說，若有侵毀此  
法師者，則為侵毀是諸佛已。

F<sub>3</sub> 印善 時釋迦牟尼佛讚藥王菩薩言：  
善哉！善哉！藥王！汝愍念擁護此法師故，說是陀羅尼，於諸眾  
生，多所饒益。

### E<sub>2</sub> 勇施護咒（分二）

F<sub>1</sub> 請護 爾時，勇施菩薩白佛言：

世尊！我亦為擁護讀誦受持法華經者，說陀羅尼，若此法師得是  
陀羅尼，若夜叉，若羅刹，若富單那，若吉蔗，若鳩槃荼，若餓

鬼等，伺求其短，無能得便。即於佛前而說咒曰：

座隸。摩訶座隸。郁枳。目枳。阿隸。阿羅婆第。涅隸第。涅隸多婆第。伊緻梔。韋緻梔。旨緻梔。涅隸墀梔。涅犁墀婆底。

F 2 稱歎 世尊！是陀羅尼神咒，恆河沙等諸佛所說，亦皆隨喜，若有侵毀此法師者，則為侵毀是諸佛已。

E 3 毘沙門護咒（分二）

F 1 請護 爾時，毘沙門天王護世者白佛言：

世尊！我亦為愍念眾生，擁護此法師故，說是陀羅尼。即說咒曰：阿梨。那梨。窵那梨。阿那盧。那履。拘那履。

F 2 稱歎 世尊！以是神咒擁護法師，我亦自當擁護持是經者，令百由旬內，無諸衰患。

E 4 持國護咒（分二）

F 1 請護 爾時，持國天王在此會中，與千萬億那由他乾闥婆眾，恭敬圍繞，前詣佛所，合掌白佛言：

世尊！我亦以陀羅尼神咒，擁護持法華經者。即說咒曰：

阿伽禰。伽禰。瞿利。乾陀利。旃陀利。摩蹬耆。常求利。浮樓莎柅。頰底。

F 2 稱歎 世尊！是陀羅尼神咒，四十二億諸佛所說，若有侵毀此法師者，則為侵毀是諸佛已。

E 5 羅刹女護咒（分四）

F 1 請護 爾時，有羅刹女等，一名藍婆，二名毘藍婆，三名曲齒，四名華齒，五名黑齒，六名多髮，七名無厭足，八名持瓔珞，九名皋帝，十名奪一切眾生精氣，是十羅刹女，與鬼子母並其子及眷屬，俱詣佛所，同聲白佛言：

世尊！我等亦欲擁護讀誦受持法華經者，除其衰患，若有伺求法師短者，令不得便。即於佛前而說咒曰：

伊提履。伊提泯。伊提履。阿提履。伊提履。泥履。泥履。泥履。泥履。樓醢。樓醢。樓醢。樓醢。多醢。多醢。兜醢。毘醢。

F 2 稱歎 寧上我頭上，莫惱於法師。若夜叉、若羅刹、若餓鬼、若富單那、

若吉蔗、若毘陀羅、若犍馱、若烏摩勒伽、若阿跋摩羅、若夜叉吉蔗、若人吉蔗，若熱病，若一日、若二日、若三日、若四日、若至七日、若常熱病，若男形、若女形、若童男形、若童女形，乃至夢中，亦復莫惱。即於佛前而說偈言：

若不順我咒 惱亂說法者 頭破作七分 如阿梨樹枝

如殺父母罪 亦如壓油殃 斗秤欺誑人 調達破僧罪

犯此法師者 當獲如是殃

F<sub>3</sub> 誓願 諸羅刹女說此偈已，白佛言：世尊！我等亦當身自擁護受持讀誦修行是經者，令得安隱，離諸衰患，消眾毒藥。


F<sub>4</sub> 印善 佛告諸羅刹女：善哉！善哉！汝等但能擁護受持法華名者，福不可量，何況擁護具足受持、供養經卷，華香、瓔珞、末香、塗香、燒香、旛蓋、伎樂，然種種燈、酥燈、油燈、諸香油燈、蘇摩那華油燈、蒼蔔華油燈、婆師迦華油燈、優鉢羅華油燈，如是等百千種供養者。臯帝！汝等及眷屬，應當擁護如是法師。

D<sub>3</sub> 會眾聞品得益 說是陀羅尼品時，六萬八千人得無生法忍。



妙法蓮華經 卷七

妙莊嚴王本事品第二十七



C 4 明人護（分六）

D 1 略明本事 爾時，佛告諸大眾：乃往古世，過無量無邊不可思議阿僧祇劫，有佛名雲雷音宿王華智，多陀阿伽度阿羅訶三藐三佛陀，國名光明莊嚴，劫名喜見。

D 2 標所化能化 彼佛法中，有王名妙莊嚴，其王夫人，名曰淨德，有二子，一名淨藏，二名淨眼。是二子有大神力，福德智慧，久修菩薩所行之道，所謂檀波羅蜜、尸羅波羅蜜、羼提波羅蜜、毘離耶波羅蜜、禪波羅蜜、般若波羅蜜、方便波羅蜜、慈悲喜捨，乃至三十七品助道法，皆悉明了通達；又得菩薩淨三昧、日星宿三昧、淨光三昧、淨色三昧、淨照明三昧、長莊嚴三昧、大威德藏三昧，於此三昧亦悉通達。

D 3 明能化方便（分三）

E 1 時至 爾時，彼佛欲引導妙莊嚴王，及愍念眾生故，說是法華經。

E 2 論議 時淨藏淨眼二子，到其母所，合十指爪掌白言：願母往詣雲雷音宿王華智佛所，我等亦當侍從親近供養禮拜，所以者何？此佛於一切

天人眾中說法華經，宜應聽受。

母告子言：汝父信受外道，深著婆羅門法，汝等應往白父，與共俱去。

淨藏、淨眼合十指爪掌白母：我等是法王子，而生此邪見家。

母告子言：汝等當憂念汝父，為現神變，若得見者，心必清淨，或聽我等，往至佛所。

E<sub>3</sub> 現化 於是二子念其父故，湧在虛空，高七多羅樹，現種種神變。於虛空中，行住坐臥，身上出水，身下出火，身下出水，身上出火；或現大身滿虛空中，而復現小，小復現大；於空中滅，忽然在地，入地如水，履水如地。現如是等種種神變，令其父王心淨信解。

D<sub>4</sub> 明所化得益（分十）

E<sub>1</sub> 信子伏師 時父見子神力如是，心大歡喜，得未曾有，合掌向子言：汝等師為是誰，誰之弟子？

二子白言：大王！彼雲雷音宿王華智佛，今在七寶菩提樹下，法座上坐，於一切世間天人眾中，廣說法華經，是我等師，我

是弟子。

父語子言：我今亦欲見汝等師，可共俱往。

E 2 白母求出家 於是二子從空中下，到其母所，合掌白母：父王今已信解，堪任發阿耨多羅三藐三菩提心。我等為父已作佛事，願母見聽，於彼佛所，出家修道。

爾時，二子欲重宣其意，以偈白母：

願母放我等 出家作沙門 諸佛甚難值 我等隨佛學  
如優曇鉢華 值佛復難是 脫諸難亦難 願聽我出家

E 3 勸親覲佛 母即告言，聽汝出家，所以者何？佛難值故。

於是二子白父母言：善哉父母！願時往詣雲雷音宿王華智佛所，親近供養，所以者何？佛難得值，如優曇鉢羅華，又如一眼之龜值浮木孔，而我等宿福深厚，生值佛法，是故父母當聽我等，令得出家。所以者何？諸佛難值，時亦難遇。

E 4 敘歎功德 彼時妙莊嚴王後宮八萬四千人，皆悉堪任受持是法華經。

淨眼菩薩於法華三昧久已通達；淨藏菩薩已於無量百千萬億

劫，通達離諸惡趣三昧，欲令一切眾生離諸惡趣故；其王夫人得諸佛集三昧，能知諸佛秘密之藏。二子如是以方便力，善化其父，令心信解，好樂佛法。

### E 5 俱詣佛所聞法供養見瑞歡喜

於是妙莊嚴王與群臣眷屬俱，淨德夫人與後宮嫔女眷屬俱，其王二子與四萬二千人俱，一時共詣佛所。到已，頭面禮足，繞佛三匝，卻住一面。

爾時，彼佛為王說法，示教利喜，王大歡悅。

爾時，妙莊嚴王及其夫人，解頸真珠瓔珞，價值百千，以散佛上，於虛空中，化成四柱寶臺，臺中有大寶床，敷百千萬天衣，其上有佛，結跏趺坐，放大光明。爾時，妙莊嚴王作是念：佛身稀有，端嚴殊特，成就第一微妙之色。

### E 6 佛授王記 時雲雷音宿王華智佛，告四眾言：

汝等見是妙莊嚴王，於我前合掌立不？此王於我法中作比丘，精勤修習助佛道法，當得作佛，號娑羅樹王，國名大光，劫名

大高王；其娑羅樹王佛，有無量菩薩眾及無量聲聞，其國平正，功德如是。

E 7 出家修行 其王即時以國付弟，與夫人二子，並諸眷屬，於佛法中，出家修道。王出家已，於八萬四千歲，常勤精進，修行妙法華經，過是已後，得一切淨功德莊嚴三昧。

E 8 稱歎二子 即升虛空，高七多羅樹，而白佛言：

世尊！此我二子，已作佛事，以神通變化，轉我邪心，令得安住於佛法中，得見世尊。此二子者，是我善知識，為欲發起宿世善根，饒益我故，來生我家。

E 9 佛述行高 爾時，雲雷音宿王華智佛，告妙莊嚴王言：

如是！如是！如汝所言！若善男子、善女人，種善根故，世世得善知識，其善知識能作佛事，示教利喜，令人阿耨多羅三藐三菩提。

大王當知！善知識者，是大因緣，所以化導，令得見佛，發阿耨多羅三藐三菩提心。

大王！汝見此二子不？此二子已曾供養六十五百千萬億那由他恆河沙諸佛，親近恭敬，於諸佛所，受持法華經，愍念邪見眾生，令住正見。

E 10 讚佛自誓 妙莊嚴王即從虛空中下，而白佛言：

世尊！如來甚稀有，以功德智慧故，頂上肉髻光明顯照，其眼長廣而紺青色，眉間毫相，白如珂月，齒白齊密，常有光明，脣色赤好，如頻婆果。

爾時，妙莊嚴王讚歎佛如是等無量百千萬億功德已，於如來前，一心合掌，復白佛言：世尊！未曾有也！如來之法，具足成就不可思議微妙功德，教戒所行，安隱快善；我從今日，不復自隨心行，不生邪見、憍慢、瞋恚、諸惡之心。說是語已，禮佛而出。

D 5 結會古今 佛告大眾：於意云何，妙莊嚴王豈異人乎？今華德菩薩是。其淨德夫人，今佛前光照莊嚴相菩薩是，哀愍妙莊嚴王，及諸眷屬故，於彼中生。其二子者，今藥王菩薩、藥上菩薩是。是藥王、

藥上菩薩，成就如此諸大功德，已於無量百千萬億諸佛所，植眾德本，成就不可思議諸善功德。若有人識是二菩薩名字者，一切世間諸天人民，亦應禮拜。

D 6 聞品進道 佛說是妙莊嚴王本事品時，八萬四千人遠塵離垢，於諸法中，得法眼淨。



妙法蓮華經 卷七

普賢菩薩勸發品第二十八



B 3 約自行勸流通（分四）

C 1 經家敘儀 爾時，普賢菩薩以自在神通力，威德名聞，與大菩薩無量無邊不可稱數，從東方來，所經諸國，普皆震動，雨寶蓮華，作無量百千萬億種種伎樂，又與無數諸天龍、夜叉、乾闥婆、阿修羅、迦樓羅、緊那羅、摩睺羅伽、人非人等，大眾圍繞，各現威德神通之力。到娑婆世界，耆闍崛山中，頭面禮釋迦牟尼佛，右繞七匝。

C 2 普賢勸發（分二）

D 1 請問勸發（分二）

E 1 問 白佛言：世尊！我於寶威德上王佛國，遙聞此娑婆世界說法華經，與無量無邊百千萬億諸菩薩眾，共來聽受，惟願世尊當為說之。

若善男子、善女子，於如來滅後，云何能得是法華經？

E 2 答 佛告普賢菩薩：若善男子、善女人，成就四法，於如來滅後，當得是法華經。一者，為諸佛護念；二者，植眾德本；三者，入正定聚；四者，發救一切眾生之心。

善男子、善女人，如是成就四法，於如來滅後，必得是經。

D 2 誓願勸發（分二）

E 1 誓願護人（分六）

F 1 攘其外難 爾時，普賢菩薩白佛言：世尊！於後五百歲濁惡世中，其有受持是經典者，我當守護，除其衰患，令得安隱，使無伺求，得其便者。若魔、若魔子、若魔女、若魔民、若為魔所著者、若夜叉、若羅刹、若鳩槃荼、若毘舍闍、若吉蔗、若富單那、若韋陀羅等，諸惱人者，皆不得便。

F 2 教以內法（分三）

G 1 行立讀誦 是人若行若立，讀誦此經，我爾時乘六牙白象王，與大菩薩眾，俱詣其所，而自現身，供養守護，安慰其心，亦為供養法華經故。

G 2 常坐思惟 是人若坐，思惟此經，爾時我復乘白象王現其人前，其人若於法華經有所忘失一句一偈，我當教之，與共讀誦，還令通利。

爾時，受持讀誦法華經者，得見我身，甚大歡喜，轉復精

進，以見我故，即得三昧及陀羅尼，名為旋陀羅尼、百千萬億旋陀羅尼、法音方便陀羅尼，得如是等陀羅尼。

G<sub>3</sub>三七精進

世尊！若後世後五百歲濁惡世中，比丘、比丘尼、優婆塞、優婆夷，求索者，受持者，讀誦者，書寫者，欲修習是法華經，於三七日中，應一心精進，滿三七日已，我當乘六牙白象，與無量菩薩而自圍繞，以一切眾生所喜見身，現其人前，而為說法，示教利喜。

亦復與其陀羅尼咒，得是陀羅尼故，無有非人能破壞者，亦不為女人之所惑亂，我身亦自常護是人，惟願世尊！聽我說此陀羅尼咒。即於佛前而說咒曰：

阿檀地。檀陀婆地。檀陀婆帝。檀陀鳩舍隸。檀陀修陀隸。修陀隸。修陀羅婆底。佛陀波羶禰。薩婆陀羅尼阿婆多尼。薩婆婆沙阿婆多尼。修阿婆多尼。僧伽婆履叉尼。僧伽涅伽陀尼。阿僧祇。僧伽婆伽地。帝隸阿憍僧伽兜略阿羅帝婆羅帝。薩婆僧伽地三摩地伽蘭地。薩婆達磨修波

利剎帝。薩婆薩埵樓駄橋舍略阿〔上少下兔〕伽地。辛阿毘  
吉利地帝。

F 3 覆以神力 世尊！若有菩薩得聞是陀羅尼者，當知普賢神通之力。若法  
華經行闍浮提，有受持者，應作此念，皆是普賢威神之力。

F 4 示以勝因 若有受持讀誦，正憶念，解其義趣，如說修行。當知是人行  
普賢行，於無量無邊諸佛所，深種善根，為諸如來手摩其  
頭。

F 5 示以近果 若但書寫，是人命終當生忉利天上，是時八萬四千天女，作  
眾伎樂而來迎之，其人即著七寶冠，於娑女中，娛樂快樂，  
何況受持讀誦，正憶念，解其義趣，如說修行。若有人受持  
讀誦，解其義趣，是人命終，為千佛授手，令不恐怖，不墮  
惡趣，即往兜率天上彌勒菩薩所。

彌勒菩薩有三十二相，大菩薩眾所共圍繞，有百千萬億天女  
眷屬而於中生，有如是等功德利益。

F 6 總結勸 是故智者應當一心自書，若使人書，受持讀誦，正憶念，如說

修行。

E 2 誓願護法 世尊！我今以神通力故，守護是經，於如來滅後，闍浮提內，廣令流布，使不斷絕。

C 3 如來述發（分二）

D 1 先述護法 爾時，釋迦牟尼佛讚言：

善哉！善哉！普賢！汝能護助是經，令多所眾生安樂利益，汝已成就不可思議功德，深大慈悲，從久遠來，發阿耨多羅三藐三菩提意，而能作是神通之願，守護是經，我當以神通力，守護能受持普賢菩薩名者。

D 2 述其護人（分五）

E 1 述示其身教 普賢！若有受持讀誦，正憶念，修習書寫是法華經者，

當知是人，則見釋迦牟尼佛，如從佛口，聞此經典；

當知是人，供養釋迦牟尼佛；

當知是人，佛讚善哉；

當知是人，為釋迦牟尼佛手摩其頭；

當知是人，為釋迦牟尼佛衣之所覆。

E 2 述示以勝因 如是之人，不復貪著世樂，不好外道經書手筆，亦復不喜親近其人及諸惡者，若屠兒，若畜豬羊雞狗，若獵師，若街賣女色。是人心意質直，有正憶念，有福德力，是人為不為三毒所惱，亦不為嫉妬、我慢、邪慢、增上慢所惱，是人少欲知足，能修普賢之行。

E 3 述示以近果 普賢！若如來滅後，後五百歲，若有人見受持讀誦法華經者，應作是念：此人不久當詣道場，破諸魔眾，得阿耨多羅三藐三菩提，轉法輪，擊法鼓，吹法螺，雨法雨，當坐天人大眾中師子法座上。普賢！若於後世，受持讀誦是經典者，是人不再貪著衣服、臥具、飲食資生之物，所願不虛，亦於現世得其福報。

E 4 述攘其外難 若人有輕毀之言：汝狂人耳，空作是行，終無所獲。如是罪報，當世世無眼。若有供養讚歎之者，當於今世得現果報。若復見受持是經者，出其過惡，若實，若不實，此人現世得

白癩病；若輕笑之者，當世世牙齒疏缺、醜唇、平鼻、手腳  
繚戾、眼目角眦、身體臭穢、惡瘡膿血、水腹短氣、諸惡重  
病。

E 5 述信者功德 是故普賢，若見受持是經典者，當起遠迎，當如敬佛。

C 4 聞品成行（分二）

D 1 聞品益 說是普賢勸發品時，恆河沙等無量無邊菩薩得百千萬億旋陀羅尼，  
三千大千世界微塵等諸菩薩具普賢道。

D 2 聞經益 佛說是經時，普賢等諸菩薩，舍利弗等諸聲聞，及諸天龍人非人等，  
一切大會，皆大歡喜，受持佛語，作禮而去。



附錄一 妙法蓮華經後序 後秦沙門僧睿述

附錄二 法界佛教總會簡介

附錄三 恭敬經典

附錄一

妙法蓮華經後序

後秦沙門僧睿述

法華經者，諸佛之秘藏，眾經之實體也。以華為名者，照其本也；稱芬陀利者，美其盛也。所興既玄，其旨甚婉；自非達識傳之，罕有得其門者。夫百卉藥木之英，物實之本也；八萬四千法藏者，道果之原也，故以喻焉。

諸華之中，蓮華最勝，華尚未敷，名屈摩羅；敷而將落，名迦摩羅；處中盛時，名芬陀利。未敷喻二道，將落譬泥洹，榮曜獨足以喻斯典，至如般若諸經，深無不極，故道者以之而歸；大無不該，故乘者以之而濟；然其大略，皆以適化為大；應務之門，不得不以善權為用。權之為化，悟物雖弘，於實體不足，皆屬法華，固其宜矣。尋其幽旨，恢廓宏邃，所該甚遠，豈徒說實歸本，畢定殊途而已耶？乃實大明覺理，囊括古今。云佛壽無量永劫，未足以明其久也；分身無數萬形，不足以異其體也。然則壽量定其非數，分身明其無實，普

賢顯其無成，多寶照其不滅。夫邁玄古以斯今，則萬世同一日；即萬化以悟玄，則千途無異轍。夫如是者，則生生未足以期存，永寂亦未可言其滅矣。尋幽宗以絕往，則喪功於本無；控心轡於三昧，則忘期於二地。

經流茲土，雖復垂及百年，譯者昧其虛津，靈關莫之或啓；談者乖其准格，幽蹤罕得而履；徒復搜研皓首，並未有窺其門者。秦司隸校尉左將軍安城侯姚嵩。擬韻玄門，宅心世表，注誠斯典，信詣彌至，每思尋其文，深識譯者之失。既遇鳩摩羅法師，為之傳寫，指其大歸真，若披重霄而高蹈，登崑崙而俯盼矣。於時聽受領悟之僧八百餘人，皆是諸方英秀，一時之傑也。

是歲弘始八年，歲次鶉火。

## 附錄二 法界佛教總會簡介

法界佛教總會（以下簡稱法總），係宣化上人所創辦的國際性宗教及教育組織，積極地致力於佛法的研習、修行、教化和實踐。法總凝聚所有四眾弟子智慧與慈悲之力量，以弘揚佛法、翻譯經典、提倡道德教育、利樂有情為己任，俾使個人、家庭、社會、國家，乃至世界，皆能蒙受佛法的薰習，而漸趨至真、至善、至美的境地。

每位參與法總的四眾弟子，均矢志奉行上人所倡導的六大宗旨：不爭、不貪、不求、不自私、不自利、不打妄語。僧眾則恪遵佛制：日中一食、衣不離體，並持戒念佛，習教參禪，和合共住地獻身佛教。

法總自一九五九年成立以來，相繼成立了二十餘座道場，遍佈美、亞、澳洲，以距舊金山北部一一〇英里的萬佛聖城為樞紐。各分支道場均遵守上人所

立下的嚴謹家風：

凍死不攀緣，餓死不化緣，窮死不求緣；

隨緣不變，不變隨緣，

抱定我們三大宗旨。

捨命為佛事，造命為本事，正命為僧事；

即事明理，明理即事，

推行祖師一脈心傳。

法總的教育機構，有國際譯經學院、法界宗教研究院、僧伽居士訓練班、法界佛教大學、培德中學、育良小學等，除了積極地培養弘法、翻譯及教育之傑出人才外，並推展各宗教間之交流與對話，以促進宗教間的團結與合作，共

同致力於世界和平之重責大任。

法總屬下的道場及機構，門戶開放，沒有人我、國籍、宗教的分別，凡是各國各教人士，願致力於仁義道德、追求真理、明心見性者，皆歡迎前來修持，共同研習！

### 附錄三 恭敬經典

我們研究佛法的人，對於安放經書的常識應該知道。譬如三藏十二部一切經典，無論是那一部，我們應該看著這一切經典比我們的生命更重要，看著這一切經典比任何珍寶更重要。《金剛經》上說：「若是經典所在之處即為有佛。」所以經典是佛的法身所在處。助印經典、閱讀經書、恭敬經書，皆可啓發無限的智慧；但若對經書不恭敬，也能令人墮落不如意處。

安置經書所應注意事項，略說如下：

一、經是法寶，為眾生離苦的指南，應尊重恭敬，若有破損，應速修補，不可燒毀或丟棄。經典所在之處皆有龍天護佑，若任其損壞廢置，罪過無量。

二、佛經要放在其它書籍的上面。舉凡經、律、論其放置層次，由上

而下依次為：原文經典、經典註解、一般佛學書、聖賢的言論、教化性書籍、一般書籍。

三、經上不可塗寫，不得一邊談說雜話吃東西，一邊看經書。

四、經書應恭敬放於清淨高處，不可隨意扔放在床上、座椅上、矮桌几上及不淨處。

五、如手捧或裝於口袋攜持時，不得低於腰部，不可挾腋下。

六、不可在看經的桌面上，擺置雜物，或躺著看經書，更不可以汚手觸經。

七、不得口吹經上灰塵，應以專用淨布拭去。

八、您的書房和睡房若是同一間（限單身淨房），睡覺時應用乾淨的布將經書蓋上，且要安置在頭的那一邊。

九、不可在經典所在的地方，做種種污穢的行為。



十、看經書時，若看一段落，要中斷不看，應以夾放紙條作記號。不可折頁、折角，或經書面朝下，「人」字形擱置。

十一、看經應專心，若有雜念，應先合上經典，淨念後，再閱讀。

十二、不可用手指沾口水翻書頁。

十三、不可在洗手間內看經。

十四、若無暇閱讀，應轉送他人，廣為流通。

迴向偈

願以此功德 莊嚴佛淨土  
上報四重恩 下濟三塗苦  
若有見聞者 悉發菩提心  
盡此一報身 同生極樂國